

LEGENDA SANCTI FRANCISCI¹.

PROLOGUS.

Laus gene-
ralis S. Fran-
cisci.

1. *Apparuit gratia Dei Salvatoris nostri*² diebus istis novissimis in servo suo Francisco omnibus vere humilibus et sanctae paupertatis amicis, qui superaffluentem in eo Dei misericordiam venerantes, ipsius erudiantur exemplo, *impietatem et saecularia desideria funditus abnegare*, Christo conformiter vivere et ad beatam spem desiderio indefesso sitire. In ipsum namque ut vere *pauperculum* et contritum tanta Deus excelsus benignitatis condescensione *respexit*³, quod non solum de mundialis conversationis pulvere *suscitavit* egenum, verum etiam evangelicae perfectionis professorem, dñcem atque praecorem effectum in lucem dedit credentium, *ut testimonium perhibendo de lumine* viam lucis et pacis ad corda fidelium Domino praepararet. Hic etenim *quasi stella matutina in medio nebulae*⁴, claris vitae micans et doctrinae fulgoribus, *sedentes in tenebris et umbra mortis* irradiatione praefulgida direxit in lucem, et tanquam *arcus refulgens inter nebulas gloriae*⁵, signum in se dominici foederis repraesentans, *pacem* et salutem *evangelizavit* hominibus, existens et ipse Angelus verae pacis, secundum imitatoriam quoque similitudinem Praecursoris destinatus a Deo, ut, *viam parans in deserto*⁶ altissimae paupertatis, tam exemplo quam verbo poenitentiam praedicaret. Primum supernae gratiae praeventus do-

nis, dehinc virtutis invictae adauctus meritis, propheta quoque repletus spiritu nec non et angelico deputatus officio incendioque seraphico totus ignitus et ut vir hierarchicus *curru igneo* sursum vectus⁷, sicut ex ipsius vitae decursu luculenter apparet, rationabiliter comprobatur venisse *in spiritu et virtute Eliae*. Ideoque alterius *amici Sponsi*⁸, Apostoli et Evangelistae Ioannis vaticinatione veridica sub similitudine Angeli ascendentis ab ortu solis signumque Dei vivi habentis astruitur non immerito designatus. Sub apertione namque *sexti sigilli vidi*, ait Ioannes in Apocalypsi, *alterum Angelum ascendentem ab ortu solis, habentem signum Dei vivi*.

2. Hunc Dei nuntium amabilem Christo, imitabilem nobis et admirabilem mundo servum Dei fuisse Franciscum, indubitabili fide colligimus, si culmen in eo eximiae sanctitatis advertimus, qua⁹, inter homines vivens, imitator fuit puritatis angelicae, qua et positus est perfectis Christi sectatoribus in exemplum. Ad quod quidem fideliter sentiendum et pie, non solum inducit officium, quod habuit, *vocandi ad fletum et planctum, calvitium et cingulum sacci*¹⁰ *signandique thau super frontes viro- rum gementium et dolentium* signo poenitentialis crucis et habitus cruci conformis; verum etiam irrefragabili veritatis testificatione confirmat *signaculum*

¹ Pro *Legenda S. Francisci* cod. B a secunda manu *Legenda de Vita S. Francisci composita a divo Bonaventura*; C (item a 2. m.) *Vita beati Patris Francisci*; E *Haec est Legenda maior beati Francisci*. Deinde prosequitur prima manus in E *Incipit prologus in vitam beati Francisci*. Cod. A annotat: Haec maior vita sive *Legenda* beati Francisci pro aedificatione Fratrum in loco quolibet habeatur et potest legi ad mensam per totam Octavam natalis beati Francisci. Minor autem vita, quae de hac excerpta est, poni debet in libris choralibus et legi secundum suas distinctiones in festivitatibus beati Francisci et per Octavam natalis eius, et in Breviariis portatilibus potest poni. Scriptores ergo compellantur tenere punctio-

nes et litteram exemplaris; et eorum errores iuxta ipsum exemplar per Fratrum diligentiam corrigantur. Incipit prologus in vitam beati Francisci. Apparuit.

² Tit. 2, 14; deinde sequuntur verba ex v. 12.

³ Respicitur Isai. 66, 2. et Ps. 142, 7. et infra Ioan. 4, 7.

⁴ Eccli. 50, 6; deinde Luc. 4, 79.

⁵ Eccli. 50, 8; deinde respicitur Gen. 9, 13. et Rom. 40, 45.

⁶ Respicitur Marc. 1, 3. et Luc. 3, 4.

⁷ Cfr. IV. Reg. 2, 14; deinde sequitur Luc. 4, 17.

⁸ Cfr. Ioan. 3, 29; infra sequitur Apoc. 7, 2.

⁹ Vat. *perperam quam inter*.

¹⁰ Isai. 22, 12; deinde Ezech. 9, 4. et infra 28, 42.

similitudinis Dei viventis, Christi videlicet crucifixi, quod in corpore ipsius fuit impressum non per naturae virtutem vel ingenium artis, sed potius per admirandam potentiam Spiritus Dei vivi¹.

3. Ad huius tam venerabilis viri vitam omni imitatione dignissimam describendam indignum et insufficientem me sentiens, id nullatenus attentassem, nisi me Fratrum fervens incitasset affectus, generalis quoque Capituli² concursus induxisset instantia, et ea quam ad sanctum Patrem habere teneor devotio compulset, utpote qui per ipsius invocationem et merita in puerili aetate, sicut recenti memoria teneo, a mortis faucibus erutus, si praeconia laudis eius tacuero, timeo sceleris argui ut ingratus; et haec penes me causa praecipua hunc assumendi laborem, ut ego, qui vitam corporis et animae a Deo mihi conservatam recognosco per ipsum, et virtutem eius in me ipso expertus, agnovi vitae illius virtutes, actus et verba quasi fragmenta quaedam partim neglecta partimque dispersa, quamquam plene non possem, utcumque colligerem, ne, morientibus his qui cum famulo Dei convixerant, deperirent³.

4. Ut igitur vitae ipsius veritas ad posteros transmittenda certius mihi constaret et clarius, adiens locum originis, conversationis et transitus viri sancti, cum familiaribus eius adhuc superviventibus collationem de his habui diligentem, et maxime cum quibusdam, qui sanctitatis eius et conscii fuerunt et sectatores praecipui, quibus propter agnitam veritatem probatamque virtutem fides est indubitabilis adhibenda. — In descriptione autem eorum quae per servum suum Deus dignanter effecit, curiosum stili ornatum negligendum esse putavi, cum legentis devotio plus simplici sermone quam phalerato⁴ proficiat. Nec semper historiam secundum ordinem temporis texui propter confusionem vitandam, sed potius ordinem servare studui magis aptae iuncturae, secundum

quod eodem peracta tempore diversis materiis, vel diversis patrata temporibus eidem materiae congruere videbantur.

5. Initium autem vitae ipsius, progressus et consummatio quindecim distincta capitulis describuntur inferius annotatis. Divisio capitulorum.

Agitur enim primo de conversatione ipsius in habitu saeculari.

Secundo, de perfecta conversione eius ad Deum et de reparatione trium ecclesiarum.

Tertio, de institutione Religionis et approbatione Regulae.

Quarto, de profectu Ordinis sub manu ipsius et confirmatione Regulae prius approbatae.

Quinto, de austeritate vitae, et quomodo creaturae praebebant ei solatium.

Sexto, de humilitate et obedientia et de condescensionibus divinis sibi factis ad nutum.

Septimo, de amore paupertatis et mira supplementatione defectuum.

Octavo, de pietatis affectu, et quomodo ratione carentia affici videbantur ad ipsum.

Nono, de fervore caritatis et desiderio martyrii.

Decimo, de studio et virtute orationis.

Undecimo, de intelligentia Scripturarum et spiritu prophetiae.

Duodecimo, de efficacia praedicandi et gratia sanationum.

Tertiodecimo, de stigmatibus sacris.

Quartodecimo, de patientia ipsius et transitu mortis.

Quintodecimo, de canonizatione et translatione ipsius.

Postremo de miraculis post transitum eius felicem ostensis aliqua subnectuntur.

EXPLICIT PROLOGUS.

INCIPIT VITA BEATI FRANCISCI.

CAPITULUM I.

*De conversatione ipsius in habitu saeculari*⁵.

1. Vir erat in civitate Assisii, Franciscus nomine, cuius memoria in benedictione est⁶, pro eo

quod Deus ipsum in benedictionibus dulcedinis benigne praeveniens, et de praesentis vitae periculis

Inventio Francisci.

¹ Cfr. infra c. 13.

² Celebrati an. 1260 Narbonae (Narbonne). Vide Wadding., Annal. Minor. tom. II. ad an. 1260 n. 18, ubi etiam insinuat, S. Bonaventuram Legendam hanc compilasse Parisiis (ibi dem morabatur S. Thomas, qui visitans S. Bonaventuram hoc labore occupatum et videns illum in contemplatione raptum dixit: « Sinamus Sanctum, quia laborat pro Sancto »), ipsamque ad preces cuiusdam episcopi Galli in compendium rede- gisse (Legenda minor) et tandem utramque obtulisse triennio post in comitiis Pisanis patribus Ordinis. Cfr. Analecta Franciscana, tom. III. pag. 328 (Quaracchi 1897). — Inferius l omittit in puerili aetate, sicut recenti memoria teneo. Quoad cod. I notamus, ipsum saepius et male discedere ab aliis codd., unde lectiones has erroneas, vel saltem improbabilis raro notamus.

S. Bonav. — Tom. VIII.

³ Ioan. 6, 12: Colligite quae superaverunt fragmenta, ne pereant.

⁴ Sive ornato (comto, fucato); eodem sensu ait Terent., Phormionis actu 3, scena 2. 15: Ut phaleratis dictis ducas me.

⁵ Cfr. Thom. a Celauo (qui ex praecepto Gregorii IX. vitam Francisci scripsit), Vita I. p. I. c. 4-3; Vita II. p. I. c. 4-5. et Legenda trium Sociorum (Leo, Angelus et Rufinus, qui fuerunt discipuli S. Francisci, ex praecepto Ministri Generalis Crescentii hanc vitam scripserunt), c. 1-4.

⁶ Eccli. 45, 1. — Subinde respicitur Ps. 20, 4: Quoniam praevenisti eum in benedictionibus dulcedinis. — Franciscus natus est an. 1182 Sept. 26. vel secundum alios 1181.

clementer eripuit et caelestis gratiae donis affluenter implevit. Etenim, cum inter vanos fuerit hominum filios iuvenili aetate nutritus in vanis, et post aliqualem litterarum notitiam lucrativis mercationum deputatus negotiis; superno sibi assistente praesidio, nec inter lascivos iuvenes, quamvis effusus ad gaudia, post carnis petulantiam abiit nec inter cupidos mercatores, quamvis intentus ad lucra, *speravit in*

Miseratio liberalis.

*pecunia et thesauris*¹. Inerat namque iuvenis Francisci praecordiis divinitus indita quaedam ad pauperes miseratio liberalis, quae secum ab infantia crescens², tanta cor ipsius benignitate repleverat, ut, iam Evangelii non surdus auditor, omni proponeret se petenti tribuere, maxime si divinum allegaret amorem. Cum autem semel, negotiationis intentus tumultibus, pauperem quandam pro amore Dei petentem eleemosynam praeter morem solitum vacuum repulisset; statim ad eum reversus, cucurrit post ipsum, et eleemosyna illi clementer impensa, promisit Domino Deo, quod nunquam ex tunc, dum adesset possibilitas, petentibus pro amore Domini se negaret; quod usque ad mortem indefessa pietate observans, copiosa in Deum dilectionis et gratiae incrementa promeruit. Aiebat enim post, cum iam perfecte Christum induerat³, quod etiam existens in habitu saeculari vocem divini expressivam amoris audire vix unquam sine cordis immutatione valebat.

Defectum caritatis emendavit.

Notandum.

Praeludia futurae sanctitatis.

Porro mansuetudinis lenitas cum elegantia morum, patientia et tractabilitas supra humanum modum, munificentiae largitas ultra suppetentiam facultatum, quibus bonae indolis adolescens certis florere conspicebatur indicii, quaedam videbantur esse praeludia, quod copiosior super eum foret in posterum divinae benedictionis abundantia diffundenda. Quidam sane vir de Assisio valde simplex, ut creditur, eruditus a Deo, cum aliquando per civitatem eunti obviaret Francisco⁴, deponebat pallium, sternebat ipsius pedibus vestimentum, asserens, omni fore Franciscum reverentia dignum, utpote qui esset in proximo magna facturum et ob hoc ab universitate fidelium magnifice honorandum.

Notandum.

2. Ignorabat autem adhuc Franciscus circa se consilium Dei, pro eo quod, tam iussione patris ad exteriora distractus quam corruptione naturalis originis ad inferiora depressus, nondum didicerat contemplari caelestia nec assueverat degustare divina. Et quia *spirituali auditui dat intellectum inflicta vexatio*⁵, *facta est super eum manus Domini* et im-

Probatio per morbum.

mutatio dexteræ Excelsi, diutinis languoribus ipsius corpus affligens, ut coaptaret animam ad sancti Spiritus unctionem. Cumque, resumtis corporis viribus, sibi vestimenta decentia more solito praeeparasset; obvium habuit militem quendam generosum quidem, sed pauperem et male vestitum, cuius pauperiem pio miseratus affectu, illum protinus, se exuto, vestivit, ut simul in uno geminum impleveret pietatis officium, quo et nobilis militis verecundiam tegetet et pauperis hominis penuriam relevaret.

3. Nocte vero sequenti, cum se sopori dedisset, palatium speciosum et magnum cum militaribus armis crucis Christi signaculo insignitis⁶ clementia sibi divina monstravit, ut misericordiam pro summi Regis amore pauperi exhibitam militi praeostenderet incomparabili compensandam esse mercede. Unde et cum quaereret, cuius essent; illa omnia sua fore militumque suorum, superna fuit assertionem responsum. Evigilans itaque mane, cum nondum haberet exercitatum animum ad divina perscrutanda mysteria nesciretque per visibilium species transire ad contuendam invisibilium veritatem; magnae fore prosperitatis indicium aestimabat insolitam visionem. Disposuit itaque, divinae adhuc dispositionis ignarus, in Apuliam ad quendam liberalem comitem se conferre⁷, in ipsius sperans obsequio decus adipisci militiae, ut ostensa sibi visio praetendebat. Cumque, paulo post iter aggressus, ivisset usque ad proximam civitatem⁸; audivit in nocte Dominum familiari sibi allocutione dicentem; «Francisce, quis potest melius facere tibi, dominus aut servus, dives aut pauper»? Cui cum Franciscus respondisset, quod tam dominus quam dives facere melius potest; intulit statim: «Cur ergo relinquis pro servo Dominum et pro paupere hominem divitem Deum»? Et Franciscus: «*Quid me vis, Domine, facere*»? Et Dominus ad eum⁹: «*Revertere in terram tuam*, quia visio, quam vidisti, spirituales praefiguratur effectum, non humana, sed divina in te dispositione complendum». Mane itaque facto, cum festinatione revertitur versus Assisium securus et gaudens, et iam exemplar obedientiae factus, expectabat Domini voluntatem.

4. Ex tunc a publicae negotiationis tumultu se subtrahens, supernam devote precabatur clementiam, ut, quid sibi foret agendum, ostendere dignaretur. Cum autem ex frequenti orationis usu flamma desiderii caelestis in eo vehementer succresceret, et iam pro amore supernae patriae terrena omnia despiceret

¹ Eccli. 31, 8: Beatus dives, qui inventus est sine macula et qui post aurum non abiit nec speravit etc. — Superius post *superno* edd., refragantibus multis codd., addunt *tamen*.

² Iob 31, 18: Quia ab infantia mea crevit mecum miseratio. — Subinde respiciuntur Iac. 1, 22: Estote autem factores verbi et non auditores tantum etc.; Luc. 6, 30: Omni autem petenti te tribue.

³ Gal. 3, 27: Christum induistis. Cfr. Rom. 13, 14.

⁴ Val. Franciscus.

⁵ Isai. 28, 19, post quem Ezech. 1, 3. et Ps. 76, 11. — Inferius pro *corporis viribus* edd. *corporeis viribus*.

⁶ Val. *insignitum*.

⁷ Cfr. Wadding., Apparatus ad Annales Minorum, § 4. n. 5, ubi ostendere nititur, comitem hunc non Gentilem, sed Gualterum a Brenna fuisse.

⁸ Spoletum; cfr. Wadding., loc. cit. n. 6.

⁹ Act. 9, 6. seq. et deinde Gen. 32, 9.

quasi nihil; *thesaurum* sentiebat se reperisse *absconditum*, ac velut prudens negotiator *margaritam inventam* excogitabat venditis omnibus comparare ¹. Adhuc tamen, qualiter id ageret, ignorabat, nisi quia ipsius suggerebatur spiritui, quod spiritualis mercatio a mundi contemptu sumat initium, Christique militia sit a sui ipsius victoria inchoanda.

5. Quadam itaque die, dum equitaret per planitiem, quae snbiacet civitati Assisii, leprosum quendam habuit obvium, cuius inopinatus occursum ei non parvum incussit horrorem. Recurrens autem ad perfectionis mente iam conceptae propositum et recolens, quod se ipsum oporteret primum devincere, si vellet effici Christi miles, ad deosculandum eum equo lapsus occurrit. Cui cum manum quasi aliquid accepturus leprosus protenderet, pecuniam cum osculo deportavit ². Statim autem equum ascendens et se circumquaque convertens, cum campus pateret undique liber, leprosum illum minime vidit. Admiratione itaque repletus et gaudio, laudes coepit Domino decantare devote, proponens ex hoc semper ad maiora conscendere. Solitaria proinde loca quaerebat, amica moeroribus, in quibus dum *gemitibus inenarrabilibus* ³ incessanter intenderet, post longam precum instantiam a Domino mernit exaudiri. Dum enim una dierum sic sequestratus oraret et prae nimietate fervoris totus esset absorptus in Deum; apparuit ei Christus Iesus veluti cruci confixus. Ad cuius conspectum *liquefacta est anima eius* ⁴, et memoria passionis Christi visceribus cordis ipsius adeo impressa medullitis, ut ab illa hora, cum Christi crucifixio veniret in mentem, vix posset a lacrymis et gemitibus exterius continere, sicut ipse postmodum familiariter retulit, cum appropinquaret ad finem. Intellexit per hoc nempe vir Dei, illud evan-

gelicum ⁵ sibi dici: *Si vis venire post me, abnega teipsum et tolle crucem tuam et sequaris me.*

6. Induit ex tunc spiritum paupertatis, humilitatis sensum et affectum intimae pietatis. Nam cum prius leprosum non solum consortium, verum etiam longinquum contuitum vehementer horreret; iam propter Christum crucifixum, qui iuxta verbum propheticum ⁶ contemptibilis *ut leprosus* apparuit; ut semetipsum plene contemneret, humilitatis et humanitatis obsequia leprosis benefica pietate praestabat. Visitabat enim frequenter domos ipsorum, liberaliter eis eleemosynas erogabat et cum multo compassionis affectu manus eorum osculabatur et ora. ⁷ Pauperibus etiam mendicantibus non solum sua, verum etiam se ipsum cupiebat impendere, aliquando vestimenta exuens, aliquando dissuens, aliquando scindens ad largiendum eis, cum prae manibus alia non haberet. Sacerdotibus quoque pauperibus reverenter subveniebat et pie, praecepue in ornamentis altaris, quo et cultus divini particeps fieret et cultorum inopiae supplementa praeberet. — Cum autem religiosa devotione tunc temporis limina visitaret Apostoli Petri, conspecta multitudine pauperum ante fores ecclesiae, partim pietatis ductus dulcedine, partim paupertatis allectus amore, uni ex eis magis egenti proprias largitus est vestes, et semicinctiis contactus illius, diem illum in medio pauperum cum insolita spiritus iucunditate transegit, ut et saecularem gloriam sperneret et ad perfectionem evangelicam gradatim conscendendo perveniret. Mortificationi carnis invigilabat attentius, ut Christi crucem, quam interiorius ferebat in corde, exterius etiam circumferret in corpore. Agebat autem haec omnia vir Dei Franciscus nondum habitu vel convictu sequestratus a mundo.

Renovatio interioris hominis.

Obsequia leprosis praestat et pauperibus.

Visitat limina S. Petri.

Notandum.

CAPITULUM II.

De perfecta conversione eius ad Deum et de reparatione trium ecclesiarum ⁸.

1. Quoniam autem servus Altissimi doctorem non habebat aliquem in huiusmodi nisi Christum, addidit adhuc ipsius elementia eum in gratiae visitare dulcedine. Dum enim die quadam, egressus ad

meditandum in agro, deambulare in iuxta ecclesiam sancti Damiani, quae minabatur prae nimia vetustate ruinam, et in eam, instigante se Spiritu, causa orationis intrasset; prostratus ante imaginem Crucifixi,

¹ Matth. 13, 44-46; ibid. 16, 24. seqq.: « Si quis vult post me venire, abneget semetipsum » etc., ad quod in seq. propositione alluditur.

² Edd. *reportavit*.

³ Rom. 8, 26. Cod. 1 cum *gemitibus* pro *dum gemitibus*. August., VIII. Confess., c. 12. n. 28: Solitudo mihi ad negotium flendi aptior suggerebatur.

⁴ Cant. 5, 6. — Infra Acta SS. (Bolland.) *contineri* pro *continere*.

⁵ Matth. 16, 24: Si quis vult post me venire, abneget etc. Pro *sequaris me* (ita ABCDEFGI) K *sequeris me*, edd. *sequere me*.

⁶ Isai. 53, 3. seq.: Despectum et novissimum virosum... et nos putavimus eum quasi leprosum etc. Pro *ut leprosus* IK *quasi leprosus*. — Infra cum BCDEFI pro *plenum* posuimus *plene*.

⁷ Vide Testamentum S. Francisci: Cum essem in peccatis, nimis mihi videbatur amarum videre leprosum, et ipse Dominus conduxit me inter illos etc.

⁸ Cfr. Thom. a Celano, Vita I. p. l. c. 4-9; Vita II. p. l. c. 6. seq.; p. III. c. 12. seq. et Legenda trium Sociorum, c. 5-7. Vitam istam Franciscus incepit an. 1207; cfr. Chronica XXIV Generalium (Analecta Franciscana, tom. III. pag. 2, nota 3. Quaracchi 1897).

non modica fuit in orando spiritus consolatione repletus. Cumque lacrymosis oculis intenderet in dominicam crucem, vocem de ipsa cruce dilapsam ad eum corporeis audivit auribus, ter dicentem: «Francisce, vade et repara domum meam, quae, ut cernis, tota destruitur». Tremefactus Franciscus, cum esset in ecclesia solus, stupet ad tam mirandae vocis auditum, cordeque percipiens divini virtutem¹ eloquii, mentis alienatur excessu. In se tandem reversus, ad obediendum se parat; totum se recolligit ad mandatum de materiali ecclesia reparanda, licet principalior intentio verbi ad eam ferretur, quam *Christus suo sanguine acquisivit*², sicut eum Spiritus sanctus edocuit, et ipse postmodum Fratribus revelavit. Surrexit proinde signo crucis se muniens, et assumptis pannis venalibus, ad civitatem, quae Fulginium dicitur, festinus accessit, ibique venditis quae portaverat, equum, cui tunc insederat, felix mercator, assumpto pretio, dereliquit, rediensque Assisium, ecclesiam, de cuius reparatione mandatum acceperat³, reverenter intravit et invento illic sacerdote pauperculo reverentiam decentem exhibuit, ad reparationem ecclesiae et pauperum usum pecuniam obtulit, et ut secum se morari pateretur ad tempus, humiliter requisivit. Acquievit sacerdos de mora ipsius, sed timore parentum pecuniam recusavit⁴; quam verus pecuniarum contemptor in quandam fenestram proiciens, abiectam velut pulverem vilipendit.

2. Moram autem faciente servo Dei cum sacerdote praedicto, cum hoc intellexisset pater ipsius, perturbatus animo, cucurrit ad locum. At ipse, quia novus Christi erat athleta, cum audiret persequentium minas et eorum praesentiret adventum, dare locum irae volens⁵, in quadam occulta fovea se abscondit; in qua diebus aliquibus latitando, rogabat Dominum incessanter, lacrymarum imbre perfusus, ut liberaret de manibus persequentium animam suam, et pia quae inspiraverat vota benigno favore compleret. Igitur excessiva quadam completus laetitia, coepit de pusillanimitatis ignavia semetipsum arguere, relictisque fovea et abiecto pavore, versus⁶ civitatem Assisii viam aggressus est. Quem cum cives cernerent facie squalidum et mente mutatum, ac per hoc alienatum putarent a sensu, luto platearum et lapidibus impetebant et tanquam insano et dementi clamorosis vocibus insultabant. Famulus autem Domini, nulla fractus aut mutatus iniuria, ut surdus in omnibus pertransibat. Cumque clamorem huiusmodi pater au-

disset, statim accurrens, non ad liberandum eum, sed potius ad perdendum; omni⁷ miseratione subtracta, pertractum domi primo verbis, deinde verberibus et vinculis angit. Ipse autem ad exsequendum quod coeperat promptior ex hoc et validior reddebatur, recolens illud Evangelii verbum⁸: *Beati, qui persecutionem patiuntur propter iustitiam, quoniam ipsorum est regnum caelorum*.

3. Post modicum vero tempus, patre a patria discedente, mater eius factum mariti non approbens et inflexibilem filii constantiam emolliri posse non sperans, a vinculis absolutum abire permisit. At ipse, gratias omnipotenti Domino referens, ad locum, in quo prius fuerat, est reversus. Rediens autem pater et eum non inveniens domi, convitiis illatis uxori, fremens cucurrit ad locum, ut, si eum revocare non posset, saltem de provincia effugaret. Franciscus vero, confortatus a Deo, obvium ultro se obtulit patri furienti, libera voce clamans, se pro nihilo ducere vincula et verbera eius, insuper et contestans, se pro Christi nomine gaudenter mala omnia subiturum⁹. Videns itaque pater, quod eum revocare non posset, ad extorquendam pecuniam se convertit; qua tandem inventa in fenestrula quadam, aliquantulum ipsius mitigatus est furor, avaritiae siti utcumque per haustum pecuniae temperata.

4. Tentabat deinde pater carnis filium gratiae pecunia iam nudatum ducere coram episcopo civitatis, ut in ipsius manibus facultatibus renuntiaret paternis et omnia redderet, quae habebat. Ad quod faciendum se promptum exhibuit verus paupertatis amator, perveniensque coram episcopo, nec moras patitur nec cunctatur¹⁰ de aliquo nec verba exspectat nec facit; sed continuo depositis omnibus vestimentis, restituit ea patri. Inventus est autem tunc vir Dei cilicium habere ad carnem sub vestibus delicatis. Insuper ex admirando fervore spiritu ebrius, reiectis etiam femoralibus, totus coram omnibus denudatur, dicens ad patrem: «Usque nunc vocavi te patrem in terris, amodo autem secure dicere possum: *Pater noster, qui es in caelis*¹¹, apud quem omnem thesaurum reposui et omnem spei fiduciam collocaui». Hoc cernens episcopus et admirans tam excedentem in viro Dei fervorem, protinus exsurrexit et inter brachia sua illum cum fletu recolligens, uti erat vir pius et bonus, pallio, quo erat amictus, operuit, praecipiens suis, ut aliquid sibi darent ad membra corporis contegenda; oblatus est autem ei mantellus

¹ Vat. cum ed. 4 et pluribus codd. *virtute*.

² Act. 20, 28. — Superius Vat. cum ed. 1 contra A B C DEGI vocibus *ad mandatum* interserit *perficiendum*.

³ Cod. K *se accepisse credebatur*. Inferius post *invento illic* edd., refragantibus fere omnibus codd., *prosequuntur sacerdote pauperculo, ei reverentiam decentem exhibuit et ad etc.*

⁴ Codd. BCDEGIK *pecuniam non recepit*.

⁵ Rom. 12, 19: Non vosmetipsos defendentes, carissimi, sed date locum irae. — Subinde respicitur Ps. 141, 7: Libera

me a persequentibus me; cfr. Ps. 108, 31: Quia astitit... ut salvam faceret a persequentibus animam meam.

⁶ Codd. BCDEF et *versus*. Inferius pro *viam* edd. *iter*.

⁷ Cod. 1 et *omni*.

⁸ Matth. 5, 10. — Superius post *exsequendum* edd. *ad dunt Domino*.

⁹ Cfr. Act. 5, 41, ubi simile de Apostolis dicitur. — Subinde pro *Videns* Vat. *Ardens*.

¹⁰ Vat. *contatur*.

¹¹ Matth. 6, 9.

pauper et vilis cuiusdam agricolae servientis episcopi¹. Quem ipse gratanter suscipiens, cum caemento, quod sibi occurrit, ad modum crucis manu propria consignavit, operimentum formans ex eo crucifixi hominis et pauperis seminudi. Sic igitur servus Regis altissimi nudus relictus est, ut nudum sequeretur crucifixum Dominum², quem amabat; sic utique cruce munitus, ut animam suam ligno salutis committeret, per quod de mundi naufragio salvus exiret.

5. Solutus exinde mundi contemptor a vinculis mundanarum cupidinum, civitate relicta, securus et liber³ secretum solitudinis petiit, ut solus et silens supernae audiret allocutionis arcanum. Dumque per silvam quandam iter faciens, laudes Domino lingua Francorum vir Dei Franciscus decantaret cum inbilo; latrones super eum ex abditis irruerunt. Quibus ferali animo, quis esset, interrogantibus vir Dei, confidentia⁴ plenus, prophetica voce respondit: « Praeco sum, inquit, magni Regis ». At illi percutientes eum in defossum locum plenum nivibus proiecerunt, dicentes: « lace, rustice, praeco Dei ». Ipse vero, illis recedentibus, exsilivit de fovea, magnoque exhilaratus gaudio, altiori coepit voce per nemora laudes Creatori omnium personare.

6. Et veniens ad quoddam vicinum coenobium, eleemosynam petiit ut mendicus et recepit ut incognitus et despectus. Inde vero progrediens devenit Eugubium, ubi a quodam amico pristino agnitus et susceptus, paupere tunicula ut Christi pauperculus contactus est. — Exinde totius humilitatis amator se transtulit ad leprosos eratque cum eis, diligentissime serviens omnibus propter Deum. Lavabat ipsorum pedes, ligabat ulcera; educebat plagarum putredinem et saniem abstergebat, osculabatur etiam ex miranda devotione ulcerosas plagas ipsorum, evangelicus medicus mox futurus. Propter quod tantam est a Domino consecutus virtutem, ut in spiritualibus et corporalibus morbis mirabiliter expurgandis mirabilem efficaciam obtineret. Referam unum de multis, quod accidit, viri Dei fama postmodum atius clarescente. Cum enim cuiusdam de comitatu Spoletano os pariter et maxillam morbus quidam horribilis depascendo corroderet, nec subveniri posset eidem aliquo medicinae remedio; contigit, ut propter Sanctorum exposcenda merita Apostolorum visitatis liminibus, de peregrinatione rediens, servo Dei occurreret; cumque prae devotione vellet ipsius osculari vestigia, vir humilis hoc non ferens, osculari volenti pedes osculum oris dedit. Dum autem leprosorum servus Franciscus mirabili pietate illam plagam horribilem ore sacro contingeret; omni fngato morbo, subito

aeger ille sanitatem recuperavit optatam. Nescio, quod horum magis sit merito admirandum, an humilitatis profunditas in osculo tam benigno, an virtutis praeclaritas in miraculo tam stupendo.

7. Fundatus iam in Christi humilitate Franciscus ad memoriam reducit obedientiam sibi e cruce iniunctam de sancti Damiani ecclesia reparanda⁵ et tanquam verus obediens Assisium rediit, ut saltem mendicando voci divinae pareret. Depositaeque omni verecundia propter amorem pauperis Crucifixi, mendicabat apud eos, inter quos abundare solebat, debile corpus, attritum ieiuniis oneribus lapidum supponendo. Praedicta igitur ecclesia, iuvante se Domino et devotione civium assistente, refecta; ne post laborem corpus torperet ignavia, transtulit se ad reparandam ecclesiam quandam beati Petri longius a civitate distantem ob devotionem specialem, quam ad Apostolorum principem sinceræ fidei puritate gerebat.

8. Hac tandem ecclesia consummata, pervenit ad locum, qui *Portiuncula* dicitur, in quo ecclesia beatissimæ Virginis, genitricis Dei, antiquitus fabricata exstiterat, sed deserta tunc a nemine curabatur. Quam cum vir Dei sic derelictam conspiceret, ob devotionem ferventem, quam habebat ad Dominam mundi, coepit illic assidue pro ipsius reparatione morari. Sentiens autem iuxta nomen ipsius ecclesiae, quo⁶ ab antiquo *Sancta Maria de Angelis* vocabatur, angelicarum ibi visitationum frequentiam, pedem fixit ibidem propter reverentiam Angelorum amoremque præcipuum Matris Christi. Hunc locum vir sanctus amavit prae ceteris mundi locis; hic etenim humiliter coepit, hic virtuose profecit, hic feliciter consummavit, hunc in morte Fratribus tanquam Virgini carissimum commendavit⁷. — De hoc Frater quidam Deo devotus ante conversionem suam visionem viderat relatione condignam. Innumeros cernebat homines caecitate percussos, facie in caelum directa et genibus flexis, in huius ecclesiae stare circuitu; qui omnes, protensis manibus in altum, lacrymabiliter clamabant ad Deum, misericordiam postulantes et lumen. Et ecce, ingens de caelo splendor advenit se per omnes diffundens, qui lumen unicuique tribuit et salutem desideratam concessit. — Hic est locus, in quo Fratrum Minorum Ordo a sancto Francisco per divinae revelationis instinctum inchoatus est. Divinae namque providentiae nutu, qua Christi servus dirigebatur in omnibus, tres materiales erexit ecclesias, antequam, Ordinem inchoans, Evangelium prædicaret, ut non solum a sensibilibus ad intelligibilia, a minoribus ad maiora ordinato progressu conscenderet, verum etiam, ut, quid esset facturus

Reparat duas ecclesias.

Item, Portiunculam.

De eiusdem gloria.

¹ Acta SS. episcopo pro episcopi.

² Hieron., Epist. 125. (alias 4.) in fine: Si habes substantiam, vende et da pauperibus [Matth. 19, 21.]; si non habes, grandi onere liberatus es, nudum Christum nudus sequere. Cfr. supra pag. 114, nota 7. et pag. 277, nota 2. — Subinde respicitur Sap. 14, 5: Exiguo ligno credunt homines animas suas, et transeuntes mare, per ratem liberati sunt. ³ Cod. B *libere*,

⁴ Cod. A *cum fidentia*. Inferius fide codd. supplevimus *inquit*.

⁵ Vide supra n. 1. — Pro *e cruce* B *de cruce*, F *a cruce*, K legit: *obedientiam, ut pie probat, iniunctam*.

⁶ Cod. B *quae*.

⁷ Cfr. Wadding., Annales Minorum, tom. I. ad an. 1226, n. 31. seqq.

in posterum, sensibili foris opere mysterialiter praesignaret. Nam instar reparatae triplicis fabricae ipsius sancti viri ducatu secundum datam ab eo formam,

Regulam et doctrinam Christi triiformiter ¹ renovanda erat Ecclesia trinaque triumphatura militia salvandorum, sicut et nunc cernimus esse completum.

CAPITULUM III.

De institutione Religionis et approbatione Regulae ².

1. In ecclesia igitur Virginis Matris Dei moram faciente servo ipsius Francisco et apud eam quae concepit *Verbum plenum gratiae et veritatis* ³, continuis insistente gemitibus, ut fieri dignaretur advocata ipsius, meritis Matris misericordiae concepit ipse ac peperit spiritum evangelicae veritatis. Dum enim die quodam Missam de Apostolis devotus audiret, perlectum est Evangelium illud ⁴, in quo Christus discipulis ad praedicandum mittendis formam tribuit evangelicam in vivendo, ne videlicet possideant *aurum vel argentum nec in zonis pecuniam nec peram in via nec duas tunicas habeant nec calceamenta deferant neque virgam*. Quod audiens et intelligens ac memoriae commendans, apostolicae paupertatis amicus indicibili mox perfusus laetitia: «Hoc est, inquit, quod cupio, hoc quod totis praecordiis concupisco». Solvit proinde calceamenta de pedibus, deponit baculum, peram ⁵ et pecuniam execratur, unaque contentus tunica, reiecta corrigia, pro cingulo funem sumit, omnem sollicitudinem cordis apponens, qualiter audita perficiat et apostolicae rectitudinis regulae per omnia se coaptet ⁶.

2. Coepit ex hoc vir Dei divino instinctu evangelicae perfectionis aemulator existere et ad poenitentiam ceteros invitare. Erant autem ipsius eloquia non inania nec risu digna, sed virtute Spiritus sancti plena, erant medullas cordis penetrantia, ut in vehementem stuporem audientes converterent ⁷. In omni praedicatione sua pacem annuntians dicendo: «Dominus det vobis pacem», populum in sermonis exordio salutabat. Hanc quippe salutationem, Domino revelante, didicerat, sicut ipse postmodum testabatur ⁸. Unde factum est, ut iuxta sermonem propheticum ⁹ et ipse spiritu Prophetarum afflatus, annuntiaret pacem, praedicaret salutem ac salutaribus monitis foederaret plurimos verae paci, qui discordes a Christo, prius exstiterant a salute longinqui.

3. Innotescente itaque apud multos viri Dei tam doctrinae simplicis veritate quam vitae, coeperunt

ipsius exemplo viri quidam ad poenitentiam animari et eidem, reiectis omnibus, habitu vitaeque coniungi; quorum primus exstitit venerabilis vir Bernardus, qui vocationis divinae particeps factus, Patris beati primogenitus esse promeruit, tam prioritate temporis quam privilegio sanctitatis. Ille enim, servi Christi sanctitate comperta, ipsius exemplo disponens perfecte contemnere mundum, ab eodem, qualiter id perficeret, consilium requisivit. Quo audito, Dei famulus pro primae proles conceptu sancti Spiritus consolatione repletus: «A Deo est, inquit, hoc consilium requirendum». Intraverunt proinde ecclesiam sancti Nicolai mane iam facto, et oratione praemissa, cultor Trinitatis Franciscus ter Evangeliorum librum aperuit, trino exposcens a Deo testimonio sanctum Bernardi propositum confirmari. In prima libri apertione illud ¹⁰ occurrit: *Si vis perfectus esse, vade, vende omnia, quae habes, et da pauperibus*. In secunda: *Nihil tuleritis in via*. In tertia vero: *Qui vult venire post me, abneget semetipsum et tollat crucem suam et sequatur me*. «Haec est, ait vir sanctus, vita et Regula nostra omniumque, qui nostrae voluerint societati coniungi. Vade igitur, si vis esse perfectus, et perfice quae audisti».

4. Non multo post vocatis eodem spiritu quinque viris ¹¹, filiorum Francisci senarius numerus completus est; inter quos tertium sortitus est locum sanctus pater Aegidius, vir utique Deo plenus et celebri memoria dignus. Ille etenim postmodum virtutum sublimium exercitatione praeclarus, sicut famulus Domini de ipso ¹² praedixit, quamquam esset idiota et simplex, ad excelsae contemplationis sublimatus est verticem. Nam per multa curricula temporum sursumactionibus incessanter intentus, adeo crebris in Deum rapiebatur excessibus, quemadmodum et ego ipse oculata fide conspexi, ut magis censeretur inter homines vitam angelicam agere quam humanam.

5. Illo quoque tempore cuidam sacerdoti civitatis Assisii, nomine Silvestro, honestae conversationis

Accipit regulam Apostolorum.

Invitat ad poenitentiam.

Primus scilicet Franciscus.

Nota.

Alii 5 poli.

D. Aegidius.

Silvestro.

¹ Cod. I conformiter.

² Cfr. Thom. a Celano, Vita I. p. I. c. 9-13; Vita II. p. III. c. 52, et Legenda trium Sociorum, c. 8-12.

³ Ioan. 1, 14.

⁴ Matth. 10, 9, seq.

⁵ Edd. addunt *relicta*.

⁶ Anno 1209; cfr. iam allegata Chronica XXIV Generalium pag. 2.

⁷ In G secunda manus addidit: *et obstinatorum mentes efficacia virtuosa mollirent*.

⁸ In Testamento.

⁹ Isai. 52, 7: Quam pulcri super montes pedes annuntiantis et praedicantis pacem, annuntiantis bonum, praedicantis salutem, dicentis Sion: Regnabit Deus tuus!

¹⁰ Matth. 19, 21; deinde Luc. 9, 3, et Matth. 16, 24.

¹¹ Scilicet Petro Cathanii, Aegidio, Sabbatino, Morico et Ioanne de Capella.

¹² Cod. K *Franciscus de ipso*.

viro, quaedam a Domino fuit ostensa visio non tace-
nda. Cum enim modum et viam Francisci Fra-
trumque suorum humano spiritu abhorreret; ne
periclitaretur pro temeritate iudicii, respectu fuit
supernae gratiae visitatus. Videbat namque in somnis,
totam Assisii civitatem a dracone magno circumdari,
prae cuius magnitudine nimia tota regio videbatur
exterminio subiaceret. Contuebatur post haec cru-
cem quandam auream ex ore procedentem Francisci,
cuius summitas caelos tangebatur, cuiusque brachia
protensa in latum usque ad mundi fines videbantur
extendi; ad cuius etiam aspectum praefulgidum draco
ille teter et horridus penitus fugabatur. Hoc dum
sibi tertio monstraretur, divinum aestimans esse
oraculum, viro Dei et Fratribus suis per ordinem
enarravit, ac non multo post tempore mundum re-
linquens, vestigiis Christi sic perseveranter¹ adhaesit,
quod vita ipsius in Ordine authenticam reddidit eam
quam in saeculo habuerat visionem.

6. Ex huius visionis auditu vir Dei non in glo-
ria est elatus humana, sed bonitatem Dei in suis
beneficiis recognoscens, fortius animatus est ad ho-
stis antiqui fugandam versutiam et crucis Christi
gloriam praedicandam. — Quadam autem die, dum
in quodam solitario loco annos suos in amaritudine
recogitans deploraret², sancti Spiritus in eum su-
perveniente laetitia, certificatus est de remissione
plenaria omnium delictorum. Raptus deinde supra
se ac in quoddam mirandum lumen totus absorptus,
dilatato mentis sinu, quae circa se et filios suos
futura erant luculenter aspexit. Post hoc reversus
ad Fratres: « Confortamini, ait, carissimi, et gau-
dete in Domino³, nec quia pauci estis, efficiamini
tristes, neque vos terreat mea vel vestra simplici-
tas, quoniam, sicut mihi a Domino in veritate osten-
sum est, in magnam multitudinem faciet nos cre-
scere Deus suaeque benedictionis gratia multipliciter
dilatabit ».

7. Eodem quoque tempore quodam alio bono
viro Religionem intrante⁴, ad septenarium numerum
viri Dei soboles benedicta pervenit. Tunc pius Pater
omnes ad se filios convocavit et plura eis de regno
Dei, de contemptu mundi, de abnegatione propriae
voluntatis corporisque castigatione pronuntians, pro-
positum suum de mittendo illos in quatuor partes

orbis aperuit. Iam enim sterilis et paupercula sim-
plicitas sancti Patris pepererat septem filios⁵ et de-
siderabat universitatem fidelium ad poenitentiae la-
menta vocatam Christo Domino parturire. « Ite, inquit
dulcis Pater ad filios, annuntiantes hominibus pa-
cem, praedicate poenitentiam in remissionem pecca-
torum⁶. Estote in tribulationibus patientes, in ora-
tionibus vigiles, in laboribus strenui, in sermoni-
bus modesti, in moribus graves et in beneficiis grati,
quia pro his omnibus regnum vobis praeparatur ae-
ternum ». At illi coram servo Dei humiliter se pro-
sternentes in terram, cum gaudio spiritus suscipie-
bant obedientiae sanctae mandatum. Ipse vero dice-
bat unicuique singillatim: *laeta cogitatum tuum in*
*Domino, et ipse te enutriet*⁷. Hoc verbum dicere
solitus erat, quotiescumque Fratrem aliquem ad
obedientiam dirigebat. Tunc et ipse, sciens, se da-
tum aliis in exemplum, ut prius faceret, quam do-
ceret⁸, cum uno sociorum versus unam orbis par-
tem perrexit, reliquis sex ad modum crucis tribus
aliis mundi partibus deputatis. — Modico autem elapso
post tempore, benignus Pater carae proles exoptans
praesentiam; cum in unum eos per se convocare
non posset, per eum orabat hoc fieri, qui *disper-*
*siones congregat Israelis*⁹. Sicque factum est, ut
absque humana vocatione omnes ex insperato post
modicum temporis iuxta eius desiderium, divina
operante clementia, non sine ipsorum admiratione
pariter convenirent. Illis quoque diebus quatuor sibi
adhaerentibus viris honestis¹⁰, ad duodenarium nu-
merum excreverunt.

8. Cernens autem famulus Christi, paulatim ac-
crescere numerum Fratrum, scripsit sibi et Fratri-
bus suis simplicibus verbis formulam vitae, in qua,
sancti Evangelii observantia pro fundamento indisso-
lubili collocata, pauca quaedam alia inseruit, quae
ad uniformem vivendi modum necessaria videbantur.
Desiderans autem, per Summum Pontificem appro-
bari quae scripserat, disposuit cum illo simplicium
coetu apostolicae Sedis adire praesentiam, de sola
confisus directione divina. Cuius desiderium Deus ex
alto respiciens, sociorum animos simplicitatis suae
consideratione perterritos ostensa viro Dei visione
huiusmodi confortavit. Videbatur siquidem ei, quod
per quandam viam incederet, iuxta quam stabat arbor

Mirabiliter
missi rever-
tuntur.

Prima Re-
gula scripta.

Adiit Ro-
mam.

Visio.

¹ Edd. *perfecte*, et paulo inferius *reddiit pro reddidit*.

² Isai. 38, 15: Recogitabo tibi omnes annos meos in amaritudine animae meae. — Inferius pro *Raptus deinde* B *Raptus proinde*.

³ Isai. 35, 4. et Phil. 4, 4. — Superius pro *Post hoc* A G *Post haec*, inferius pro *faciet nos crescere* A *faciat nos crescere* (respicitur Gen. 48, 15, ubi Iacob filiis Ioseph benedicens ait: Crescant in multitudinem super terram; cfr. ibid. 41, 52: Crescere me fecit Deus in terra paupertatis meae).

⁴ Scilicet Philippo Longo, qui prior Silvestro intravit.

⁵ Libr. I. Reg. 2, 5: Sterilis peperit plurimos. — Codd. A B C D E F G I mittunt *filios*.

⁶ Cfr. Marc. 3, 14. et Luc. 3, 3, ubi de Ioanne dicitur,

quod « fuit praedicans baptismum poenitentiae in remissionem peccatorum »; Luc. 24, 47. refertur, quod oportebat « praedica-
ri in nomine eius [Christi] poenitentiam et remissionem pec-
catorum in omnes gentes ». — Superius pro *annuntiantes* I
annuntiale.

⁷ Psalm. 54, 23: laeta super Dominum curam tuam etc.;
Hilar., Tract. in Ps. 54. n. 18: laeta in Dominum cogitationem
tuam etc.; Hieron., Div. Bibliotheca, in Romano Psalterio: laeta
in Deum cogitatum tuum etc.

⁸ Act. 4, 1: Coepit Iesus facere et docere.

⁹ Psalm. 146, 2.

¹⁰ Nempe Ioanne de S. Constantio, Barbaro, Bernardo Vi-
gilantis de Vida et Angelo Tancredi de Reate.

celsitudinis magnae. Ad quam cum ¹ appropinquasset et sub ea stans, ipsius altitudinem miraretur; subito tantum divina virtute levabatur in altum, ut cacumen contingeret arboris eiusque summa facillime curvaret ad ima. Huius visionis praesagium vir Deo plenus intelligens referri ad condescensionem apostolicae dignitatis, exhilaratus est spiritu, Fratribusque suis in Domino confortatis, iter cum eis aggressus est.

9. Cum autem ad Romanam curiam pervenisset et ² introductus esset ante conspectum Summi Pontificis, exposuit suum propositum, petens humiliter et instanter, supradictam sibi vivendi regulam approbari. Videns autem Christi Vicarius, dominus Innocentius tertius, vir utique sapientia clarus, admirandam in viro Dei simplicis animi puritatem, propositi constantiam ignitumque voluntatis sanctae fervorem ³, inclinatus animo est, ut pium supplicanti praeberet assensum. Distulit tamen perficere quod Christi postulabat pauperculus, pro eo quod aliquibus de cardinalibus novum aliquid et supra vires humanas arduum videretur. Aderat autem inter cardinales vir venerandus, dominus Ioannes de sancto Paulo, episcopus Sabinensis, omnis sanctitatis amator et adiutor pauperum Christi. Qui divino Spiritu inflammatus, Summo Pontifici dixit et fratribus suis: « Si petitionem pauperis huius tanquam nimis arduam novamque refellimus, cum petat, confirmari sibi formam evangelicae vitae; cavendum est nobis, ne in Christi Evangelium offendamus. Nam si quis intra evangelicae perfectionis observantiam et votum ipsius dicat contineri aliquid novum aut irrationabile vel impossibile ad servandum ⁴; contra Christum, Evangelii auctorem, blasphemare convincitur ». Quibus propositis, successor Apostoli Petri, conversus ad pauperem Christi, dixit: « Ora, fili, ad Christum,

ut suam nobis per te voluntatem ostendat, qua certius cognita, tuis piis desideriis securius annuamus ».

10. Omnipotentis autem Dei famulus, totum se conferens ad orandum, precibus devotis obtinuit et quod ⁵ exterius ipse proferret, et quod interius Papa sentiret. Nam cum parabolam de divite rege cum muliere formosa et paupere contrahente gratanter et de prole suscepta praeferente generantis regis imaginem, ac per hoc educanda de mensa ipsius, sicut a Deo acceperat, retulisset; ex illius interpretatione subiunxit: « Non est formidandum, quod fame pereant aeterni Regis filii et heredes, qui ad imaginem Regis Christi per Spiritus sancti virtutem de paupere matre nati, et ipsi per spiritum paupertatis sunt in Religione paupercula generandi. Si enim Rex caelorum imitatoribus suis regnum promittit aeternum ⁶, quanto magis illa subministrabit, quae communiter largitur bonis et malis ». Hanc ergo parabolam et intellectum ipsius Christi Vicarius cum diligenter audisset, miratus est valde et indubitanter Christum locutum in homine recognovit. Sed et visionem, quam tunc temporis e caelo perceperat, in hoc viro fore complendam, Spiritu divino suggerente, firmavit. Videbat namque in somnis, ut retulit, Lateranensem basilicam fore proximam iam ruinae, quam quidam homo pauperculus, modicus et despectus, proprio dorso submisso, ne caderet, sustentabat. « Vere, inquit, hic ille est, qui opere et doctrina Christi sustentabit Ecclesiam ⁷ ». Inde praecipua devotione repletus petitioni eius se per omnia inclinavit ac Christi famulum speciali semper amore dilexit. Proinde postulata concessit et adhuc concedere plura promisit. Approbavit Regulam, dedit de poenitentia praedicanda mandatum et laicis Fratribus omnibus, qui servum Dei fuerant comitati, fecit coronas parvulas fieri, ut verbum Dei libere praedicarent ⁸.

Petitur confirmatio Regulae.

Cardinalis Ioannes defendit Regulam.

¹ Cod. A dum.

² Refragantibus A B C D E F G, in edd. et nonnullis codd. additur: « adduceretur ante conspectum Summi Pontificis, essetque Christi Vicarius in palatio Lateranensi, in loco, qui dicitur *Speculum*, deambulans, altis occupatus meditationibus, Christi famulum tanquam ignotum repulit indignanter. Quo humiliter foras egresso, sequenti nocte huiusmodi revelatio facta est a Deo ipsi Summo Pontifici. Videbat namque, inter pedes suos palmam paulatim succrescere et in arborem pulcherrimam elevari. Et eo mirante, quid haec visio vellet ostendere, divina lux impressit menti ipsius Christi Vicarii, quod haec palma illum pauperem, quem in praecedenti die repulerat, designabat. Et mane sequenti mandavit per suos famulos per Urbem dictum pauperem quaeri. Quem inventum iuxta Lateranum in hospitali sancti Antonii, ante conspectum suum celeriter iussit adduci. Cumque ». Respectu huius additamenti, quod non est a Bonaventura, sed ab eius in generalatu successore, Hieronymo de Asculo (1274-1279), notentur quae in Chronicis XXIV Generalium Ord. Min. (Analecta Franciscana, tom. III. pag. 365, Quaracchi 1897) leguntur: *Hic Generalis addidit Legendae beati Francisci per dominum Fratrem Bonaventuram compilatae illam visionem domini Papae Innocentii tertii, quando beatum Franci-*

scum tanquam ignotum repulit indignanter ab illo loco: « Cum igitur esset Christi Vicarius in loco, qui dicitur *Speculum* » etc.; quam sibi dominus Richardus, tituli sancti Angeli diaconus Cardinalis, nepos eiusdem domini Papae, prout ab eodem avunculo suo receperat, devote revelavit. Cfr. Wadding., *Annal. Minorum*, tom. I. ad annum 1210, n. 8, ubi etiam insinuat, miraculum illud insigne de caeco, effossis iam oculis, luce donato additum fuisse ad finem Legendae ab eodem Generali Hieronymo. Cfr. praenotata *Chronica* pag. 358, ubi solum dicitur, Generalem eundem certificasse capitulum de isto miraculo; adiungimus, quod in non paucis codd. et edd. Legendae miraculum illud non invenitur.

³ Edd. contra A B C D E F G K addunt *Christi pauperem mentis amore complectens*.

⁴ Edd. cum paucis codd. *observandum*.

⁵ Multi codd. hic et paulo post *quid*.

⁶ Matth. 19, 28. seq.

⁷ Cfr. Wadding., loc. cit. ad an. 1210, n. 13. seq., ubi etiam similis quinto ab hoc anno visio Innocentio facta respectu S. Dominici refertur.

⁸ Anno 1209; cfr. Analecta Franciscana, tom. III. pag. 6, nota 4. et in fine Additamentum 1.

CAPITULUM IV.

De profectu Ordinis sub manu ipsius et confirmatione Regulae prius approbatae¹.

1. Fretus exinde Franciscus superna gratia et auctoritate papali, cum fiducia multa versus vallem Spoletanam iter arripuit, ut Evangelium Christi *faceret et doceret*². Dum autem in via conferret cum sociis, qualiter Regulam, quam susceperant, sincere servarent, qualiter *in omni sanctitate et iustitia coram Deo* incederent, qualiter in se ipsis proficerent et essent aliis in exemplum; diutius collatione protracta, hora pertransiit. Et cum iam lassati essent ex diuturnitate laboris, esurientes in quodam loco solitudinis substituerunt. Sane cum omnis via deesset, qua possent sibi de victu necessario providere, statim affuit providentia Dei. Nam subito apparuit homo afferens panem in manu, quem pauperulis Christi dedit, subitoque disparuit, incognitus, unde venerit vel quo iret. Cognoscentes autem per hoc pauperes Fratres, supernum sibi in comitatu viri Dei adesse praesidium, magis dono liberalitatis divinae quam cibo carnis propriae sunt refecti; insuper divina consolatione repleti, statuerunt firmiter et irrevocabili-
ter confirmaverunt, nullius inediae aut tribulationis impulsu a sanctae paupertatis resilire promisso³.

2. Exinde in vallem Spoletanam cum sancto proposito redentes, tractare coeperunt, utrum inter homines conversari deberent, an ad loca solitaria se conferre. Sed Christi servus Franciscus, non de sua vel suorum confidens industria, per orationis instantiam divinae super hoc voluntatis beneplacitum requisivit. Supernae igitur revelationis illustratus oraculo, intellexit, se ad hoc missum a Domino, ut Christo lucraretur animas, quas diabolus conabatur auferre. Ideoque magis omnibus quam sibi soli vivere praelegit, illius provocatus exemplo, qui unus pro omnibus mori dignatus est.

3. Recollegit itaque se vir Dei cum ceteris sociis in quodam tugurio derelicto⁴ iuxta civitatem Assisii, in quo secundum sanctae paupertatis formam in labore multo et inopia victitabant, magis lacrymarum quam deliciarum panibus refici satagentes. Vacabant enim ibidem divinis precibus incessanter, mentaliter potius quam vocaliter studio intendentes orationis devotae, pro eo quod nondum ecclesiasticos libros habebant, in quibus possent horas cano-

nicas decantare. Loco tamen illorum librum crucis Christi continuatis aspectibus diebus ac noctibus revolvebant, exemplo Patris et eloquio eruditi, qui ingiter faciebat eis de Christi cruce sermonem. Rogantibus autem Fratribus, ut eos doceret orare, dixit: « *Cum orabitis, dicite: Pater noster*⁵, et: Adoramus te, Christe, ad omnes ecclesias tuas, quae sunt in toto mundo, et benedicimus tibi, quia per sanctam crucem tuam redemisti mundum ». Docuit insuper eos Deum laudare in omnibus et ex omnibus creaturis, honorare praecipua reverentia sacerdotes, fidei quoque veritatem, secundum quod sancta Romana tenet et docet Ecclesia, et firmiter credere et simpliciter confiteri. Servabant⁶ illi Patris sancti documenta per omnia et ad omnes ecclesias et crucis, quas e longinquo videre poterant, iuxta datam sibi formam orantes, se humiliter prosternebant.

4. Contrahentibus autem Fratribus moram in loco praefato, vir sanctus die quadam Sabbati civitatem intravit Assisii, praedicaturus mane diei dominicae, ut moris erat, in ecclesia cathedrali. Cumque in quodam tugurio sito in horto canonicorum vir Deo devotus in oratione Dei more solito pernoctaret, corporaliter absentatus a filiis; ecce, fere media noctis hora, quibusdam ex Fratribus quiescentibus, quibusdam perseverantibus in orando, currus igneus mirandi splendoris, per ostium domus intrans, huc atque illuc per domicilium tertio se convertit, supra quem globus lucidus residebat, qui solis habens aspectum, noctem clarere⁷ fecit. Obstupefacti sunt vigilantes, excitati simul et exterriti dormientes, et non minus senserunt cordis claritatem quam corporis, dum ex virtute mirandi luminis alterius alteri conscientia nuda fuit. Intellexerunt namque concorditer omnes, videntibus invicem universis in cordibus singulorum, sanctum Patrem absentem corpore, praesentem spiritu, tali transfiguratum effigie, supernis irradiatum fulgoribus et ardoribus inflammatum supernaturali virtute in curru splendente simul et igneo sibi demonstrari a Domino, ut tanquam veri Israelitae post illum incederent, qui viro-
rum spiritualium, ut alter Elias, factus fuerat a Deo

¹ Cfr. Thom. a Celano, Vita I. p. I. c. 14-18; Legenda trium Sociorum, c. 13. seq.

² Respicitur Act. 1, 4; cfr. supra pag. 514, nota 8. — Subinde respicitur Luc. 1, 75.

³ Cfr. Wadding., loc. cit., ad an. 1210, n. 20. seqq., sed probabilius fuit an. 1209; cfr. Analecta Franciscana, tom. III. pag. 713.

⁴ Rivus tortus dicto. — Subinde respicitur Ps. 79, 6: Cibabis nos pane lacrymarum etc.

⁵ Luc. 11, 2: Cum oratis, dicite: Pater. Cfr. Matth. 6, 9. — Breviar. Roman. in festo Inventionis S. Crucis (3 Maii) ant. III. Noct.: Adoramus te, Christe, et benedicimus tibi, quia per crucem tuam redemisti mundum.

⁶ Cod. B addit *itaque*.

⁷ Cod. B *clarefcere*.

*currus et auriga*¹. Credendum sane, quod ille horum simplicium aperuit oculos ad preces Francisci, ut viderent magnalia Dei, qui oculos quondam aperuerat pueri ad videndum montem plenum *equorum et igneorum curruum in circuitu Elisei*². Regressus autem vir sanctus ad Fratres, coepit conscientiarum ipsorum secreta rimari, confortare ipsos de visione illa mirabili et de profectu Ordinis multa futura praedicere. Cumque patefaceret plurima, quae sensum transcendebant humanum, vere cognoverunt Fratres, super servum suum Franciscum Spiritum Domini in tanta plenitudine quievisse³, quod post ipsius doctrinam et vitam erat eis proficisci tutissimum.

Illuminatio
ipsius.

Moratur ad
Mariam de
Portiuncula.

5. Post haec pusilli gregis pastor Franciscus ad sanctam Mariam de Portiuncula duodenarium illum Fratrum numerum⁴, superna gratia praeunte, deduxit, ut, ubi meritis Matris Dei Minorum sumserat Ordo initium, ipsius illic susciperet auxiliis incrementum. Ibi quoque factus evangelicus praeco, civitates circuibat et castra, *non in doctis humanae sapientiae verbis, sed in virtute Spiritus*⁵ annuntians regnum Dei. Videbatur intuentibus homo alterius saeculi, quippe qui mente ac facie in caelum semper intentus, omnes sursum trahere conaretur. Coepit ex hoc Christi vinea germinare germen odoris Domini, et productis ex se floribus *suavitatis, honoris et honestatis*, uberes fructus afferre⁶.

Ordo de poe-
nitentia.

6. Nam praedicationis ipsius fervore succensi, quam plurimi⁷ secundum formam a Dei viro acceptam novis se poenitentiae legibus vincebant, quorum vivendi modum idem Christi famulus Ordinem *Fratrum de poenitentia* nominari decrevit. Nimirum, sicut in caelum tendentibus poenitentiae viam omnibus constat esse communem, sic et hic status clericos et laicos, virgines et coniugatos in utroque sexu admittens, quanti sit apud Deum meriti, ex pluribus per aliquos ipsorum patris miraculis innotescit⁸. — Convertebantur etiam virgines ad perpetuum coelibatum, inter quas virgo Deo⁹ carissima Clara, ipsarum plantula prima, tanquam flos vernans et candidus odorem dedit et tanquam stella praefulgida radiavit. Haec nunc glorificata in caelis ab Ecclesia digne veneratur in terris, quae filia fuit in Christo sancti Patris Francisci pauperuli et mater Pauperum Dominarum.

Item, S. Clarae.

7. Multi etiam non solum devotione compuncti, sed et perfectionis Christi desiderio inflammati, omnium mundanorum vanitate contempta, Francisci vestigia sequebantur, qui quotidianis succrescentes profectibus, usque ad fines orbis terrae celeriter pervenerunt. Faciebat namque sancta paupertas, quam solum deferrebant pro sumtibus, ipsos ad omnem obedientiam promptos, robustos ad labores et ad itinera expeditos. Et quia nihil terrenum habebant, nihil amabant nihilque timebant amittere; securi erant ubique, nullo pavore suspensi, nulla cura distracti, tanquam qui absque mentis turbatione vivebant et sine sollicitudine diem crastinum¹⁰ et serotinum hospitium exspectabant. Multa quidem eis in diversis partibus orbis inferebantur convicia tanquam personis despicabilibus et ignotis, verum amor Evangelii Christi adeo ipsos patientes effecerat, ut quaererent potius ibi esse, ubi persecutionem paterentur in corpore, quam ubi, cognita sanctitate ipsorum, mundano possent gloriari favore. Ipsa quoque rerum penuria superabundans eis videbatur ubertas, dum iuxta consilium Sapientis¹¹ *pro magno ipsis minimum complacebat*. — Sane cum ad infidelium partes aliqui ex Fratribus pervenissent, contigit, ut quidam Saracenus, pietate commotus, pecuniam eis offerret pro necessario victu. Illis autem recusantibus accipere, admiratus est homo, cernens, quod inopes essent. Intellecto tandem, quod amore Dei pauperes effecti, pecuniam possidere nolebant, tanta est eis affectione coniunctus, ut offerret se ad ministrandum necessaria omnia, quamdiu facultatum sibi aliquid superesset. O inaestimabilis pretiositas paupertatis, cuius miranda virtute mens feritatis barbaricae in tantam miserationis est immutata dulcedinem! Horrendum proinde ac nefarium scelus, ut hanc margaritam nobilem vir christianus conculcet¹², quam tanta veneratione extulit Saracenus.

Crescit
rus Fr

Emic-
pauper

Fratre
nnot
cia.

Factu
tah

8. Eo tempore Religiosus quidam de Ordine Cruciferorum, Moriens nomine, in hospitali quodam prope Assisium languore tam gravi tamque prolixo laborans, ut iam morti foret adiudicatus a medicis, viro Dei supplex factus, per nuntium postulabat instanter, ut pro se ad Dominum intercedere dignaretur. Cui beatus Pater benigne assentientis, oratione praemissa, panis micas accepit et cum oleo accepto

De F
ri

¹ Libr. IV. Reg. 2, 12. — Superius pro *supernaturali* (ita A G I K M et Acta SS.) ed. 1 et Val. *supernali*.

² Libr. IV. Reg. 6, 17. Eccli. 17, 11: Et magnalia honoris eius vidit oculus illorum.

³ Isai. 11, 2: Et requiescet super eum Spiritus Domini.

⁴ Multi codd. omittunt numerum.

⁵ Epist. 1. Cor. 2, 13, ubi pro *in virtute* Vulgata *in doctrina*; cfr. ibid. v. 5: Ut fides vestra non sit in sapientia hominum, sed in virtute Dei. Matth. 9, 35: Et circuibat Iesus omnes civitates et castella, docens etc. Idem dicitur Luc. 9, 6. de Apostolis.

⁶ Eccli. 24, 23: Ego quasi vitis fructificavi suavitatem odoris, et flores mei fructus honoris et honestatis.

⁷ Edd., refragentibus A B C D E F G, addunt *utrisque sexus in coniugali pudicitia Domino famulantes*.

⁸ Cfr. Wadding., loc. cit., ad an. 1221, n. 13. seqq.; ibid. ad an. 1212, n. 10. seqq. de S. Clara.

⁹ Codd. B C Dei.

¹⁰ Matth. 6, 34: Nolite ergo solliciti esse in crastinum.

¹¹ Eccli. 29, 30: Minimum pro magno placeat tibi, et improprium peregrinationis non audies.

¹² Matth. 7, 6: Neque mittatis margaritas vestras ante porcos, ne forte conculcent eas pedibus suis etc. — Superius pro O *inaestimabilis* B O *ineffabilis*.

de lampade, quae coram Virginis ardebat altari, commiscens, quasi quoddam electuarium per manus Fratrum infirmanti transmisit, dicens: « Medicinam hanc fratri nostro deferte Morico, qua ipsum Christi virtus non solum plenae sanitati restituet, verum etiam robustum bellatorem effectum, aciei nostrae perseveranter adiunget ». Statim autem, ut antidotum illud sancti Spiritus adinventionem confectum aeger homo gustavit, sanus exurgens, tantum mentis et corporis a Deo vigorem obtinuit, ut paulo post viri sancti Religionem ingressus, et unica tantum operiretur tunicula, sub qua longo tempore loricam portabat ad carnem, et crudis dumtaxat cibariis, herbis videlicet, leguminibus fructibusque contentus, per plura temporum lustra nec panem gustaret nec vinum, fortis tamen et incolumis perseverans¹.

9. Crescentibus quoque virtutum meritis in parvulis Christi, odor opinionis bonae circumquaque diffusus ad praesentiam sancti Patris videndam plurimos e diversis mundi partibus attrahebat. Inter quos quidam saecularium cantionum curiosus inventor, qui ab imperatore² propter hoc fuerat coronatus et inde « rex versuum » dictus, virum Dei contemptorem mundalium adire proposuit. Cumque apud castrum sancti Severini³ eum praedicantem reperisset in Monasterio quodam, facta manu Domini super se, vidit eundem crucis Christi praedicatorem Franciscum duobus transversis ensibus valde fulgentibus in modum crucis signatum, quorum unus a capite ad pedes, alius a manu in manum per pectus transversaliter tendebatur. Non noverat facie servum Christi, sed tanto monstratum miraculo mox agnovit. Subito stupefactus ad visum, incipit⁴ meliora proponere, tandemque verborum ipsius compunctus virtute, tanquam si esset gladio spiritus ex eius ore procedente transfixus, saecularibus pompis omnino contemptis, beato Patri professione cohaesit. Propter quod videns ipsum vir sanctus ab inquietudine saeculi ad Christi pacem perfecte conversum, fratrem Pacificum appellavit. Hic postmodum in omni sanctitate proficiens, antequam fieret Minister in Francia — siquidem primus ibidem ministerii gessit officium — mernit iterato magnum thau in fronte Francisci videre, quod colorum varietate distinctum, faciem ipsius miro venustabat ornatu. — Hoc quippe signum

vir sanctus magno venerabatur affectu, frequenti commendabat eloquio et in eis quas dirigebat litterulis manu propria subscreebat, tanquam si omne ipsius studium foret *signare thau* iuxta dictum propheticum⁵ *super frontes virorum gementium et dolentium*, ad Christum Iesum veraciter conversorum.

10. Processu quoque temporis multiplicatis iam Fratribus, coepit eos pastor sollicitus in loco sanctae Mariae de Portiuncula ad generale Capitulum convocare, ut in *funiculo distributionis divinae*⁶ in terra paupertatis eorum unicuique tribueret obedientiae portionem; ubi, licet omnium necessariorum esset penuria, Fratrumque multitudo ultra quinque millia conveniret aliquando, divina tamen opitulante clementia, et victus sufficientia sberat, et salus comitabatur corporea, et spiritualis incunclitas affluebat. Capitulis vero provincialibus, quia corporalem praesentiam exhibere non poterat, per sollicitam curam regiminis, instantiam precis et efficaciam benedictionis spiritu praesens erat, quamvis aliquando, mira Dei faciente virtute, visibiliter appareret. — Dum enim egregius praedicator, qui et nunc Christi praeclarus confessor, Antonius de titulo crucis: *Iesus Nazarenus, rex Iudaeorum*⁷, in Arelatensi Capitulo Fratibus praedicaret, quidam Frater probatae virtutis, Monaldus nomine, ad ostium Capituli divina commonitione respiciens, vidit corporeis oculis beatum Franciscum in aere sublevatum, extensis velut in cruce manibus, benedicentem Fratres. Tanta vero et tam insolita Fratres omnes consolatione spiritus repletos se fuisse senserunt, ut de vera sancti Patris praesentia certum eis intra se Spiritus testimonium perhiberet, licet postmodum id non solum per evidentia signa, verum etiam per eiusdem sancti Patris verba exteriori fuerit attestazione compertum. Credendum sane, quod omnipotens Dei virtus, quae Ambrosium, sacrum antistitem, tumulationi gloriosi concessit interesse Martini, ut pium pontificem pio veneraretur officio⁸, etiam servum suum Franciscum praedicationi praesentavit veracis sui praeconis Antonii, ut approbaret veritatis eloquia, praecipue crucis Christi, cuius erat et baiulus et minister.

11. Cum autem, dilatato iam Ordine, vivendi formam per dominum Innocentium approbatam⁹ dispo-

Primum Capitulum generale.

Quinque millia Fratrum.

In Arelatensi Capitulo praedicat S. Antonius.

Praesentia Francisci.

Revelatio circa Regulam.

¹ Cfr. Wadding., loc. cit., ad an. 1209, n. 18.

² Scilicet Friderico II. Iste « rex versuum » erat poeta et vocabatur Gulielmus Divini. Cfr. *Analecta Franciscana*, tom. III. pag. 7 seq.; Wadding., loc. cit., ad an. 1212, n. 37. seq.

³ In Marchia Anconitana. — Inferius respicitur Ezch. 4, 3: Et facta est super eum ibi manus Domini.

⁴ Cod. B *incipit*.

⁵ Ezch. 9, 4: Transi per mediam civitatem in medio Ierusalem et signa thau [T] super frontes virorum gementium et dolentium super cunctis abominationibus, quae sunt in medio eius; cfr. *ibid.* v. 6.

⁶ Psalm. 77, 54: Et sorte divisit eis terram in funiculo distributionis (cfr. *Iosue* 13, 7. et 17, 5. 14.). Dictio *in terra pau-*

peritatis occurrit Gen. 41, 52: Crescere me fecit Deus in terra paupertatis meae. Cfr. Wadding., loc. cit., ad an. 1212, n. 45; ad an. 1216, n. 1. et ad an. 1219, n. 1. seqq.

⁷ Ioan. 19, 19. — Capitulum Arelatense (Arles in Gallia) erat an. 1224; cfr. *Analecta Franciscana*, tom. III. pag. 23 seq. et Wadding., loc. cit., ad an. 1224, n. 42.

⁸ Vide Gregor. Turon. (*Migne, Patrol. Lat.* tom. 71.), l. de Miraculis S. Martini, c. 5. — Superius pro *omnipotens* (ita A B C D G I M) Vat. et ed. 1 *omnipotentis*, quae etiam post *Ambrosium* addunt *pium*.

⁹ Cfr. supra c. 3. n. 10. et Wadding., loc. cit., ad an. 1223, n. 9.

facere roborari, huiusmodi fuit a Deo revelatione commonitus. Videbatur quidem sibi de terra micarum subtilissimas collegisse multisque famelicis Fratribus ipsum circumstantibus debere tribuere. Cumque micarum tam tenuis distribuere formidaret, ne forte inter manus exciderent; vox ei desuper ait: «Francisce, unam de micis omnibus hostiam facito et manducare volentibus tribue». Quo id agente, quicumque illud non devote recipiebant, aut receptum contemnebant donum, mox lepra infecti, notabiles apparebant. Recitat mane vir sanctus haec omnia sociis, dolens, se non percipere mysterium visionis. Sequenti vero die, cum vigil in oratione persisteret, huiusmodi vocem de caelo delapsam audivit: «Francisce, micarum praeteritae noctis verba evangelica sunt, hostia Regula, lepra iniquitas». — Volens igitur confirmandam Regulam ex verborum Evangelii aggregatione profusius traditam ad compendiosorem formam, iuxta quod dictabat visio monstrata, redigere, in montem quandam¹ cum duobus sociis,

Scribit bis Regulam.

Spiritu sancto ducente, conscendit, ubi pane tantum contentus et aqua, ieiunans conscribi eam fecit, secundum quod oranti sibi divinus Spiritus suggererat. Quam cum, de monte descendens, servandam suo Vicario² commisisset, et ille, paucis elapsis diebus, assereret per incuriam perditam; iterato sanctus vir ad locum solitudinis rediit eamque instar prioris, ac si ex ore Dei verba susceperet, illico reparavit et per supradictum dominum Papam Honorium octavo pontificatus illius anno³, sicut optaverat, obtinuit confirmari. Ad cuius observantiam Fratres ferventer inducens, dicebat, se nihil ibi posuisse secundum industriam propriam, sed omnia sic scribi fecisse, sicut sibi fuerant divinitus revelata. Quod ut certius constaret testimonio Dei, paucis admodum evolutis diebus, impressa sunt ei stigmata Domini Iesu digito Dei vivi tanquam bulla summi Pontificis Christi ad confirmationem omnimodam Regulae et commendationem auctoris, sicut post suarum enarrationem virtutum suo loco⁴ inferius describitur.

Eius a confirmat

CAPITULUM V.

De austeritate vitae, et quomodo creaturae praebebant ei solatium⁵.

1. Cum igitur cerneret vir Dei Franciscus, suo exemplo ad crucem Christi baiulandam ferventi spiritu plurimos animari; animabatur et ipse tanquam bonus dux exercitus Christi ad palmam victoriae per culmen invictae pervenire virtutis. Attendens enim illud Apostoli verbum⁶: *Qui autem sunt Christi carnem suam crucifixerunt cum vitiis et concupiscentiis*; ut crucis armaturam suo ferret in corpore, tanta disciplinae rigiditate sensuales appetitus arcebat, ut vix necessaria sumeret sustentationi naturae. Difficile namque fore dicebat necessitati corporis satisfacere, et pronitati sensuum non parere. Propter quod cocta cibaria sanitatis tempore vix admittebat et raro, admissa vero aut conficiebat cinere, aut condimenti saporem admixtione aquae ut plurimum reddebat insipidum. De potu vini⁷ quid dicam, cum et de aqua, dum sitis aestuaret ardore, vix ad sufficientiam biberet? Modos adinveniebat abstinentiae potioris et quotidie exercitatione crescebat; licetque iam perfectionis culmen attingeret, tanquam semper incipiens, aliquid innovabat, afflictionibus carnis pu-

Eius abstinentia in cibo.

niendo libidinem. — Egrediens autem exterius propter verbum Evangelii⁸, conformabat se suscipientibus ipsum in qualitate ciborum, cum tamen, ad interiora regressus, districte servaret rigidam abstinentiae paritatem. Sicque se ipsum austerum sibi, humanum proximo, subiectum Evangelio Christi per omnia reddens, non solum abstinendo, verum etiam manducando praebebat aedificationis exemplum. Nuda humus ut frequentius lectus erat lassato corpusculo, et saepius sedens, ligno vel lapide ad caput posito, dormiebat, unica paupere contactus tunicula, in nuditate Domino serviebat et frigore⁹.

Nota: m

2. Interrogatus aliquando, quomodo vestitu tam tenui se posset ab hiemalis algoris asperitate tueri, in spiritus fervore respondit: «Si supernae patriae flamma per desiderium contingeremur interiorius, frigus istud exterius facile portarem». Vestis horrebat molliem, asperitatem amabat, asserens, propter hoc Ioannem Baptistam ore divino fuisse laudatum¹⁰. Si quando vero in data sibi tunica lenitatem sentiret, chordulis eam contexebat interiorius, quia non in

Le ip

De v ip

¹ Raynerii sive Fontis Columbae prope urbem Reatinam (Rieti). Duo socii erant Fr. Leo et Fr. Bonidius. Cfr. *Analecta Franciscana*, tom. III. pag. 29, et Wadding., loc. cit., ad an. 1223, n. 9. seq.

² Fr. Eliae.

³ Scilicet an. 1223, 29. Nov. — Superius pro *instar* BCD EF ad *instar*, qui etiam pro *reparavit* substituunt *recuperavit*.

⁴ Cap. 13. Impressio stigmatum facta fuit an. 1224 circa festum Exaltationis S. Crucis (14. Sept.). — Superius respicitur Exod. 31, 18. et Deut. 9, 10, ubi tabulae testimonii (decem praeceptorum) dicuntur scriptae digito Dei.

⁵ Cfr. Thom. a Celano, *Vita* I. p. I. c. 49. et 21; *Vita* II. p. I. c. 45. et p. III. c. 53. 56. 59. 66. 95-98. 102.

⁶ Gal. 5, 24. Cfr. Wadding., loc. cit., ad an. 1210, n. 53.

⁷ Fide multorum codd. addimus *vini*. Subinde post *aqua* edd. contra A G I M subnectunt *frigida*.

⁸ Luc. 10, 7: In eadem autem domo manete, edentes et bibentes quae apud illos sunt.

⁹ Epist. II. Cor. 11, 27: In frigore et nuditate.

¹⁰ Matth. 11, 8; Luc. 7, 25. — Superius Vat. et ed. 1 *contegeremur* pro *contingeremur*.

casulis pauperum, sed in *palatiis principum*, inxta Veritatis verbum¹ vestimentorum dicebat requirendam esse mollitiem. Experientia enim certa didicerat, daemones asperitate terreri, deliciosis autem et mollibus ad tentandum fortius animari. — Unde cum nocte quadam propter infirmitatem capitis et oculorum praeter solitum morem cervical de pluma positum haberet ad caput, daemon in illud ingressus, ipsum usque ad horam matutinalem inquietatum multimode a sanctae orationis studio perturbavit, donec, vocato socio, pulvinar cum daemonio fecit extra cellulam longius exportari. Egressus autem cum pulvinari Frater de cella, membrorum omnium vires amisit et usum, quousque ad vocem sancti Patris hoc cognoscentis in spiritu vigor pristinus cordis et corporis sibi fuit plenarie restitutus.

3. Rigidus in disciplina super *custodiam suam stabat*², curam permaximam gerens de utriusque hominis puritate servanda; quapropter circa conversionis suae primordia tempore hiemali in foveam glacie plenam se ipsum plerumque mergebat, ut et domesticum sibi hostem perfecte subigeret et candidum vestimentum pudoris a voluptatis incendio praeservaret. Tolerabilius viro spirituali fore incomparabiliter asserebat magnum sustinere frigus in carne, quam ardorem carnalis libidinis vel modicum sentire in mente.

4. Cum autem apud eremum de Sarthiano³ nocte quadam orationi vacaret in cellula, vocavit eum hostis antiquus, tertio dicens: «Francisce, Francisce, Francisce». Cui cum, quid quaereret, respondisset; fallaciter ille subiunxit: «Nullus est in mundo peccator, cui, si conversus fuerit, non indulgeat Deus. Sed quicumque semetipsum poenitentia dura necaverit misericordiam non inveniet in aeternum». Statim vir Dei per revelationem cognovit hostis fallaciam, quomodo nissus fuerit eum ad tepida revocare. Nam hoc sequens indicavit eventus. Continuo enim post hoc ad insufflationem illius, *cuius halitus prunas ardere facit*⁴, gravis ipsum carnis tentatio apprehendit. Quam ut praesensit castitatis amator, deposita veste, chorda coepit se verberare fortissime: «Eia, inquit, frater asine, sic te decet manere, sic subire flagellum. Tunica Religioni deservit, sanctitatis signaculum praefert, furari eam libidinoso non licet; si quo vis pergere, perge». Insuper et mirando fervore spiritus animatus, aperta cella, foras exivit in hortum, et in magnam demergens nivem

corpusculum iam nudatum, septem ex ea plenis manibus coepit compingere massas, quas sibi proponens, suo sic exteriori homini loquebatur: «Ecce, inquit, haec maior uxor tua est, quatuor istae duo filii et duae filiae, reliquae duae servus et ancilla, quos ad serviendum habere oportet. Festina igitur omnes induere, quoniam frigore moriuntur. Si vero eorum multiplex sollicitudo molestat, uni Domino sollicite servi». Illico tentator victus abscessit, et vir sanctus in cellam cum victoria rediit, quia, dum bene poenaliter alsit⁵ foris, ardorem interioris sic exstinxit libidinis, ut deinceps tale aliquid minime sentiret. Quidam autem Frater, qui tunc orationi vacabat, haec omnia, luna clarius incedente, prospexit. Comperto vir Dei, quod haec ille nocte vidisset, reserans ei tentationis processum, praecepit, ut, quamdiu ipse viveret, nulli viventi rem, quam viderat, propalaret.

5. Non solum autem mortificari debere docebat vitia carnis et eius incentiva frenari, verum etiam exteriores sensus, per quos *mors intrat* ad animam⁶, summa vigilantia custodiri. Mulierum familiaritates, colloquia et aspectus, quae multis occasio sunt ruinae, sollicitius evitari iubebat, asserens, per huiusmodi debilem frangi et fortem saepe spiritum infirmari. Harum contagionem evadere conversantem cum eis, nisi probatissimum virum, tam facile dixit, quam iuxta Scripturam⁷ *in igne ambulare et non comburere plantas*. Siquidem ipse adeo averterat oculos suos, ne huiusmodi vanitatem viderent, quod, sicut aliquando socio dixit, quasi nullam recognoscebat in facie. Non enim securum esse putabat, earum formarum introrsus haurire imagines, quae possunt aut edomitae carnis resuscitare igniculum, aut pudicae mentis maculare nitorem. Asserebat etiam, frivolum esse mulieris colloquium, excepta sola confessione vel instructione brevissima, iuxta quod et saluti expedit et congruit honestati. «Quae sunt, inquit, Religioso cum muliere tractanda negotia, nisi cum sanctam poenitentiam vel melioris vitae consilium religiosa petitione deponit? Ex nimia securitate minus cavetur hostis, et diabolus, si de suo capillum potest habere in homine, cito excrescere facit in trabem».

6. Otium autem omnium malarum cogitationum sentinam docebat summopere fugiendum, exemplo demonstrans, rebellem carnem et pigram disciplinis continuis et fructuosis laboribus esse domandam.

¹ Locis in praecedente nota allegatis: Ecce, qui in mollibus vestiuntur, in domibus regum sunt.

² Isai. 21, 8: Super custodiam meam ego sum, stans totis noctibus. Hab. 2, 4: Super custodiam meam stabo. Cfr. Wadding, loc. cit., ad an. 1210, n. 52. — Inferius pro *subiugeret* (ita A B C D E F G I M et Acta SS.) Vat. et ed. 1 *subiiceret*.

³ Civitati Clusii (Chiusi) in Tuscia vicino. Cfr. Wadding, loc. cit., ad an. 1212, n. 1. seqq. Plures codd. *Sarchiano*.

⁴ Job 41, 12.

⁵ Ita A; Vat. et ed. 1 *alxit*; Acta SS. *arsil*.

⁶ Ier. 9, 21: Quia ascendit mors per fenestras nostras, ingressa est domos nostras etc. Cfr. Wadding, loc. cit., ad an. 1210, n. 52.

⁷ Prov. 6, 27. seq.: Nunquid potest homo abscondere ignem in sinu suo, ut vestimenta illius non ardeant? Aut ambulare super prunas, ut non comburantur plantae eius? — Subinde respicitur Ps. 118, 37: Averte oculos meos, ne videant vanitatem.

Verba
ipsius.

Unde corpus suum¹ fratrem asinum appellabat, tanquam laboriosis supponendum oneribus, crebris caedendum flagellis et vili pabulo sustentandum. Si quem vero cernebat otiosum et vagum aliorum velle manducare labores, fratrem muscam nominandum censebat, eo quod talis nihil boni faciens, sed benefacta inficiens, vilem et abominabilem se omnibus reddat. Propter quod dixit aliquando: « Volo, Fratres meos laborare et exercitari, ne otio dediti, per illicita corde aut lingua vagentur² ». — Evangelicum siquidem volebat a Fratribus observari silentium, ut videlicet ab omni otioso verbo omni tempore abstergerent sollicite, tanquam reddituri *in die iudicii de huiusmodi rationem*³. Sed et si quem invenisset Fratrem verbis assuetum inanibus, acriter arguebat; taciturnitatem modestam et puri cordis affirmans custodiam et non modicam esse virtutem, pro eo quod *mors et vita* fore dicuntur⁴ *in manibus linguae*, non tam ratione gustus quam ratione loquelae.

De silentio.

Discretio
ipsius.

Exemplum.

7. Licet autem pro viribus ad vitam austeram Frates induceret, non tamen ei placebat districtio- nis severitas, quae pietatis non induit viscera⁵ nec est discretionis sale condita. Cum enim quadam nocte unus ex Fratribus prae nimietate abstinentiae admodum fame cruciatus, nullam posset habere quietem, intelligeretque pius pastor, ovi suae imminere periculum, vocavit Fratrem, apposuit panem, et ut ruborem illi tolleret, coepit ipse prior comedere eumque ad manducandum dulciter invitare. Deposuit Frater verecundiam, sumpsit cibum, gavisus quam plurimum, quod per circumspectam condensationem pastoris et corporis evasisset dispendium et non modicum accepisset aedificationis exemplum. Mane facto, Fratribus convocatis in unum, vir Dei referens quod acciderat nocte, provida commonitione subiunxit: « Sit vobis, Fratres, non cibus, sed caritas in exemplum ». Docuit insuper eos discretionem sequi ut aurigam virtutum⁶, non eam, quam caro suadet, sed quam edocuit Christus, cuius sacratissimam vitam expressum constat esse perfectionis exemplar.

Notandum.

8. Et quoniam Agnum sine macula crucifixum non est possibile homini carnis infirmitate circum-

dato sic perfecte sectari, quin⁷ aliquas contrahat sordes; ideo documento certo firmabat, eos qui perfectioni vitae invigilant, quotidianis debere se lacrymarum emundare fluentis. Licet enim adeptus iam esset cordis et corporis puritatem mirabilem, non cessabat tamen lacrymarum imbribus iugiter oculos expiare mentales, corporeorum luminum non ponderando iacturam. Cum enim ex continuo fletu infirmitatem oculorum incurrisset gravissimam, suadente sibi medico, quod abstergeret a lacrymis, si corporei visus caecitatem vellet effugere; vir sanctus respondit: « Non est, frater medice, ob amorem luminis, quod habemus commune cum muscis, visitatio lucis aeternae repellenda vel modicum, quia non spiritus propter carnem, sed caro propter spiritum beneficium lucis accepit ». Malebat siquidem corporalis visus lumen amittere quam lacrymas, quibus oculus mundatur interior, ut Deum videre valeat, repressa devotione spiritus impedire⁸.

Contri-
lacrym.Dietan-
tabilPatrien-
ustio

9. Cum autem semel daretur consilium a medicis, et instanter suaderetur a Fratribus, ut pateretur sibi per remedium subveniri cocturae⁹, humiliter vir Dei assensit, quia salutiferum hoc simul et asperum esse cernebat. Vocatus itaque venit chirurgicus, instrumentum ferreum igni submittens ad faciendum cocturam. At Christi servus corpus iam horrore concussum confortans, sicut amicum coepit ignem alloqui, dicens: « Mi frater ignis, prae¹⁰ ceteris rebus aemulandi decoris virtuosum, pulcrum et utilem te creavit Altissimus. Esto mihi in hac hora propitiis, esto curialis. Precor magnum Dominum, qui te creavit, ut tuum mihi calorem temperet, quo suaviter urentem valeam sustinere ». Oratione finita, contra igne candescens ferreum instrumentum signum crucis edidit, ac deinceps intrepidus persistebat. Profundatum est crepitans ferrum in tenera carne, et ab aure usque ad supercilium coctura protracta. Quantum irrogaverit ignis ille dolorem, vir ipse sanctus expressit: « Laudate, inquit ad Fratres, Altissimum, quia vere dico vobis, nec ignis ardorem sensi nec carnis ullum dolorem ». Et conversus ad medicum: « Si non est, inquit, caro bene decocta, imprime iterum ». Expertus medicus in invalida carne virtutem spiritus tam potentem miratus est, et divinum

Mirabi-
ctu

¹ Cod. A omittit *suum*.

² Cfr. Wadding., loc. cit., ad an. 1210, n. 49.

³ Matth. 12, 36.

⁴ Prov. 18, 21: Mors et vita in manu linguae; qui diligunt eam comedent fructus eius.

⁵ Col. 3, 12: Induite ergo vos sicut electi Dei, sancti et dilecti, viscera misericordiae, benignitatem etc.

⁶ Bernard., Serm. 49. in Cant. n. 5: Discretio quippe omni virtuti ordinem ponit; ordo modum tribuit et decorem etiam et perpetuitatem... Est ergo discretio non tam virtus quam quaedam moderatrix et auriga virtutum ordinatrixque affectuum et morum doctrix. Tolle hanc, et virtus vitium erit, ipsaque affectio naturalis in perturbationem magis converte-

tur exterminiumque naturae. Cfr. ibid. Serm. 23. n. 8; Serm. 3. in Circumcisione Domini, n. 11. et II. de Considerat. c. 11. n. 20. Cfr. Wadding., loc. cit., ad an. 1210, n. 47. seq.

⁷ Edd., refragantibus ABCDEFIM et Actis SS., addunt *aliquando*, et inferius pro *invigilant* (ita ABCDEIM et Acta SS.) *G vigilant*, edd. *vigilanter intendunt*, quae etiam seq. propositionem sic incipiunt: *Licet enim tam esset adeptus cordis* etc.

⁸ Cfr. Wadding., loc. cit., ad an. 1225, n. 5.

⁹ Du Cange, Glossarium etc.: *Cocteria*, ustio, quae fit calido ferro... Vox male compacta ex *cauteria*, vel *coctaria*, aut *coctura*; nam eiusmodi inusiones *carnem coquere* dicebantur.

¹⁰ Codd. ABCDEFIM omittunt *prae*.

hoc miraculum extulit dicens: « Dico vobis, Fratres, vidi *mirabilia hodie* ¹ ». Quia enim ad tantam pervenerat puritatem, ut caro spiritui et spiritus Deo harmonia mirabili concordarent, divina ordinatione fiebat, ut *creatura Factori suo deserviens* voluntati et imperio eius mirabiliter subiaceret ².

10. Alio enim tempore, apud eremum sancti Urbani ³ servo Dei aegritudine gravissima laborante, cum ipse naturae defectum sentiens, vini poculum postulasset, nihilque de vino, quod sibi dari posset, responderetur adesse; iussit, aquam afferri et allatam signo crucis edito benedixit. Mox vinum efficitur optimum quod fuerat aqua pura, et quod deserti loci paupertas non potuit viri sancti puritas impetravit. Ad eius gustum tanta protinus facilitate convaluit, ut saporis novitas et innovatio sanitatis, gustabile ac gustantem supernaturaliter innovantes, perfectam in ipso exspoliationem veteris hominis et inductionem novi ⁴ duplici attestazione firmarent.

11. Non solum creatura servo Dei serviebat ad nutum, sed et Creatoris ubique providentia condescendebat ad placitum. Cum enim tempore quodam ⁵, ex multarum infirmitatum concursu aggravato corpore, ad iucunditatem spiritus excitandam alicuius audiendi soni harmonici desiderium habuisset, nec id honestatis decencia per ministerium fieri pateretur humanum; affuit Angelorum obsequium ad viri sancti placitum adimplendum. Nocte etenim quadam vigilante ipso et meditante de Domino, repente insonuit cithara quaedam harmoniae mirabilis et suavissimae melodiae. Non videbatur aliquis, sed trans-

itum et reditum citharoedi ipsa hinc inde auditus volubilitas innuebat. Spiritu in Deum directo, tanta fuit in illo dulcisono carmine suavitate perfruitus, ut aliud se putaret saeculum commutasse. Hoc et Fratres sibi familiares non latuit, qui per certa frequenter conspiciebant indicia, cum tam excessivis et crebris consolationibus a Domino visitari, ut nec ipsas omnino occultare valerent.

12. Alio quoque tempore ⁶ viro Dei praedicationis causa inter Lombardiam et Marchiam Tarvisinam iter agente cum Fratre socio iuxta Padum, tenebrosa noctis supervenit obscuritas. Cumque via esset exposita periculis magnis et multis propter tenebras, fluvium et paludes, dixit socius ad virum sanctum: « Ora, Pater, ut de instantibus periculis liberemur ». Cui vir Dei cum fiducia multa respondit: « *Potens est Deus* ⁷, si placet suae dulcedini, tenebrarum effugata caligine, beneficium nobis impendere lucis ». Vix sermonem compleverat, et ecce, tanta lux illico coepit circa eos superna radiare virtute, ut nocte aliis existente obscura, ipsi luce clara viderent non solum viam, verum etiam plurima circumquaque. Cuius lucis ducatu corporaliter directi et spiritualiter confortati, usque ad locum hospitii per non modicum viae spatium, cum divinis hymnis et laudibus incolumes pervenerunt. — Perpende, quam mirandae ⁸ fuerit vir iste munditiae quantaque virtutis, ad cuius nutum suum ignis ardorem contemperat, aqua saporem commutat, angelica praebet melodia solatium, et lux divina ducatum, ut sic sanctificatis viri sancti sensibus omnis probetur mundi machina deservire.

Tenebrarum illuminatio.

Epilogus.

CAPITULUM VI.

De humilitate et obedientia et de condescensionibus divinis sibi factis ad nutum ⁹.

1. Omnium virtutum custos et decor humilitas ¹⁰ copiosa virum Dei ubertate repleverat. In propria quidem reputatione nihil erat nisi peccator, cum in veritate speculum esset et splendor omnimodae sanctitatis. Super hanc studuit aedificare se ipsum, ut *sapiens architectus fundamentum praeiaciens* ¹¹,

quod a Christo didicerat. Dicebat, propter hoc Filium Dei de altitudine sinus paterni ad nostra despicabilia descendisse, ut tam exemplo quam verbo Dominus et Magister humilitatem doceret. Propter quod studebat tanquam Christi discipulus in oculis suis et aliorum vilesce, a summo dictum esse Magistro

¹ Luc. 5, 26, sanatione paralytico peracta, omnes dicebant: Quia vidimus mirabilia hodie. — Inferius pro *pervenerat* (ita AGIM) edd. *devenerat*, quae etiam substituit *Creatori pro Factori*. Locus Scripturae est Sap. 16, 24.

² Cfr. Wadding., loc. cit., ad an. 1225, n. 3, ex quo patet, hoc factum esse in creta Fontis Columbae, de quo supra pag. 516, nota 1.

³ In comitatu Narniensi; cfr. Wadding., loc. cit., ad an. 1213, n. 14.

⁴ Col. 3, 9: Exspoliantes vos veterem hominem cum actibus suis, et induentes novum etc.

⁵ Anno 1225, in civitate Rieti (Rieti) in domo civis Thedaldi Saraceni, ut vult Wadding., loc. cit., ad an. 1225,

n. 2. — Inferius pro *harmonici* (ita AGKM) edd. *harmoniaci*.

⁶ Anno 1213, ut refert Wadding., loc. cit., ad an. 1213, n. 57. — Pro *Tarvisinam* AM et Acta SS. *Tervisinam*, BDE *Trevisanum*, F *Trivisanum*, edd. *Tervisanum*.

⁷ Luc. 3, 8. — Infra pro *aliis* multi codd. *alias*.

⁸ Edd., refragantibus ABCDEFGIM *Perpende, quantae*.

⁹ Cfr. Thom. a Celano, Vita II. p. III. c. 50. 62. 73. 74. 79. 81. 83. 85. 88. 89. 91.

¹⁰ Bernard., Serm. 4. in Nativ. Domini, n. 1: Studete humilitati, quae fundamentum est custosque virtutum.

¹¹ Epist. I. Cor. 3, 10. Cfr. Wadding., loc. cit., ad an. 1210, n. 57.

Dictum n-
tabile.

commemorans ¹: *Quod altum est apud homines abominatio est apud Deum*. Sed et verbum hoc dicere solitus erat: « Quantum homo est in oculis Dei, tantum est et non plus ». Stultum proinde iudicans mundanis extolli favoribus, gaudebat de opprobriis et de laudibus tristabatur. Malebat quidem de se vituperium audire quam laudem, sciens, quod hoc ad se ² emendandum induceret, illa vero impelleret ad cadendum. Et ideo saepe cum populi merita in eo sanctitatis extollerent, praecipiebat alicui Fratri, ut in contrarium verba ipsum vilificantia suis auribus inculcando proferret. Cumque Frater ille, licet invitus, eum rusticum et mercenarium imperitum et inutilem diceret; exhilaratus tam mente quam facie respondebat: « Benedicat tibi Dominus, fili carissime, quia tu verissima loqueris, et talia filium Petri Bernardonis decet audire ».

Item, fa-
ctum.Aliud factum
stipendum.

2. Ut autem se ceteris despicabilem redderet, non parcebat rubori, quin in praedicatione coram omni populo proprios manifestaret defectus. Accidit semel ³, ut infirmitate gravatus, rigorem abstinentiae pro recuperanda sanitate modicum relaxasset. Viribus autem corporis utcumque resumtis, verus sui contemptor ad propriae carnis animatus opprobrium: « Non est, inquit, conveniens, ut populus abstinentem me credat, et ego e contrario carnaliter reficiam in occulto ». Surrexit propterea sanctae humilitatis spiritu inflammatus, et in platea civitatis Assisii populo convocato, solemniter cum Fratribus multis, quos secum adduxerat, maiorem introivit ecclesiam, funeque ad collum ligato, nudum cum femoralibus solis in oculis omnium se trahi praecepit usque ad lapidem, in quo malefactores puniendi consueverant collocari. Super quem conscendens, licet quartanarius ⁴ esset et debilis, acerbis frigoris tempore cum multo vigore animi praedicavit, audientibusque cunctis, asseruit, se non tanquam spirituales honorandum fore, quin immo tanquam carnalem et glutonem ab omnibus contemnendum. Igitur qui convenerant, tam ingenti viso spectaculo, admirati sunt, et quia ipsius austeritatem iam noverant, devoto corde compuncti, humilitatem huiusmodi magis admirabilem quam imitabilem proclamabant. Licet autem id magis videatur portentum fuisse instar prophetalis vaticinii ⁵ quam exemplum, tamen vere documentum exstitit humilitatis perfectae, quo Christi sectator in-

Notandum.

struitur transitoriae laudis praeconium debere contemnere, tumentis quoque iactantiae comprimere fastum et fraudulentae simulationis mendacium confutare.

3. Multa quidem in hunc modum saepius faciebat, ut exterius *tanquam vas perditum* fieret ⁶ et sanctificationis spiritum interius possideret. Studebat bona Domini sui arcano pectoris condere, nolens patere gloriae quod posset occasio esse ruinae. Nam saepe cum beatificaretur a pluribus, verbum huiusmodi proferebat: « Filios et filias adhuc habere possem, nolite laudare securum. Nemo laudandus, cuius incertus est exitus ⁷ ». Ista quidem laudantibus, ad se autem sic: « Latroni si tanta contulisset Altissimus, gravior te foret, Francisce ». Dicebat Fratribus saepe: « De omni eo quod peccator potest, nemo sibi debet iniquo applausu blandiri. Peccator, ait, ieiunare potest, orare, plangere carnemque propriam maccare; hoc solum non potest, Domino scilicet suo esse fidelis. In hoc itaque gloriandum, si suam Domino gloriam reddimus, si fideliter servientes, ipsi quidquid donat, ascribimus ».

4. Ut autem pluribus modis negotiator hic evangelicus lucraretur ac totum praesens tempus conflaret in meritum, non tam praeesse voluit quam subesse, nec tam praecipere quam parere. Idcirco generali cedens officio, Guardianum petiit, cuius voluntati per omnia subiaceret ⁸. Tam enim uberem assebat sanctae obedientiae fructum, ut eis qui iugo ipsius colla submitterent, nil temporis sine lucro transiret; unde et Fratri, cum quo erat solitus ire, semper obedientiam promittere consueverat et servare. Dixit aliquando sociis: « Inter alia, quae dignanter pietas mihi divina concessit, hanc gratiam contulit, quod ita diligenter novitio unius horae obedirem, si mihi Guardianus daretur, sicut antiquissimo et discretissimo Fratri ⁹. Subditus, inquit, praelatum suum non hominem considerare debet, sed illum, pro cuius est amore subiectus. Quanto enim contemptibilior praesidet, tanto magis humilitas obedientis placet ». — Cum vero vice quadam quaereretur ab eo, quis esset vere obediens iudicandus, corporis mortui similitudinem pro exemplo proposuit. « Tolle, inquit, corpus exanime, et ubi placuerit, pone. Videbis non repugnare motum, non murmurare situm, non reclamare dimissum. Quod

¹ Luc. 16, 15: Quod hominibus altum est abominatio est ante Deum.

² Fide A G I M addidimus *se*, et inferius ex A supplevimus *vero*. In seq. propositione Vat. et ed. I omittunt *imperitum*.

³ Ut refert Wadding., loc. cit., ad an. 1212, n. 53. — Inferius pro *relaxasset* edd. *relaxaret*.

⁴ Du Cange, Glossarium etc.: « *Quartanarius*, quartana febris laborans ». Secundum ipsum *Gluto* (*Glutto*) idem est ac ambro, devorator, profusus, luxuriosus etc.

⁵ Isai. 20, 3: Sicut ambulavit servus meus Isaias nudus et discalceatus, trium annorum signum et portentum erit super Aegyptum etc. — Superius pro *devoto corde compuncti* edd. *devotione compuncti*.

⁶ Psalm. 30, 13: Factus sum tanquam vas perditum.

⁷ Eccli. 11, 30: Ante mortem ne laudes hominem quemquam etc. Cfr. Wadding., loc. cit., ad an. 1212, n. 7.

⁸ Concessus est ei a Fr. Elia in Guardianum Angelus Reatinus (Angelus Tancredi de Reate), unus trium Sociorum, qui vitam Francisci scripserunt. Cfr. Wadding., loc. cit., ad an. 1221, n. 27. — Superius pro *generali* Vat. *Generalis*.

⁹ Similiter in Testamento suo dicit: Et firmiter volo obedire Ministro Generali huius Fraternalitatis et illi Guardiani, quem sibi placuerit mihi dare etc. — Inferius pro *Quanto enim* A G I M *Quanto autem*, et pro *vere obediens* (ita A G I M) edd. *verus obediens*.

si statuatur in cathedra, non alta, sed ima respiciet. Si collocetur in purpura, duplo pallescet. Hic, ait, verus obediens est, qui, cur¹ moveatur, non diiudicat; ubi locetur, non curat; ut transmutetur, non instat; euectus ad officium, solitam tenet humilitatem; plus honoratus, plus reputat se indignum».

5. Dixit aliquando socio suo: «Non mihi videor Frater Minor, nisi fuero in statu, quem tibi descripsero. Ecce, praelatus existens Fratrum, vado ad Capitulum, praedico et commoneo Fratres, et in fine dicitur contra me: «Non convenis nobis, quia illitteratus es², elinguis, idiota et simplex³; tandem elicior cum opprobrio, vilipensus ab omnibus. Dico tibi, nisi eodem vultu, eadem mentis laetitia et eodem sanctitatis proposito haec verba andiero, Frater Minor nequaquam sum». Et addebat: «In praelatione casus, in laude praecipitum, in humilitate subditi animae lucrum est. Cur ergo periculis plus quam lucris attendimus, cum acceperimus tempus ad lucrum»? — Hac igitur de causa humilitatis forma Franciscus Fratres suos voluit vocari *Minores*⁴, et praelatos sui Ordinis dici *ministros*, ut et verbis interetur Evangelii, quod observare promiserat, et ex ipso nomine discerent discipuli eius, quod ad discendam humilitatem ad scholas humilis Christi venissent. Magister siquidem humilitatis Christus lesus, ut informaret discipulos ad humilitatem perfectam, dixit⁵: *Quicumque voluerit inter vos maior fieri, sit vester minister, et quicumque voluerit inter vos primus esse, erit vester servus*. — Cum autem requireret ab eo dominus Ostiensis, Ordinis Minorum Fratrum protector et promotor praecipuus, qui postmodum, iuxta quod idem vir sanctus praedixerat⁶, ad summum pontificatus sublimatus honorem, Gregorius nonus est dictus, utrum sibi placeret, quod Fratres sui promoverentur ad ecclesiasticas dignitates; respondit: «Domine, *minores* ideo vocati sunt Fratres mei, ut maiores fieri non praesumant. Si vultis, ait, ut fructum faciant in Ecclesia Dei, tenete illos et conservate in statu vocationis eorum, et ad praelationes ecclesiasticas nullatenus ascendere permittatis».

6. Et quoniam humilitatem tam in se quam in subditis cunctis praeferebat honoribus, amator humilium Dens⁷ altioribus ipsum dignum iudicabat fastigiis, secundum quod uni Fratri, viro virtutis et devotionis praecipuae, visio caelitus ostensa monstravit. Cum enim esset in comitatu viri Dei et una cum

ipso in quadam ecclesia deserta ferventi oraret affectu, in ecstasi factus, vidit inter multas in caelo sedes unam ceteris digniorem, pretiosis ornatam lapidibus et omni gloria refulgentem. Miratus intra se praecelsi refulgentiam throni, anxia coepit cogitatione perquirere, quis ad illum deberet assumi. Audivit inter haec vocem dicentem sibi: «Sedes ista unius de ruentibus⁸ fuit et nunc humili servatur Francisco». Reversus demum Frater ad se ab orationis excessu, virum beatum exterius prodeuntem solito fuit more secutus. Cumque incedentes per viam, de Deo invicem loquerentur, Frater ille, visionis suae non immemor, solerter ab eo quaesivit, quid de se ipso sentiret. Ad quem humilis⁹ Christi servus: «Videor, ait, mihi maximus peccatorum». Cui cum Frater diceret ex adverso, quod hoc nec posset sana conscientia dicere nec sentire, subiunxit: «Si quantumcumque sceleratum hominem tanta fuisset Christus misericordia prosecutus, arbitror sane, quod multo quam ego Deo gravior esset». Confirmatus fuit Frater ex tam admirabilis humilitatis auditu de veritate visionis ostensae, Evangelio sacro testante¹⁰ cognoscens, quod ad excellentiam gloriae, de qua superbus eiecitur, vere humilis exaltetur.

7. Alio quoque tempore, cum in deserta quadam oraret ecclesia in provincia Massae apud montem Casalem¹⁰; intellexit per spiritum, sacras ibidem remansisse reliquias. Quas cum longo iam tempore defraudatas honorificentia debita non sine moerore conspiceret, praecepit Fratribus, ut ea cum reverentia deferrent ad locum. Sed cum, poscente causa, discessisset ab eis, mandati Patris immemores filii obedientiae meritum neglexerunt. Die vero quadam, cum sacra celebrare vellent mysteria, superiori altaris operimento submoto, ossa pulcherrima et redolentia nimis non sine admiratione reperiunt, intuentes reliquias, quas non hominis manus, sed Dei virtus attulerat. Reversus paulo post, vir Deo devotus diligenter coepit exquirere, si quod de reliquiis mandaverat esset impletum. Verum neglectae obedientiae culpam Fratres confitentes humiliter, cum poena veniam meruerunt. Et ait vir sanctus: «Benedictus Dominus Dens meus, qui per se ipsum implevit quod vos facere debuistis». Considera diligenter divinae providentiae curam circa pulverem nostrum, et humilis Francisci excellentem in oculis Dei pendente virtutem. Nam cuius iussis non paruit homo, votis obediit Dens.

¹ Codd. B D E cum.

² Cod. A omittit es. Inferius pro *animae* Vat. *animi*.

³ Matth. 23, 45: Quamdiu non fecistis uni de minoribus his, nec mihi fecistis; cfr. ibid. v. 40.

⁴ Matth. 20, 26. seq. Cfr. Wadding., loc. cit., ad an. 1210, n. 57.

⁵ Cfr. Wadding., loc. cit., ad an. 1217, n. 10; idem ad an. 1219, n. 1. responsum Francisci datum Hugolino cardinali et primo protectori Ordinis refert. — Pro *ad summum* ed. 1 et Vat. cum pluribus codd. *ad summum*.

⁶ Psalm. 137, 6: Quoniam excelsus Dominus et humilia respicit etc. — Frater, cui visio ista ostensa fuit, erat Pacificus; cfr. Wadding., loc. cit., ad an. 1212, n. 40. — Inferius vocibus *unam ceteris* Vat. et ed. 1 interserunt *prae*.

⁷ Id est angelis cadentibus.

⁸ Vat. cum ed. 1 *humiliter* et infra *non posset* pro *nec posset*.

⁹ Matth. 23, 12: Qui autem se exaltaverit humiliabitur; et qui se humiliaverit exaltabitur.

¹⁰ Supra Burgum sancti Sepulchri, ut notat Wadding., loc. cit., ad an. 1215, n. 17. Cod. B *Quasalem*.

Episcopus
Imolae hu-
militate vi-
ctus.

8. Quodam tempore¹ deveniens Imolam, civitatis episcopum adiit humiliterque poposcit, ut cum ipsius beneplacito posset populum ad praedicationem vocare. Cui episcopus dure respondens: « Sufficit, inquit, Frater, quod ego praedicem populo meo ». Inclinauit caput versus humilis, et foras egressus, post modicam horam regreditur intro. A quo cum episcopus quasi turbatus requireret, quid iterato petere vellet; humili tam corde quam voce respondit: « Domine, si pater filium uno pepulerit² ostio, alio sibi reintrandum est ». Humilitate victus, episcopus alacri vultu eum amplexus est, dicens: « Tu et omnes Fratres tui de cetero in episcopatu meo generali mea licentia praedicetis, quia illud humilitas sancta promeruit ».

Fugantur
daemones de
Aretio.

9. Contigit, ipsum aliquando Aretium devenire, cum tota civitas intestino bello quassata propinquum sui minabatur excidium³. Hospitatus vero in suburbio, vidit supra civitatem exsultantes daemones ac perturbatos cives ad caedem mutuam succedentes. Ut autem seditiosas illas effugaret aëreas potestates, Fratrem Silvestrum, columbinae simplicitatis virum, quasi praeconem praemisit, dicens: « Vade ante portam civitatis et ex parte Dei omnipotentis daemonibus in virtute obedientiae praecipe, ut exeant festinanter ». Accelerat versus obediens Patris iussa perficere, et praecoccupans in laudibus faciem Domini⁴, ante portam civitatis coepit clamare valenter: « Ex parte omnipotentis Dei et iussu servi eius Francisci procul hinc discedite, daemones universi ». Redit ad pacem continuo civitas et civilitatis⁵ in se iura cives omnes cum magna tranquillitate reformant. Expulsa quippe daemonum furibunda superbia, quae civitatem illa velut obsidione vallaverat, superveniens sapientia pauperis, videlicet Francisci humilitas, pacem reddidit urbemque salvavit. Humilis enim obedientiae ardua promerente virtute, super spiritus illos rebelles atque protervos tam potestativum fuerat assecutus imperium, ut et ipsorum feroces protervias premeret et importunas violentias propulsaret.

Moram apud
cardinalem
non conti-
nuat.

10. Fugiant quidem superbi daemones excelsas virtutes humilium, nisi cum interdum ad humilitatis custodiam divina eos clementia colaphizari permittit, sicut et Paulus Apostolus de se ipso scribit⁶, et Franciscus experimento probavit. Rogatus enim a domino Leone cardinali sanctae Crucis, ut secum aliquantulum

moraretur in Urbe, acquievit humiliter ob ipsius reverentiam et amorem. Prima igitur nocte, cum post orationem vellet quiescere, supervenerunt daemones in Christi militem atrociter insurgentes; quem cum diu verberassent ac dure, ad ultimum quasi seminecem reliquerunt. Discedentibus illis, socius vocatus advenit, cui cum vir Dei rei narrasset eventum, subiungens ait: « Credo, Frater, quod daemones, qui nihil possunt, nisi quantum providentia superna disponit, ideo in me nunc tam ferociter irruerunt, quia non bonam speciem⁷ praeferunt mansio mea in curia magnatorum. Fratres mei, qui in locis pauperculis commorantur, audientes, me cum cardinalibus esse, suspicabuntur forsitan implicari mundanis, efferri honoribus et deliciis abundare. Ideo melius iudico, eum qui ponitur in exemplum, fugere curias et humiliter inter humiles in locis conversari humilibus, ut sustinentes penuriam fortes efficiat similia sustinendo ». Veniunt ergo mane, et humili excusatione proposita⁸, vale faciunt cardinali.

11. Abhorrebat nempe vir sanctus superbiam, omnium malorum originem, et inobedientiam, ipsius pessimam prolem, sed non minus humilitatem poenitentiae acceptabat. Accidit semel, ut eidem praesentaretur quidam Frater, qui contra legem obedientiae aliquid fecerat, disciplina iustitiae corrigendus. Videns autem vir Dei, Fratrem illum per signa evidentia veraciter esse compunctum, ad indulgendum ei amore fuit humilitatis inductus. Ne tamen facilitas veniae incentivum esset aliis delinquendi, iussit, ablatum Fratri caputium in medio⁹ flammaram proiici, ut omnes adverterent, quanta qualique vindicta offensa sit inobedientiae percellenda. Cumque per moram caputium fuisset in medio ignis, praeccepit, ipsum flammis detrahi reddique Fratri humiliter poenitenti. Mirabile dictu! Extrahitur caputium de medio flammaram, nullum habens adustionis vestigium. Sicque factum est, ut hoc uno Deus miraculo et sancti viri virtutem et humilitatem poenitentiae commendaret¹⁰. — Digne itaque sectanda est Francisci humilitas, quae tam miram in terris etiam dignitatem obtinuit, ut Deum inclinaret ad votum et hominis immutaret affectum, daemonum protervitatem suo iussu¹¹ propelleret et flammaram voracitatem solo nutu refricaret. Re vera haec est, quae possessores suos exaltans; dum omnibus reverentiam exhibet, ab omnibus promeretur honorem.

Hom. at
poen. n.
accept.

Epilo.

¹ Wadding., loc. cit., hoc refert ad an. 1213, n. 56.

² Cod. F *compulerit*, Vat. et ed. 1 *repulerit*. Inferius pro *amplexus* G1 et Acta SS. *amplexatus*.

³ Wadding., loc. cit., ad an. 1211, n. 14. — Inferius pro *succedentes* M *succedentes*.

⁴ Psalm. 94, 2: *Praecoccupemus faciem eius in confessione* etc.

⁵ Cod. 1 *civilitatis*; Acta SS. omittunt *civilitatis*. Inferius pro *quae civitatem illa velut obsidione* (ita A) edd. cum aliis codd. *quae civitatem illam velut obsidione*.

⁶ Epist. II. Cor. 12, 7: *Datus est mihi stimulus carnis meae angelus satanae, qui me colaphizet*. — De seq. facto cfr. Wadding., loc. cit., ad an. 1223, n. 18.

⁷ Edd. *spem*. Inferius pro *magnatorum* Acta SS. *magnatum*.

⁸ Codd. 1 KM addunt *et recitatis omnibus*.

⁹ Codd. G1M *in medium*. Pro *caputium* Acta SS. hic et infra *capitium*.

¹⁰ Cfr. Wadding., loc. cit., ad an. 1218, n. 6.

¹¹ Codd. 1M *solo iussu*.

CAPITULUM VII.

De amore paupertatis et mira suppletionem defectuum¹.

1. Inter cetera charismatum dona, quae a largo Datore Franciscus obtinuit, praerogativa quadam speciali promeruit in *divitiis simplicitatis*² excrescere per altissimae paupertatis amorem. Hanc Filio Dei vir sanctus familiarem attendens et iam quasi toto orbe repulsam, *caritate* sic studuit desponsare *perpetua*, quod non solum pro ea patrem matremque reliquit, verum etiam quae habere potuit universa dispersit. Nemo tam auri quam ipse cupidus paupertatis, nec thesauri custodiendi sollicitior ullus quam iste huius evangelicae margaritae³. In hoc praecipue suis offendeatur aspectus, si quidquam videret in Fratribus, quod paupertati non per omnia consonaret. Re vera ipse a principio Religionis usque ad mortem tunica, chordula et femoralibus dives, iis contentus fuit. — Christi Iesu paupertatem et Matris frequentem cum lacrymis revocabat ad mentem; inde hanc virtutum asserens esse reginam, quia in *Rege regum*⁴ et in regina Matre ipsius tam praestanter effulsit. Nam et Fratribus in conclavi quaerentibus, quae virtus magis amicum redderet Christo, quasi secretum sui cordis aperiens, respondebat: « Paupertatem noveritis, Fratres, specialem viam esse salutis tanquam humilitatis fomentum perfectionisque radicem, cuius est fructus multiplex, sed occultus. Haec enim est evangelici *agri thesaurus absconditus*, pro qua emendo vendenda sunt omnia⁵, et quae vendi non possunt illius comparatione spernenda ».

2. « Ad huius, inquit, culmen qui cupit attingere non solum mundanae prudentiae, verum etiam litterarum peritiae renuntiare quodam modo debet, ut, tali expropriatus possessione, *introeat in potentias Domini*⁶ et nudum se offerat brachiis Crucifixi. Nequaquam enim saeculo perfecte renuntiat qui proprii sensus loculos intra cordis arcana reservat ». Saepe vero de paupertate sermonem faciens, ingerebat Fratribus evangelicum illud⁷: *Vulpes foveas*

habent, et volucres caeli nidos, Filius autem hominis non habet, ubi caput suum reclinet. Propter quod docebat Fratres, ut pauperum more pauperculas casas erigerent, quas non inhabitarent ut proprias, sed sicut peregrini et advenae alienas. Leges namque peregrinorum esse dicebat sub alieno colligi tecto, sitire ad patriam, pacifice pertransire. Mandabat, dirui aliquando domos erectas, aut Fratres exinde amoveri, si aliquid in eis perciperet, quod ratione appropriationis vel sumptuositatis contrarium esset evangelicae paupertati⁸. Hanc sui dicebat Ordinis fundamentum, cui substrato primarie sic omnis structura Religionis innititur, ut ipsius firmitate firmetur et eversione funditus evertatur.

3. Docebat proinde, sicut revelatione didicerat, sacrae Religionis ingressum ab illo fore inchoandum evangelico verbo⁹: *Si vis perfectus esse, vade, vende omnia, quae habes, et da pauperibus*; ideoque nonnisi expropriatos et nihil penitus retinentes admittebat ad Ordinem, tum propter verbum sancti Evangelii, tum etiam ne forent in scandalum oculi reservati. Unde in Marchia Anconitana¹⁰ cuidam petenti ad Ordinem recipi vernus pauperum patriarcha respondit: « Si vis Christi pauperibus inungi, mundi pauperibus tua distribue ». Quo audito, perrexit homo, et ductus amore carnali, sua suis reliquit nilque pauperibus. Verum cum haec, illo referente, vir sanctus audisset; dura eum increpatione feriens, dixit: « Vade viam tuam, frater musca, quoniam nondum *existi de domo et cognatione tua*¹¹. Consanguineis tuis tua dedisti et defraudasti pauperes, dignus non es pauperibus sanctis. Incepisti a carne, ruinosum fundamentum spiritali fabricae collocasti ». Rediit animalis homo¹² ad suos et repetiit sua, quae pauperibus relinquere nolens, virtutis propositum citius dereliquit.

4. Alio quoque tempore, cum in loco sanctae Mariae de Portinnula tanta esset inopia, quod non

Factum notabile.

Circa ingredienti Ordinem.

Frater musca.

Urgente inopia, paupertatem tenet.

¹ Cfr. Thom. a Celano, Vita I. p. I. c. 15. et 20; Vita II. part. II. c. 13. et p. III. c. 1. 13. 14. 17. 18. 20. 21. 26. 37.

² Cfr. II. Cor. 8, 2.

³ Matth. 13, 45. seq. assimilatur regnum caelorum « negotiatori, quaerenti bonas margaritas ». — Inferius vocibus *iis contentus* I K M interserunt *plene*.

⁴ Epist. I. Tim. 6, 15: Rex regum et Dominus dominantium. — Cfr. Wadding., loc. cit., ad an. 1210, n. 50.

⁵ Matth. 13, 44. — Superius pro *perfectionisque* Vat. cum ed. I *projectionisque*.

⁶ Psalm. 70, 15. seq.: Quoniam non cognovi litteraturam, introibo in potentias Domini. — Quod *nudus* Christum sequi debeat, insinuat Hieron. supra pag. 509, nota 2. allegatus.

⁷ Matth. 8, 20. — Inferius pro *pauperculas casus* edd. *pauperculas casulas*.

⁸ Cfr. Testamentum S. Francisci et Wadding., loc. cit., ad an. 1220, n. 15. seq.

⁹ Matth. 19, 21.

¹⁰ Cfr. Wadding., loc. cit., ad an. 1219, n. 54. — Inferius edd. omittunt *mundi*.

¹¹ Gen. 12, 1: Egredere de terra tua et de cognatione tua et de domo patris tui etc. Gal. 3, 3: Sic stulti estis, ut, cum spiritu coeperitis, nunc carne consummemini? — Inferius post *dignus non es* B addit *sociari*; Acta SS. legunt *pauperibus sanctis sociari*.

¹² Epist. I. Cor. 2, 14: Animalis autem homo non percipit ea quae sunt Spiritus Dei etc.

posset hospitibus Fratribus supervenientibus secundum necessitatis exigentiam provideri; adiit virum Dei Vicarinus suus¹, allegans penuriam Fratrum et petens, ut intrantium novitiorum res aliquas reservare liceret, ad quas expendendas recurrere possent Fratres tempore opportuno. Ad quem vir superni consilii non ignarus: « Absit, inquit, a nobis, Frater carissime, ut pro quovis homine impie agamus in Regulam. Malo, te altare Virginis gloriosae nudare, cum necessitas id requirit, quam contra paupertatis votum et observantiam Evangelii aliquid vel modicum attentare. Gratius enim habebit Virgo beata, sancti Evangelii perfecte servato consilio, suum altare detegi, quam, altari vestito², Filii sui promissum consilium praetermitti ».

Dictam notabile.

De inventa bursa pecuniae.

5. Transiens autem quodam tempore³ vir Dei cum socio per Apuliam iuxta Barium, invenit in via bursam magnam, quasi plena esset denariis, tumescentem, quam usitato vocabulo *fundam* appellant. Monetur a socio pauper Christi et instanter inducitur, ut bursa tollatur e terra, et pecunia pauperibus erogetur. Renuit homo Dei, commentum affirmans fore diaboli in bursa inventa, et Fratrem non suadere rem meriti, sed peccati, aliena scilicet surripere ac donare. Recedunt de loco, festinant iter perficere coeptum. Sed nondum quiescit Frater vacua pietate delusus, virum Dei molestans, quasi qui de relevanda pauperum penuria non curaret. Acquievit tandem vir mitis redire ad locum, non ut Fratris voluntatem perficeret, sed ut detegeret diabolicam fraudem. Reversus⁴ ergo ad fundam cum Fratre et juvene quodam, qui erat in via, oratione praemissa, iubet socio illam levare. Tremefactus Frater obstupuit, diabolicum iam praesentens monstrum; propter obedientiae tamen sanctae mandatum dubietatem abigens cordis, manum extendit ad bursam. Et ecce, serpens non modicus, de bursa exsilens simulque cum ipsa subito evanescens, diabolicam deceptionem⁵ monstravit. Hostilis itaque versutiae deprehensa fallacia, dixit vir sanctus ad socium: « Pecunia servis Dei, o Frater, nihil aliud est quam diabolus et coluber venenosus ».

Salutatio mira trium mulierum.

6. Accidit post haec quoddam mirabile viro sancto, dum se ad civitatem Senensem, causa exigente, transferret⁶. Tres quidem mulieres pauperculae, statura, aetate ac facie per omnia similes in quadam ei magna plantie inter Campilium et sanctum Quiricum occurrerunt, novum salutationis munusculum offerentes: « Bene veniat, inquit, do-

mina paupertas »! Quo audito, verus paupertatis amator indicibili repletus est gaudio, utpote qui nihil in se salutandum hominibus⁷ tam libenter haberet, quam quod illae decreverant. Subito disparentibus illis, considerantes Fratres socii, tam admirabilem in eis similitudinem, salutationis, occursum et disparentiae novitatem mysticum aliquid designari circa virum sanctum, non irrationabiliter perpenderunt. Sane per illas tres, ut videbatur, mulieres pauperculas sic uniformi facie occurrentes, sic salutantes insolite, sic subito disparentes evangelicae perfectionis formositas, quantum ad castitatem scilicet, obedientiam et paupertatem, satis convenienter ostenditur in viro Dei pari forma perfecte fulsisse, licet gloriari praelegerit in privilegio paupertatis, quam modo *matrem*, modo *sponsam*, modo *dominam* nominare solebat. In hac ceteros cupiebat excedere, qui ex ipsa didicerat inferiorem se omnibus reputare. Si quando igitur⁸ pauperiorem se quempiam secundum exteriorem habitum cerneret, semetipsum protinus arguens excitabat ad simile, tanquam si aemula paupertate concertans, vinci se timeret in illo. — Accidit enim, ut pauperculum quendam obvium haberet in via, cuius cum nuditatem aspiceret, compunctus corde, lamentabili voce dixit ad socium: « Magnam verecundiam intulit nobis huius inopia, quia nos pro magnis divitiis paupertatem elegimus, et ecce, magis relucet in isto ».

Exco- pauperi

Dicta- tabi

Exco- pauperi

7. Propter sanctae paupertatis amorem omnipotentis Dei famulus eleemosynis ostiatim quaesitis utebatur multo libentius quam oblatis. Si quando enim, invitatus a magnis personis, mensis esset profusioribus honorandus; prius per propinquas vicinorum domos panum fragmenta petebat ac deinde, sic ditatus inopia, discumbebatur. Et cum aliquando id fecisset, invitatus a domino Ostiensi, qui pauperem Christi praecipuo complexabatur affectu, conquerenti episcopo, quod suo derogasset honori, utpote qui in eius comesturus hospitio⁹ pro eleemosynis isset; servus Dei respondit: « Magnum, mi domine, vobis honorem exhibui, dum maiorem Dominum honoravi. Siquidem beneplacitum est Domino in paupertate, et ea maxime, quae voluntaria pro Christo mendicita est. Hanc dignitatem regalem, quam pro nobis Dominus Iesus, *egenus factus*, assumpsit, ut sua nos ditaret inopia¹⁰ ac vere pauperes spiritu regni caelorum reges institueret et heredes, nolo relinquere pro feudo divitiarum falsarum vobis ad horam concesso ».

¹ Petrus Cathanii; cfr. Wadding., loc. cit., ad an. 1220, n. 24. — Inferius post *Ad quem vir* edd. addunt *sanctus*.

² Edd. *altari suo ornato*.

³ Vide Wadding., loc. cit. ad an. 1222, n. 16. — Vocibus *cum socio* edd. interserunt *suo*. ⁴ Edd. *Reversus est*.

⁵ Edd. cum aliis codd. (A excepto) addunt *Fratrī*.

⁶ Cfr. Wadding., loc. cit., ad an. 1216, n. 18. seq. — Inferius voci *offerentes* edd. praefigunt *ei*.

⁷ Acta SS. *ab hominibus*.

⁸ Val. et ed. 1 omittunt *igitur*.

⁹ Edd. *domo*.

¹⁰ Epist. II. Cor. 8, 9: Quoniam propter vos egenus factus est [Christus], cum esset dives, ut illius inopia vos divites essetis. — Matth. 5, 3: Beati pauperes spiritu, quoniam ipsorum est regnum caelorum.

8. Nonnunquam Fratres ad petendum eleemosynam hortans, verbis utebatur huiusmodi: « Ite, inquit, quoniam hac novissima hora Fratres Minores commodati sunt mundo, ut electi in eis impleant, unde a Indice commendentur, illud audientes suavissimum verbum ¹: *Quamdiu fecistis uni ex his fratribus meis minimis, mihi fecistis* ». Iucundum proinde dicebat sub Fratrum Minorum titulo mendicare, quem in retributione iustorum evangelicae veritatis Magister ore suo tam signanter expressit. — In festis quoque praecipuis, ubi opportunitas aderat, mendicare solitus erat, dicens, in sanctis pauperibus propheticum illud ² impleri: *Panem Angelorum manducavit homo*. Illum sane panem angelicum esse dicebat, quem pro Dei petito amore, et beatis suggerentibus Angelis, pro ipsius caritate largitum sancta paupertas colligit ostiatim.

9. Unde cum semel die sancto Paschae moram faceret in eremitorio quodam adeo ab hominum habitatione remoto, quod commode mendicare non posset; memor illius qui discipulis euntibus in Emmaus ipso die in specie peregrini apparuit ³, ab ipsis Fratribus eleemosynam petiit ut peregrinus et pauper. Quam cum accepisset humiliter, sacris eos informavit eloquiis, quod transeuntes per mundi desertum tanquam peregrini et advenae verique Hebraei *Pascha Domini*, hoc est transitum *ex hoc mundo ad Patrem* ⁴, in paupertate spiritus continue celebrarent. Et quoniam in petendis eleemosynis non quaestus agebatur cupidine, sed spiritus libertate; Pater pauperum, Deus specialem de ipso curam gerere videbatur.

10. Accidit enim semel ⁵, ut infirmitate gravatus Domini servus in loco Noceriae reduceretur Assisium per solemnes nuntios, ad hoc Assisinatis populi devotione transmissos. Qui Christi famulum deducentes, ad villam quandam devenerunt pauperulam, nomine Sathrianum ⁶, ubi, cum fames et hora cibum ex peterent, euntes et nihil inveniunt venale, vacui redierunt. Ad quos vir sanctus: « Ideo nihil invenistis, quia plus in muscis vestris quam in Deo confiditis » — muscas nempe denarios vocavit — « sed revertimini, ait, per domos, quas circuistis, et amorem Dei offerentes ⁷ pro pretio, humiliter eleemosynam postulate. Nec falsa id aestimatione verecundum putetis aut vile, quoniam universa in eleemosynam

post peccatum dignis et indignis Eleemosynarius ille magnus largiflua pietate concessit ». Deponunt erubescunt milites ⁸, et eleemosynam sponte petentes, plura pro Dei amore quam denariis emunt. Siquidem divino nutu corde compuncti, pauperes incolae non solum sua, sed et se ipsos liberaliter obtulerunt. Sicque factum est, ut inopiam, quam pecunia relevare non poterat, Francisci pauperies opulenta suppleret.

11. Tempore, quo infirmus iacebat in eremitorio prope Reate, medicus quidam opportuno eum frequentabat officio ⁹. Cum autem Christi pauper impotens esset ad rependendam mercedem labori condignam, liberalissimus Deus, ne ipsum sine praesenti remuneratione dimitteret, pium eius obsequium hoc uno beneficio vice pauperis compensavit. Huius enim medici domus, quam tunc temporis ex omni lucro suo de novo construxerat, parietum patula scissione a summo usque deorsum adeo de proximo minabatur ruinam, quod non videbatur per humanae artis industriam possibile ipsius casui obviari ¹⁰. Ipse vero de sancti viri meritis plene confidens, cum magnae fidei devotione petivit a sociis eius, aliquid sibi concedi, quod idem vir Dei manibus contrectasset. Cum igitur modicum de capillis ipsius multa precum obtentum instantia posuisset de sero intra muri scissuram; mane consurgens, tanta invenit aperturam illam soliditate conclusam, ut nec reliquias ibi positas posset extrahere, nec scissurae prioris vestigium aliquid invenire; factumque est, ut, qui ruinoso corpusculo servi Dei sedule ministrarat, ruiturae domus propriae periculo praecaveret.

12. Alio quoque tempore ¹¹ vir Dei ad quandam eremum transferre se volens, ut ibi liberius contemplationi vacaret, quia debilis erat, cuiusdam viri pauperis vectabatur asello. Cumque diebus aestivis famulum Christi sequendo vir ille montana conscenderet, asperioris et longioris viae itinere fatigatus ¹² nimioque sitis ardore deficiens, instanter coepit clamare post Sanctum: « En, morior, inquit, siti, nisi poculi alicuius beneficio continuo refociller ». Absque mora vir Dei prosilivit de asino, et fixis in terra genibus, palmas tetendit in caelum, orare non cessans, donec se intellexit auditum. Oratione tandem finita: « Festina, inquit viro, ad petram et illic aquam vivam invenies, quam tibi hac hora misericorditer

Animus Sancti gratus.

Miraculo potum praebet.

¹ Matth. 25, 40, post quem K addit: *Et post pauca* [v. 43]: *Quamdiu non fecistis uni de minoribus his, nec mihi fecistis*. — Inferius post dicebat K addit *vir sanctus*.

² Psalm. 77, 25.

³ Luc. 24, 15. seqq. — Superius post *Unde cum semel* A addit *secreto*.

⁴ Exod. 12, 11: Est enim Phase, id est transitus Domini. Ioan. 13, 1: Ante diem festum Paschae, sciens Iesus, quia venit hora eius, ut transeat ex hoc mundo ad Patrem etc. Cfr. Wadding., loc. cit., ad an. 1210, n. 46. — Inferius pro *libertate* B *ubertate*.

⁵ Vide Wadding., loc. cit., ad an. 1225; n. 12.

⁶ Ita A B D E F G I M multique codd. non collati; edd. Sa-

thianum (cfr. supra pag. 517, nota 3; Wadd.: in comitatu Assisienti?). Nunc habentur duo *Sathriano*, unum in Calabria-Ulteriore, ubi etiam est quoddam *Nocera* distinctum a Nocera apud Camerino et a Nocera dei Pagani.

⁷ Vat. cum ed. 1 *offerentis*. Inferius pro *in eleemosynam* (ita A M) edd. *in eleemosyna*.

⁸ Qui superius *solemnes nuntii* (viri nobiles) vocantur.

⁹ Cfr. Wadding., loc. cit., ad an. 1225, n. 7. — Inferius pro *hoc uno beneficio* edd. *hoc novo beneficio*.

¹⁰ Edd. *obviare*.

¹¹ Cfr. Wadding., loc. cit., ad an. 1215, n. 12.

¹² Ita A B C D E F G I M, quibus consentit ed. 1, omisso tantum *viae*, Vat. *asperiori et longiori itinere fatigatus*.

Christus de lapide bibendam produxit ». Stupenda Dei dignatio, quae servis suis tam facile se inclinat! Bibit sitiens homo aquam de petra orantis virtute productam et poculum hausit *de saxo durissimo*¹. Aquae decursus ibidem ante non fuit nec, ut est diligenter quaesitum, deinceps potuit inveniri.

Cibos multi-
plicavit.

13. Qualiter autem per merita sui pauperis Christus multiplicaverit cibos in mari, cum suo loco sit inferius² annotandum; hoc tantum commemorasse sufficiat, quod de modica eleemosyna sibi collata nantas a famis et mortis periculo per dies plurimos liberavit, ut ex hoc liquido possit adverti, quod omnipotentis Dei famulus sicut in educatione aquae de

petra conformis exstitit Moysi³, sic in multiplicatione victualium Eliseo. — Procul igitur a pauperibus Christi diffidentia omnis abscedat. Si enim paupertas Francisci adeo copiosae sufficientiae fuit, ut subvenientium sibi defectus tam⁴ mira virtute suppleret, quod nec cibus nec potus nec domus deesset, cum pecuniae et artis et naturae facultas defecerat; multo magis illa merebitur, quae usitato divinae providentiae ordine communiter conceduntur. Si, inquam, petrae siccitas ad pauperis vocem abundans poculum sitiendi propinavit pauperculo, nil iam inter omnia suum denegabit obsequium his qui pro Auctore omnium omnia reliquerunt.

Epilo.

CAPITULUM VIII.

*De pietatis affectu, et quomodo ratione carentia videbantur ad ipsum affici*⁵.

Quadruplex
pietas.

1. *Pietas* vera, quae secundum Apostolum⁶ *ad omnia valet*, adeo cor Francisci repleverat ac penetraverat viscera, ut totum videretur virum Dei in suum dominium vindicasse. Haec est, quae ipsum per *devotionem* sursum agebat in Deum, per *compassionem* transformabat in Christum, per *condescensionem* inclinabat ad proximum et per universalem *conciliationem* ad singula refigurabat ad innocentiae statum. Cumque per hanc pie moveretur ad omnia, specialiter tamen animas Christi Iesu sanguine pretioso redemptas cum cerneret inquinari aliqua sorde peccati, tanta miserationis teneritudine deplorabat, ut eas tanquam mater in Christo quotidie parturiret⁷. Et haec penes ipsum causa praecipua venerandi verbi Dei ministros, quod *semen fratri suo defuncto*, Christo videlicet pro peccatoribus crucifixo, per ipsorum conversionem et pia sollicitudine *suscitent* et sollicita pietate gubernent. Istiusmodi miserationis officium *Patri misericordiarum*⁸ omni sacrificio firmabat acceptius, maxime si studio fuerit perfectae caritatis impensum, ut ad id laboretur magis exemplo quam verbo, magis lacrymosa prece quam loquaci sermone.

Contra praedicatorum vanos.

2. Plangendum proinde dicebat praedictorem tanquam vera pietate privatum, sive qui in praedicatione non animarum quaerit salutem, sed propriam laudem, sive qui pravitate destruit vitae quod aedi-

ficat veritate doctrinae. Praeferendum huic dicebat Fratrem simplicem et elinguem, qui bono exemplo alios provocaret ad bonum. Illud quoque verbum⁹: *Donec sterilis peperit plurimos*, taliter exponebat: « *Sterilis*, inquit, est Frater pauperculus, qui generandi in Ecclesia filios non habet officium. Hic *pariet* in iudicio plurimos, quia quos nunc privatis orationibus convertit ad Christum suae gloriae tunc ludex ascribet. *Quae multos habet filios infirmabitur*, quia praedicator vanus et loquax, qui multis nunc quasi sua virtute genitis gaudet, cognoscet tunc, se nil proprii habere in eis ».

Prae to
Frater im
plex.

3. Cum igitur animarum salutem viscerosa pietate appeteret et fervida aemulatione zelaret, suavissimis se dicebat repleri odoribus et quasi unguento pretioso liniri, cum sanctorum Fratrum per orbem distantium odorifera fama multos audiret ad viam veritatis induci. Ex talium¹⁰ auditu exsultabat in spiritu, benedictionibus omni acceptione dignissimis Fratres illos accumulans, qui verbo vel opere ad Christi amorem inducerent peccatores. Sic etiam qui Religionem sacram iniquis violarent operibus maledictionis eius gravissimam incurrebant sententiam: « A te, inquit, sanctissime Domine, et a tota caelestia curia et a me parvulo tuo sint maledicti, qui suo malo exemplo confundunt et destruunt quod per sanctos Fratres Ordinis huius aedificasti et aedificare

Gaud d
fractio
rum a
tri.

Maled
eio

¹ Deut. 32, 13: Ut sugeret mel de petra oleumque de saxo durissimo. — Fide BE supplevimus *productam*. Superius pro *se inclinatur* E *inclinatur*.

² Cap. 9. n. 4.

³ Cfr. Exod. 17, 1. seqq.; de Eliseo vide IV. Reg. 4, 1. seqq.

⁴ Vat. et ed. 1 *iam*.

⁵ Cfr. Thom. a Celano, Vita I. p. I. c. 14. in fine, 21. et 28; Vita II. p. II. c. 5. et p. III. c. 29-36. 54. 92-94. 102. 103. 106-108. 115.

⁶ Epist. I. Tim. 4, 8: Pietas autem ad omnia utilis est.

— Inferius post *penetraverat* fide A G I K M addidimus *viscera*, et pro *virum Dei* Vat. et ed. 4 substituunt *servum Dei*.

⁷ Gal. 4, 19: Filii mei, quos iterum parturio, donec formetur Christus in vobis. — Subinde respicitur Deut. 25, 5: Sed accipiet eam [uxorem defuncti] frater eius et suscitabit semen fratris sui.

⁸ Epist. II. Cor. 1, 3.

⁹ Libr. I. Reg. 2, 5. Cfr. Wadding., loc. cit., ad an. 1220, n. 30. — Superius pro *provocaret* edd. *provocat*.

¹⁰ Vat. et ed. 1 *Et talium*.

non cessas ». Tanta frequenter afficiebatur moestitia super scandalo ¹ pusillorum, ut deficere se putaret, nisi divinae fuisset clementiae consolatione suffultus. Cum autem semel malis turbatus exemplis, anxio spiritu misericordem Patrem precaretur pro filiis, responsum huiusmodi reportavit a Domino: « Cur tu, pauper homuncio, conturbaris? An ego te super Religionem meam sic pastorem institui, ut me principalem nescias esse patronum? Hominem simplicem ad hoc te constitui, ut quae in te fecero, non humanae industriae, sed supernae gratiae ascribantur. Ego vocavi, servabo et pascam, et aliis excidentibus alios subrogabo, ita ut, si nati non fuerint, faciam, illos nasci, et quantiscumque fuerit impulsibus pauperula haec concussa Religio, salva semper meo munere permanebit ² ».

4. Detractionis quoque vitium inimicum fontis pietatis et gratiae tanquam serpentinum abhorrebat morsum et atrocissimam pestem et piissimo Deo abominabile fore firmabat ³, pro eo quod detractor animarum sanguine pascitur, quas gladio linguae necat. Audiens semel, Fratrem quendam denigrare famam alterius, conversus ad Vicarium suum dixit: « Surge, surge, discute diligenter, et si acensatum Fratrem innocentem repereris, accusantem dura correctione cunctis redde notabilem ». Nonnunquam vero eum qui Fratrem suum famae gloria spoliaret, iudicabat habitu spoliandum, nec ad Deum oculos posse levare, nisi prius quod abstulerat reddere pro posse curaret. « Tanto maior est, aiebat, detractorum impietas quam latronum, quanto lex Christi, quae in observantia pietatis impletur, magis animarum quam corporum nos astringit optare salutem ».

5. Afflictis quoque qualicumque corporali molestia mira compassionis teneritudine condescendens, si quid penuriae, si quid defectus in aliquo cerneret, pii cordis dulcedine regerebat in Christum. Sane clementiam habebat ingenitam ⁴, quam superinfusa Christi pietas duplicabat. Itaque liquescebat animus eius ad pauperes et infirmos, et quibus non poterat manum, exhibebat affectum. Contigit semel, ut pauperi cuidam eleemosynam importune petenti unus e Fratribus durius responderet. Quod audiens pauperum pius amator, Fratri praecepit, ut ad illius pauperis pedes se nudatum prosterneret, proclamaret culpabilem, orationis suffragium postularet et veniam. Quod cum ille fecisset humiliter, dulciter Pater adiecit: « Dum pauperem vides, o Frater, speculum tibi proponitur Domini et pauperis Matris eius. In infir-

mis similiter infirmitates, quas assumsit, considera ⁵ ». Cumque in pauperibus cunctis et ipse christianissimus pauper effigiem Christi prospiceret, si qua etiam necessaria vitae sibi collata fuissent, eis occurrentibus non solum liberaliter conferebat, verum etiam, ac si illorum propria essent, iudicabat esse reddenda. — Accidit semel ⁶, ut eidem redeunti de Senis pauper quidam occurreret, cum occasione infirmitatis super habitum palliolo quodam esset amictus. Cuius miseria oculo elementi conspecta: « Oportet, inquit ad socium, ut reddamus mantellum pauperulo isti; nam ipsius est. Mutuo enim ipsum accepimus, donec pauperiorem invenire contingeret ». Socius autem pii Patris necessitatem considerans, pertinaciter obstebat, ne provideret alii, se neglecto. At ille: « Pro furto mihi, ait, reputo a magno Eleemosynario imputandum, si hoc quod fero, non dederò magis egenti ». Propterea de omnibus, quae sibi dabantur ad necessitatem corporis relevandam, solitus erat a dantibus licentiam petere, ut licite posset, si magis egenus occurreret, erogare. Nulli prorsus rei parcebat, nec mantellis nec tunicis nec libris nec etiam paramentis altaris, quin omnia haec, dum posset, ut pietatis impleret officium, indigentibus largiretur. Pluries, cum oneratis obviaret in via pauperibus, imbecilles humeros illorum oneribus supponebat.

6. Consideratione quoque primae originis omnium abundantiori pietate repletus, creaturas quantumlibet parvas *fratris* vel *sororis* appellabat nominibus, pro eo quod sciebat, eas unum secum habere principium. Illas tamen viscerosius complexabatur ⁷ et dulcius, quae Christi mansuetudinem piam similitudine naturali praetendunt et Scripturae significatione figurant. Redemit frequenter agnos, qui ducebantur ad mortem, illius memor Agni mitissimi, qui ad occisionem duci voluit pro peccatoribus redimendis ⁸. Hospitato quadam vice servo Dei apud Monasterium sancti Verecundi de episcopatu Eugubii ⁹, ovicula quaedam agniculum peperit illa nocte. Aderat sus ferocissima, quae vitae innocentis non parcens, rapaci eum morsu necavit. Hoc audito, pius Pater mira compassione commotus et Agni sine macula recordatus, lamentabatur pro morte agniculi coram omnibus, dicens: « Heu me, frater agnicule, animal innocens, Christum hominibus repraesentans, maledicta sit impia, quae te interfecit, nullusque de ea comedat homo vel bestia ». Mirabile dictu! statim infirmari coepit porca malefica et tribus diebus corpoream poenam exsolvens, ultricem tandem pertulit

¹ Vat. et ed. 1 *scandala*. Inferius vocibus *turbatus exemplis* Vat. et ed. 1 interserunt *esset*, deindeque Vat. voci *anxio* praefigit *et*.

² Cfr. Wadding., loc. cit., ad an. 1221, n. 26. — Pro *semper meo* AB *semper in eo*.

³ Rom. 1, 30: Detractores, Deo odibiles.

⁴ Cfr. supra pag. 506, nota 2.

⁵ Vide Wadding., loc. cit., ad an. 1215, n. 28.

⁶ Cfr. Wadding., loc. cit., ad an. 1213, n. 25; vide ibid. ad an. 1241, n. 10. seq. et ad an. 1225, n. 41, ubi similia referuntur.

⁷ Vat. cum ed. 1 *amplexabatur*.

⁸ Isai. 53, 7: Oblatus est... et non aperuit os suum; sicut ovis ad occisionem ducetur etc.

⁹ Id est Gubbio in Umbria, a qua civitate praenotatum Monasterium Benedictinorum non multum distabat. — Cfr. Wadding., loc. cit., ad an. 1222, n. 49.

Factum notabile.

Pietas erga omnes creaturas.

necem. Proiecta autem in vallum¹ Monasterii ibique longo tempore iacens, in modum tabulae desiccata, nulli fuit esca famelico. Advertat igitur humana impietas, quali poena sit ferienda finaliter, si tam horrenda morte percussa est ferocitas bestialis; perpendat et fidelis devotio, quam in servo Dei pietas fuerit admirandae virtutis et copiosae dulcedinis, ut ei applauderet suo modo etiam natura brutorum.

7. Iter enim faciens iuxta civitatem Senensem, invenit in pascuis magnum ovium gregem². Quas cum benigne, ut erat solitus, salutasset, relicto pastu, cucurrerunt omnes ad eum, levantesque capita sua, erectis in eum luminibus intendebant. Tantum quidem ei fecerunt applausum, ut et pastores mirarentur et Fratres, cernentes circa ipsum tam ovium agnos quam ipsos arietes sic mirabiliter exsultantes.

Alterum. — Alio quoque tempore³ apud sanctam Mariam de Portiuncula quaedam viro Dei fuit ovis oblata, quam propter innocentiae ac simplicitatis amorem, quas ovis natura praetendit, gratanter suscepit. Monebat vir pius oviculum, ut et laudibus divinis intenderet et ab omni Fratrum offensa caveret; ovis autem, quasi viri Dei pietatem adverteret, informationem ipsius sollicite observabat. Nam audiens Fratres in choro cantare⁴, et ipsa ecclesiam ingrediens, sine alienius informatione flectebat genua, vocem balatus emittens ante altare Virginis, Matris Agni, ac si eam salutare gestiret. Insuper, et cum elevaretur sacrificissimum Christi corpus inter Missarum solemnias, flexis curvabatur poplitibus, tanquam si reverens pecus de irreverentia indevotos argueret Christoque

Tertium. devotos ad Sacramenti reverentiam invitaret. — Tempore quodam agniculum in Urbe⁵ secum habuerat ob reverentiam illius mitissimi Agni, quem nobili matronae, dominae scilicet Iacobae de Septem-Solis, in suo recessu conservandum commisit. Agnus vero, quasi in spiritualibus eruditus a Sancto, dominae ad ecclesiam eunti, stanti et revertenti societate inseparabili cohaerebat. Si matutinali hora domina tardaret exurgere, agnus consurgens impellebat eam cornibus⁶ et balatibus excitabat, gestibus adhortans et nutibus, ut ad ecclesiam properaret. Propter quod agnus, Francisci discipulus, devotionis iam magister effectus, ut mirabilis et amabilis a domina servabatur.

Quartum. 8. Alio quoque tempore⁷ apud Graecium vivus viro Dei oblatus fuit lepusculus, qui liber in terra positus, cum posset quo vellet effugere, vocante se Patre benigno, in sinum illius propere cursu saltavit.

Quem ipse pio cordis affectu circumfovens, videbatur eidem compati quasi mater dulcique allocutione commonitum, ne se iterum capi permetteret, liberum abire permisit. Cumque pluries in terra positus, ut abscederet, semper in sinum Patris rediret, tanquam si sensu quodam occulto cordis ipsius perciperet pietatem; tandem iussu Patris a Fratribus delatus est ad loca solitudinis tutiora. — Modo quoque consimili in insula lacus Perusini cuniculus quidam captus et viro Dei oblatus, cum ceteros fugeret, manibus eius et sinui se domestica securitate commisit. — Per lacum Reatinum eidem ad eremum de Graecio properanti piscator unam ex devotione fluvialem obtulit avem, quam cum libenter susceptam apertis invitaret manibus ad recessum, nec illa vellet abire; erectis in caelum oculis, diu in oratione permansit, et quasi aliunde post longam horam ad se reversus, dulciter iterato mandavit aviculae, ut Dominum laudatura recederet. Suscepta itaque cum benedictione licentia, gestu corporis quoddam praetendens gaudium, avolavit⁸. — In eodem lacu similiter oblatus fuit ei piscis magnus et vivus, quem more solito fraterno nomine vocans, in aquam reposuit iuxta navem. Piscis vero coram viro Dei in aqua ludebat, et quasi amore ipsius allectus, nullatenus recessit a navi, nisi prius ab eodem cum benedictione licentia sibi data.

9. Alio tempore⁹ ambulans cum quodam Fratre per paludes Venetiarum, invenit maximam avium multitudinem residentium et cantantium in virgultis. Quibus visis, dixit ad socium: « Sorores aves laudant Creatorem suum, nos itaque in medium ipsarum euntes, laudes et horas canonicas Domino decantemus ». Cumque in medium earum intrassent, non sunt aves motae de loco; et quia propter garritum ipsarum in dicendis horis se mutuo audire non poterant, conversus vir sanctus dixit ad aves: « Sorores aves, a cantu cessate, donec laudes Deo debitas persolvamus ». At illae continuo tacuerunt, tandiu in silentio persistentes, quamdiu, dictis horis spatiosae et laudibus persolutis, a sancto Dei cantandi licentiam receperunt. Dante autem eis viro Dei licentiam, statim cantum suum more solito resumserunt. — Apud sanctam Mariam de Portiuncula iuxta cellam viri Dei super ficum cicada residens et decantans, cum servum Domini, qui etiam in parvis rebus magnificentiam Creatoris admirari didicerat, ad divinas laudes cantu suo frequentius excitaret,

¹ Du Cange, Glossarium etc.: « Vallum, vallus, ut *val-latum*, fossa ». In codd. 1 M secunda manus substituit *vallem*, quod etiam habetur in Actis SS. — Superius pro *malefica* BDE *maledicta*. Inferius pro *nulli fuit* Vat. *nulla fuit*.

² Cfr. Wadding., loc. cit., ad an. 1222, n. 20.

³ Cfr. Wadding., loc. cit., ad an. 1221, n. 35.

⁴ Cod. B *cantantes*, G *Frates cantare in ecclesia*.

⁵ Id est Roma. — De Iacoba vide Wadding., loc. cit., ad an. 1212, n. 34. (ubi de origine venerationis ipsius erga Franci-

scum); ad an. 1222, n. 4. (ubi de agniculo); ad an. 1226, n. 26. seqq. (ubi de praesentia ipsius ad mortem Francisci) et ad an. 1239, n. 44. (ubi de eius morte).

⁶ Acta SS. *corniculis*.

⁷ Cfr. Wadding., loc. cit., ad an. 1217, n. 15.

⁸ De hoc et seq. facto cfr. Wadding. loco in praecedenti nota allegato. — Pro *avolavit* Vat. cum ed. 1 *advolavit*.

⁹ Cfr. Wadding. ad an. 1220, n. 5. — Edd. *Alio quoque tempore*.

ab eodem quadam die vocata, velut edocta caelitus, super manum volavit ipsius. Cui cum dixisset: «Canta, soror mea cicada, et Dominum Creatorem tuo iubilo lauda»; sine mora obediens canere coepit nec destitit, donec iussu Patris ad locum proprium revolavit. Mansit autem per octo dies ibidem, quolibet die veniendo, cantando et recedendo eius iussa perficiens. Tandem vir Dei ait ad socios: «Demus iam sorori nostrae cicadae licentiam; satis enim nos suo cantu laetificans, ad laudes Dei octo dierum spatio excitavit». Et statim ab eo licentiata recessit nec ultra ibidem apparuit, ac si mandatum ipsius non auderet aliquatenus praeterire¹.

10. Eidem Senis infirmo phasianus quidam de novo captus a nobili quodam transmissus est vivus. Qui continuo, ut virum sanctum audivit et vidit, tanta ei² amicitia cohaesit, ut nullo modo pateretur ab ipso seinngi. Nam pluribus vicibus extra locellum Fratrum in vinea positus, ut abiret, si vellet, rapido semper cursu redibat ad Patrem, tanquam si ab eodem omni fuisset tempore educatus. Deinde cuidam collatus viro, qui ex devotione servum Dei visitare solebat, velut sibi molestum foret a pii Patris absentari conspectu, escam recusavit omnino. Reportatus tandem ad famulum Dei, statim, ut conspexit eundem, quibusdam hilaritatis praetensis gestibus, avide manducavit. — Cum ad eremum pervenisset Alvernae propter Quadragesimam celebrandam in honorem Archangeli Michaelis³, diversi generis aves circa ipsius cellulam volitantes, concentu sonoro et laetitiae gestibus, quasi de eius adventu gaudentes, Patrem pium invitare ac allicere videbantur ad moram. Quo viso, dixit ad socium: «Cerno, Frater, voluntatis esse divinae, quod hic aliquamdiu commoremur; tantum sorores aviculae de nostra videntur praesentia consolari». Cum igitur contraheret ibi moram, falco ibidem nidificans magno se illi amicitiae foedere copulavit. Nam semper horam nocturno tempore, in qua vir sanctus ad divina officia surgere solitus erat, cantu suo praeveniebat et sono. Quod famulo Dei gratissimum erat, eo quod tanta sollicitudo, quam circa eum gerebat, omnem ab ipso

desidia torporem excuteret. Cum vero servus Christi infirmitate plus solito gravaretur, parcebat falco nec tam tempestivas indicebat vigilias. Siquidem, velut instructus a Deo, circa diluculum suae vocis campanam levi tactu pulsabat. Divinum certe videtur fuisse praesagium tam in exultatione multimodi generis avium quam in cantu falconis, cum Dei laudator et cultor pennis contemplationis subvectus, tunc foret illic apparitione seraphica sublimandus⁴.

11. Moram eo faciente tempore quodam in eremitorio Graecii, loci illius indigenae malis multiplicibus vexabantur. Nam et luporum rapacium multitudo non solum bruta, sed et homines consumebat, et grando annua tempestate blada⁵ et vineas devastabat. Dum igitur sic afflictis praeco sacri Evangelii praedicaret, dixit ad eos: «Ad honorem et laudem omnipotentis Dei fideiubeo vobis, quod pestilentia haec omnis abscedet, et respiciens vos Dominus multiplicabit in temporalibus bonis, si mihi credentes, misereamini vestri, ut, vera confessione praemissa, dignos faciatis poenitentiae fructus⁶. Iterum hoc annuntio vobis, quod si beneficiis ingrati ad vomitum conversi fueritis, innovabitur plaga, duplicabitur poena, et maior in vos ira desueviet». Ab illa itaque⁷ hora, poenitentiam ad exhortationem ipsius agentibus illis, cessaverunt clades, periire pericula, nec molestiae quidquam lupi intulere vel grandines. Immo, quod maius est, si quando vicinorum arva grando pervaderet, istorum terminis appropinquans, terminabatur ibidem, aut in partem aliam divertebat. Servavit grando, servaverunt et lupi pactionem servi Dei, nec contra pietatis legem in homines ad pietatem conversos attentaverunt amplius desaevire, quamdiu iuxta condictum contra piissimas Dei leges impie non egerunt. — Pie igitur sentiendum de pietate viri beati, quae tam mirae dulcedinis et virtutis fuit, ut domaret ferocia, domesticaret silvestria, mansueta doceret et brutorum naturam homini iam lapso rebellem ad sui obedientiam inclinaret. Vere haec est, quae cunctas sibi creaturas confoederans; *valet ad omnia, promissionem habens vitae, quae nunc est, et futurae*⁸.

Aliud mirum factum.

Epilogus.

¹ Vide Wadding., loc. cit., ad an. 1221, n. 35; ibid. ad an. 1226, n. 8. agitur de seq. facto (de phasiano).

² Cod. A *tanta et*, BCDEFGLM *tanta illi*.

³ Vide infra c. 13. n. 1.

⁴ Scilicet in impressione stigmatum, de qua infra c. 13. Cfr. Wadding., loc. cit., ad an. 1224, n. 4. — Superius pro *videtur fuisse* F *videbatur fuisse*.

⁵ Du Cange, Glossarium etc.: *Bladum*, Gall. *Blé*; sic autem appellabant quodvis triticum, etsi differret a frumento... Interdum [ponitur bladum] pro farre omnis generis, quando est in herba ante messem.

S. Bonav. — Tom. VIII.

⁶ Loc. 3, 8; cfr. Matth. 3, 8. — Subinde respiciuntur Prov. 26, 11: Sicut canis, qui revertitur ad vomitum suum, sic imprudens, qui iterat stultitiam suam (cfr. II. Petr. 2, 22.); Iosue 22, 18: Et vos hodie reliquistis Dominum, et cras in universum Israel ira eius desaeviet. Vat. cum ed. 1 *et maiori in vos ira desaeviet*. — Vide Wadding., loc. cit., ad an. 1217, n. 13.

⁷ Edd. *utique*, quae etiam aliquanto inferius pro *Servavit grando* substituunt *Cessavit grando*.

⁸ Epist. 1. Tim. 4, 8: Pietas autem ad omnia utilis est, promissionem etc.

CAPITULUM IX.

*De fervore caritatis et desiderio martyrii*¹.

1. Caritatem ferventem, qua Sponsi amicus Franciscus ardebat, quis enarrare sufficiat? Totus namque quasi quidam carbo ignitus divini amoris flamma videbatur absorptus. Subito enim ad auditum amoris Domini excitabatur, afficiebatur, inflammabatur, quasi plectro vocis extrinsecæ chorda cordis interior tangeretur. Talem pro eleemosynis censum offerre nobilem prodigalitatem dicebat, et eos qui minus ipsum quam denarios reputarent, esse stultissimos, pro eo quod solius divini amoris impretabile pretium ad regnum caelorum sufficiat comparandum, et eius qui nos multum amavit, multum sit amor amandus. —

Ut autem ex omnibus excitaretur ad amorem divinum, *exultabat in cunctis operibus*² manuum Domini et per iucunditatis spectacula in vivificam consurgebat rationem et causam. Contuebatur in pulchris pulcherrimum et per impressa rebus vestigia prosequabatur ubique dilectum, de omnibus sibi scalam faciens, per quam conscenderet ad apprehendendum eum qui est *desiderabilis totus*³. Inaudita namque devotionis affectu fontalem illam bonitatem in creaturis singulis tanquam in rivulis degustabat, et quasi caelestem concentum perciperet in consonantia virtutum et actuum eis datorum a Deo, ipsas ad laudem Domini more Prophetæ David⁴ dulciter hortabatur.

2. Christus Iesus crucifixus *intra* suae mentis *ubera ut myrrhae fasciculus* ingiter morabatur⁵, in quem optabat per excessivi amoris incendium totaliter transformari. Praerogativa quoque peculiaris devotionis ad ipsum ab Epiphaniae festo usque ad continnos quadraginta dies, eo scilicet tempore, quo Christus latuit in deserto⁶, ad solitudinis loca declinans cellaque reclusus, quanta poterat arctitudine cibi et potus, ieiuniis, orationibus et laudibus Dei

sine intermissione vacabat. Tam fervido quidem in Christum ferebatur affectu, sed et dilectus illi tam familiarem rependebat amorem, ut videretur ipsi famulo Dei quasi ingem prae oculis ipsius Salvatoris sentire praesentiam, sicut aliquando sociis familiariter revelavit. — Flagrabat erga Sacramentum dominici corporis fervore omnium medullarum, stupore admirans permixto illam carissimam dignationem et dignantissimam ⁷ caritatem. Saepe communicabat et tam devote, ut alios devotos efficeret, dum ad immaculati Agni degustationem suavem, quasi spiritu ebrius, in mentis ut plurimum rapiebatur excessum.

3. Matrem Domini⁸ Iesu Christi indicibili complectebatur amore, eo quod Dominum maiestatis fratrem nobis effecerit, et per eam simus misericordiam consecuti. In ipsa post Christum praecipue fidens, eam sui ac suorum advocatam constituit et ad honorem ipsius a festo Apostolorum Petri et Pauli usque ad festum Assumptionis devotissime ieiunabat⁹. Angelicis spiritibus ardentibus igne mirifico ad excedendum in Deum et electorum animas inflammandas inseparabilis erat amoris vinculo copulatus et ob devotionem ipsorum ab Assumptione Virginis gloriosae quadraginta diebus ieiunans orationi iugiter insistebat¹⁰. Beato autem Michaeli Archangelo, eo quod animarum repraesentandarum haberet officium, speciali erat amore devotior propter fervidum quem habebat zelum ad salutem omnium salvandorum. Ex recordatione Sanctorum omnium tanquam *lapidum ignitorum*¹¹ in deificum recalescebat incendium, Apostolos omnes, et praecipue Petrum et Paulum, propter fervidam caritatem, quam habuerunt ad Christum, summa devotione complexans; ob quorum reverentiam et amorem Quadragesimae specialis ieiunium Domino dedicabat¹². Non habebat aliud Christi pauper

¹ Cfr. Thom. a Celano, Vita I. p. I. c. 20. et 29; Vita II. p. II. c. 2. et 9; p. III. c. 101. 108. 125-130.

² Psalm. 91, 5.

³ Cant. 5, 16. — Pro *apprehendendum* A *comprehendendum*. Superius pro *spectacula* edd. *specula*.

⁴ Psalm. lvs, l. seqq. — Vide Wadding., loc. cit., ad an. 1210, n. 54-56.

⁵ Cant. 1, 12: Fasciculus myrrhae dilectus meus mihi, inter ubera mea commorabitur.

⁶ Matth. 4, 1. seq. Cfr. Regula FF. Minorum, c. 3, ubi de hac Quadragesima (ab Epiphania) dicitur: « quam Dominus suo sancto ieiunio consecravit ». ⁷ Cod. I *dignatissimam*.

^s Edd. *Matrem Domini nostri*.

⁹ Die 29. Iunii occurrit festum Apostolorum Petri et Pauli, festum vero Assumptionis B. M. Virg. die 15. Augusti. — Ps. 103, 4: Qui facis Angelos tuos spiritus... ignem urentem.

¹⁰ Usque ad festum Dedicationis S. Michaelis Archangeli (29.

Sept.), quae infra c. 13. n. 4. Quadragesima ad honorem S. Michaelis Archangelii vocatur. — In officio Breviarii Romani die 29. Sept. Resp. ad 5. lect. dicitur: « Cui [Michaeli] tradidit Deus animas Sanctorum, ut perducet eas in paradisum exultationis »; et ant. 3. ad Laudes: « Archangeles Michael, constitui te principem super omnes animas suscipiendas ».

¹¹ Ezech. 28, 14. et 16.

¹² Scilicet quadraginta dies, quae festum Apostolorum Petri et Pauli praecedunt. Utrum in hac propositione praeter Quadragesimam Apostolorum Petri et Pauli insinuetur adhuc alia, scilicet in honorem Omnium Sanctorum (incipiens a festo Dedicationis S. Michaelis Archangeli usque ad festum Omnium Sanctorum), quam Wadding., loc. cit., ad an. 1224, n. 6, refert, de hoc iudicium relinquimus lectori. Quatuor [non tribus, ut notant Acta SS.] in praedictis certo allatis Quadragesimis duae aliae adiungendae erunt, scilicet illa quae observanda est ab omnibus fidelibus (ante Pascha) et illa quae praecipitur in c. 4.

nisi *duo minuta*¹, corpus scilicet et animam, quae posset liberali caritate largiri. Sed haec per amorem Christi sic offerebat continue, ut quasi omni tempore per rigorem ieiunii corpus et per ardorem desiderii spiritum immolaret, exterius in atrio *sacrificans holocaustum* et interius in templo *concremans thymiamam*².

4. Sic autem eum caritatis excessiva devotio sursum in divina ferebat, ut eiusdem affectuosa benignitas ad naturae consortes et gratiae dilataret. Quem enim creaturis ceteris germanum pietas cordis effecerat, mirum non est, si Creatoris insignitis³ imagine et sanguine redemptis Auctoris germaniorem Christi caritas faciebat. Non se Christi reputabat amicum, nisi animas foveret, quas ille redemit. Saluti animarum nihil praeferendum esse dicebat, eo maxime probans, quod Unigenitus Dei pro animabus dignatus fuerit in cruce pendere. Hinc sibi in oratione luctamen, in praedicatione discursus et in exemplis dandis excessus. Unde quoties austeritas nimia reprehenderetur in ipso, respondebat, se datum aliis in exemplum. Licet enim innocens eius caro, quae iam se sponte subdebat spiritui, nullo propter offensas egeret flagello⁴; tamen exempli causa renovabat illi poenas et onera, *custodiens* propter alios *vias duras*. Dicebat enim: « *Si linguis hominum loquar et Angelorum, caritatem autem in me ipso non habeam* et proximis virtutum exempla non monstrem, parum prosum aliis, mihi nihil ».

5. Ferventi quoque caritatis incendio gloriosum sanctorum Martyrum aemulabatur triumphum, in quibus nec amoris flamma exstingui, nec fortitudo potuit infirmari. Desiderabat propterea et ipse, illa perfecta caritate succensus, *quae foras mittit timorem*⁵, per martyrii flammam *hostiam* Domino se offerre *viventem*, ut et vicem Christo pro nobis morienti rependeret et ad divinum amorem ceteros provocaret. Sexto namque conversionis suae anno⁶, desiderio martyrii flagrans, ad praedicandam fidem christianam et poenitentiam Saracenis et aliis infidelibus ad partes Syriae transfretare disposuit. Cum-

que navem quandam, ut illuc tenderet, conscendisset; ventis contrariis flantibus compulsus est in Sclavoniae partibus applicare. Cum igitur moram aliquamdiu contraxisset ibidem nec invenire posset navem tunc temporis transfretantem; fraudatum se a suo desiderio sentiens, nautas quosdam Anconam tendentes, ut amore Dei eum secum ducerent, exoravit. Verum illis propter expensarum defectum pertinaciter recusantibus, vir Dei plurimum de Domini bonitate confisus, navem cum socio latenter conscendit. Affuit quidam a Deo, ut creditur, pro paupere suo missus, qui secum ferens necessaria victus, quendam timentem Deum de navi ad se vocatum sic allocutus est: « Haec omnia⁷ pro pauperibus Fratribus in navi latitantibus conserva fideliter ac necessitatis tempore amicabilem ministra ». Sicque factum est, ut nautis propter vim ventorum per dies plurimos nusquam applicare valentibus, omnia ipsorum consumerentur cibaria, et sola pauperi Francisco collata desuper eleemosyna superes- set. Quae cum esset permodica, tantum divina virtute suscepit augmentum, ut diebus pluribus in mari propter tempestatem continuam contrahentibus moram usque ad portum Anconae omnium necessitatibus plenarie subveniret. Videntes itaque nautae, per servum Dei multa se mortis evasisse discrimina, tanquam qui maris horrenda pericula senserant et miranda opera Domini viderant in profundo⁸, gratias egerunt omnipotenti Deo, qui semper in suis amicis et servis mirabilem et amabilem se ostendit.

6. Cum autem, relicto mari, terram perambulare coepisset, iactato in eam salutis semine, reportabat manipulos fructuosos. Verum quia martyrii fructus adeo cor eius allexerat, ut pretiosam pro Christo mortem super omnia virtutum merita peroptaret, versus Marrochium iter arripuit, ut Miramolino et genti eius Christi Evangelium praedicaret, si quo modo ad concupitam palmam valeret attingere⁹. Tanto namque desiderio ferebatur, ut, quamvis imbecillis esset corpore, peregrinationis suae praecurreret comitem et ad exsequendum propositum festinus, tanquam spiritu ebrui, advolaret. Sed cum

Factum memorandum.

Iterum quare rit martyrium.

Regulae (a festo Omnium Sanctorum usque ad Nativitatem Domini). His adiungit Wadding., loc. cit., tres alias, nempe in honorem Spiritus sancti (a feria 4. Paschae usque ad Pentecosten), in honorem Omnium Sanctorum (de qua paulo superius) et in honorem Regum Magorum (a festo S. Stephani usque ad Epiphaniam).

¹ Respicitur Marc. 12, 42. et Luc. 21, 2, ubi de paupere vidua dicitur, quod in gazophylacium « misit duo minuta ». — Inferius pro *quae posset* add. *quod posset*.

² Glossa *ordinaria* apud Lyrannum in Luc. 11, 31: Duo erant altaria in templo: unum incensi interiori, alterum holocaustorum exteriori. Cfr. Exod. 30, 1. seqq. et 40, 5. seqq.

³ Val. cum ed. 1 perperam *insignitus*.

⁴ Epist. 1. Cor. 9, 27: Sed castigo corpus meum et in servitutum redigo; cfr. Gal. 5, 17. — Subinde allegantur Ps. 16, 4: Propter verba labiorum tuorum ego custodi vias duras; 1. Cor. 13, 1.

⁵ Epist. 1. Ioan. 4, 18, post quem Rom. 12, 1: Exhibeatis corpora vestra hostiam viventem etc. Cfr. Wadding., loc. cit., ad an. 1212, n. 32.

⁶ Scilicet an. 1212 (vel 1213), prout ponitur annus conversionis vel 1206 vel 1207, de quo cfr. *Analecta Franciscana*, tom. III. pag. 9, ex quibus supra pag. 507, nota 8. unam tantum partem retulimus; Wadding., ad an. 1212, n. 36. Acta SS. ponunt an. 1213.

⁷ Fide codd. supplevimus *omnia*. Inferius pro *permodica* Vat. cum ed. 1 *modica*, et pro *pluribus* Acta SS. *plurimis*.

⁸ Psalm. 106, 24: Ipsi viderunt opera Domini et mirabilia eius in profundo.

⁹ Cfr. *Analecta Franciscana*, tom. III. pag. 9 et Wadding., loc. cit., ad an. 1213, n. 6. et ad an. 1214, n. 4. — Inferius voci *tanquam* edd. cum uno alteroque cod. praefigunt *et*, ac pro *in Hispaniam* IM substituant *ad Hispaniam*.

iam usque in Hispaniam perrexisset, divina dispositione, quae ipsum reservabat ad alia, gravissima ei supervenit infirmitas, qua praepeditus, quod cupiebat adimplere nequivit. Sentiens igitur vir Dei, quod necessaria erat adhuc proli, quam genuerat, ipsius vita in carne, quamvis mortem sibi lucrum¹ esse putaret, rediit ad pascendum oves suae sollicitudini commendatas.

7. Verum caritatis ardore spiritum ipsius ad martirium perurgente, tertia adhuc vice pro fide Trinitatis effusione sui sanguinis dilatanda versus infideles proficisci tentavit. Tertio decimo namque conversionis suae anno² ad partes Syriae pergens, multis se periculis constanter exposuit, ut Soldani Babyloniae posset adire praesentiam. Inter Christianos enim ac Saracenos tunc guerra tam implacabilis erat, exercituum castris hinc inde in campo cominus ex adverso locatis³, ut via mutui transitus sine mortis discrimine non pateret. Exierat siquidem a Soldano edictum crudele, ut quicumque caput alicuius Christiani afferret, Byzantium aureum⁴ pro mercede reciperet. At intrepidus Christi miles Franciscus, sperans, in proximo suum adipisci posse propositum, definivit iter arripere, mortis pavore non territus, sed desiderio provocatus. Oratione namque praemissa, confortatus a Domino, confidenter illud propheticum⁵ decantabat: *Nam et si ambulem in medio umbrae mortis, non timebo mala, quoniam tu mecum es.*

8. Assumpto igitur socio Fratre, Illuminato nomine⁶, viro utique luminis et virtutis, cum iter coepisset, obvias habuit oviculas duas; quibus visis exhilaratus, vir sanctus dixit ad socium: « *Confide, Frater, in Domino* »⁷, nam in nobis evangelicum illud impletur: *Ecce, ego mitto vos sicut oves in medio luporum* ». Cum autem processissent ulterius, occurrerunt ei satellites Saraceni, qui, tanquam lupi celerius accurrentes ad oves, servos Dei feraliter comprehensos crudeliter et contemptibiliter pertractarunt, afficientes conviciis, affligentes verberibus et vinculis alligantes. Tandem afflictos multipliciter et attritos ad Soldanum, divina disponente providentia, iuxta viri Dei⁸ desiderium perduxerunt. Cum igitur princeps ille perquireret, a quibus et ad quid et qualiter missi essent et quomodo advenissent, intre-

pido corde respondit Christi servus Franciscus, non ab homine, sed a Deo altissimo se fuisse transmissum, ut ei et populo suo viam salutis ostenderet et annuntiaret Evangelium veritatis. Tanta vero mentis constantia, tanta virtute animi tantoque fervore spiritus praedicto Soldano praedicavit Deum trinum et unum et Salvatorem omnium Iesum Christum, ut evangelicum illud⁹ in ipso claresceret veraciter esse completum: *Ego dabo vobis os et sapientiam, cui non poterunt resistere et contradicere omnes adversarii vestri*. Nam et Soldanus admirandum in viro Dei fervorem spiritus conspiciens et virtutem, libenter ipsum audiebat et ad moram contrahendam cum eo instantius invitabat. Christi vero servus superno illustratus oraculo: « Si vis, inquit, converti tu cum populo tuo ad Christum, ob ipsius amorem vobiscum libentissime¹⁰ commorabor. Quodsi haesitas propter fidem Christi legem Mahumeti dimittere; iube, ignem accendi permaximum, et ego cum sacerdotibus tuis ignem ingrediar, ut vel sic cognoscas, quae fides certior et sanctorum non immerito tenenda sit ». Ad quem Soldanus: « Non credo, quod aliquis de sacerdotibus meis se vellet igni propter fidem suam defensandam exponere, vel genus aliquod subire tormenti ». Viderat enim, statim quendam de presbyteris suis, virum authenticum et longaevis, hoc audito verbo, de suis conspectibus aufugisse. Ad quem vir sanctus: « Si mihi velis promittere pro te et populo tuo, quod ad Christi cultum, si ignem illaesum exiero, veniatis; ignem solus intrabo; et si combustus fuero, imputetur peccatis meis; si autem divina me protexerit virtus, *Christum, Dei virtutem et sapientiam* »¹¹, verum Deum et Dominum Salvatorem omnium agnoscatis ». Soldanus autem optionem hanc accipere se non audere respondit, quia seditionem populi formidabat. Obtulit tamen ei multa munera pretiosa, quae vir Dei, non mundanarum rerum, sed salutis animarum avidus, sprexit omnia quasi lutum. Soldanus¹², videns virum sanctum tam perfectum rerum mundalium contemptorem, admiratione permotus, maiorem erga ipsum devotionem concepit. Et quamvis ad fidem christianam transire nollet, vel forsitan non auderet; rogavit tamen devote famulum Christi, ut praedicta susciperet pro salute ipsius Christianis pauperibus vel ecclesiis

¹ Phil. 1, 21: Mihi enim vivere Christus est, et mori lucrum.

² Scilicet an. 1219; qui supra ponunt 1213 hic deberent ponere 1220; cfr. Analecta Franciscana, tom. III. pag. 22, Wadding., loc. cit., ad an. 1219, n. 54. et 58. seqq. — Soldanus Babyloniae idem est ac Soldanus Aegypti.

³ Christiani cruce signati an. 1219 urbem Damiatam in Aegypto obsidebant; cfr. infra c. 11. n. 3. — Superius pro guerra tam implacabilis edd. bellum tam implacabile.

⁴ Du Cange, Glossarium etc.: Byzantius, nummus aureus ab imp. Constantinopolitanis cusus Constantinopoli, quae olim Byzantium, unde monetae nomen.

⁵ Psalm. 22, 4. Pro *ambulem* edd. et pauci codd. cum Vulgata *ambulavero*.

⁶ *Reatino*; cfr. de ipso Wadding., loc. cit., ad an. 1210, n. 37.

⁷ Eccli. 11, 22: Confide autem in Deo. — Subinde allegatur Matth. 10, 16.

⁸ Vat. cum ed. 1 et nonnullis codd. omittit *Dei*.

⁹ Luc. 21, 15. — Pro *in ipso claresceret* IM in *sermo suo claresceret*.

¹⁰ Edd. ob illius amorem vobiscum libenter.

¹¹ Epist. I. Cor. 4, 24. — Superius pro *intrabo* edd. *introibo*.

¹² Edd. Soldanus autem.

Praedic-
fidem c.
stianar.

Factum
rum.

Notam.

eroganda. Ipse vero, quia pondus fugiebat pecuniae et in animo Soldani verae pietatis non videbat radicem, nullatenus acquievit.

9. Videns etiam, se non proficere in conversione gentis illius nec assequi posse propositum¹, ad partes fidelium divina revelatione praemonitus remeavit. Sic itaque Dei ordinante clementia, et sancti viri promerente virtute, misericorditer et mirabiliter factum est, quod Christi amicus mortem pro ipso viribus totis exquireret, et tamen nullatenus inveniret, ut

et merito non careret optati martyrii et insigniendus servaretur in posterum privilegio singulari². Sic nti- que factum est, ut ignis ille divinus adhuc perfectius ipsius aestuaret in corde, ut post patentius evaporaret in carne. O vere beatum virum, cuius *caro*, etsi tyrannico ferro non caeditur, occisi tamen Agni similitudine non privatur! O, inquam, vere ac plene beatum, cuius animam « etsi gladius persecutoris non abstulit, palmam tamen martyrii non amisit³ »!

CAPITULUM X.

De studio et virtute orationis⁴.

1. Sentiens Christi servus Franciscus corpore se peregrinum a Domino⁵, cum iam ad terrena foris desideria per Christi caritatem totus esset insensibilis factus; ne foret absque consolatione dilecti, *sine intermissione* orans, spiritum Deo contendebat exhibere praesentem. Erat quidem oratio contemplanti *solatium*, dum, supernarum circuitu mansionum Angelorum concivis iam factus, ferventi desiderio quae- rebat dilectum⁶, a quo solus eum carnis paries disiungebat. Erat et operanti *praesidium*, dum in omnibus, quae agebat, de sua diffidens industria et de superna pietate confidens, per ipsius instantiam totum in Domino cogitatum iactabat⁷. — Orationis gratiam viro religioso desiderandam super omnia firmiter asserebat, nullumque credens sine ipsa in Dei prosperari servitio, modis, quibus poterat, Fratres suos ad eius studium excitabat. Nam ambulans et sedens, intus et foris, laborans et vacans orationi adeo erat intentus, ut illi videretur non solum quidquid erat in eo cordis et corporis, verum etiam operis et temporis dedicasse.

2. Solitus erat nullam visitationem spiritus cum negligentia praeterire. Siquidem, cum offerebatur, sequebatur eam, et quamdiu Dominus concedebat, dulcedine perfruebatur oblata. Cum autem, intentus itineri, divini Spiritus aliquos sentiret afflatus; sociis praecedentibus, gradum figebat, novamque inspirationem ad fruitionem convertens, *gratiam non recipiebat in vacuum*⁸. Suspendebatur multoties tanto

contemplationis excessu, ut supra semetipsum raptus et ultra humanum sensum aliquid sentiens, quid ageretur circa se exterius, ignoraret. — Transiens namque semel per Burgum sancti Sepulcri⁹, castrum utique populosum, pro debilitate corporis subvectus asello, obvias habuit turbas in eum prae devotione ruentes. Tractus autem et detentus ab eis, compressus quoque ac multipliciter attrectatus, insensibilis videbatur ad omnia et velut exanime corpus de his quae fiebant circa ipsum, nihil penitus advertebat. Unde cum, iam diu transito castro turbisque relictis, pervenisset ad quoddam domicilium leprosororum; quasi aliunde rediens caelestium contemplator, sollicitè requisivit, quando propinquarent ad Burgum. Mens quidem ipsius in caelestibus fixa splendoribus varietates non senserat locorum nec temporum nec occurrentium personarum. Quod ipsi accidis- se frequentius, sociorum eius experientia multiplex comprobavit.

3. Et quia in oratione perceperat, sancti Spiritus desideratam praesentiam tanto familiarius se offerre precantibus, quanto plus invenit elongatos a strepitu mundanorum; ideo loca solitaria quaerens, ad solitudines et ecclesias derelictas oraturus nocte pergebat; ubi daemonum pugnas horribiles frequenter sustinuit, qui secum sensibilibus confligentes, nitentur ipsum ab orationis studio perturbare. Ipse vero, armis munitus caelestibus, quanto vehementius impetebatur ab hostibus, tanto fortior in virtute et

Exemplum.

Quaerit solitudines.

Pugnae contra daemones.

¹ Scilicet martyrium. — Vocibus *nec assequi* edd. intersecunt suum.

² Nempe stigmatibus sacris, de quibus infra c. 13. — Inferius pro *potentius* edd. *potentius*.

³ Ut dicitur in festo S. Martini (11. Nov.), ant. ad Magnificat II. Vesp. (cfr. tom. IV. pag. 757, nota 9.): O sanctissima anima, quam etsi etc.

⁴ Cfr. Thom. a Celano, Vita I. p. I. c. 30. et Vita II. p. III. c. 38-44.

⁵ Epist. II. Cor. 5, 6: Dum sumus in corpore, peregrinamur a Domino. — Inferius respiciuntur I. Thess. 5, 17: Sine intermissione orate; II. Cor. 5, 8: Audemus autem et bonam

voluntatem habemus magis peregrinari a corpore et praesentes esse ad Dominum.

⁶ Cant. 3, 1: Quaesivi quem diligit anima mea etc.

⁷ Respicitur Ps. 54, 23; cfr. supra pag. 511, nota 7. Vide Wadding., loc. cit., ad an. 1210, n. 51, ubi etiam de iis quae sequuntur.

⁸ Epist. II. Cor. 6, 1: Adiuventes autem exhortamur, ne in vacuum gratiam Dei recipiatis.

⁹ De quo etiam supra pag. 521, nota 10. Vide Wadding., loc. cit., ad an. 1224, n. 27. — Inferius pro *prae devotione* I substituit *pro devotione*.

ferventior reddebatur in prece, fidenter dicens ad Christum ¹: *Sub umbra alarum tuarum protege me a facie impiorum, qui me afflixerunt.* Ad daemones autem: « Facite quidquid in me valetis, maligni spiritus et fallaces. Non enim potestis, nisi quantum vos manus superna relaxat; et ego ad perferendum omnia, quae illa infligenda decreverit, cum omni iucunditate paratus assisto ». Quam mentis constantiam superbi daemones non ferentes, abscedebant confusi.

4. Vir autem Dei solitarius remanens et pacatus, nemora replebat gemitibus, loca spargebat lacrymis, pectora manu tundebat, et quasi occultius secretarium nactus, confabulabatur cum Domino suo. Ibi respondebat iudici, ibi supplicabat patri, ibi colloquebatur amico, ibi quoque a Fratribus ipsum pie observantibus aliquoties auditus est clamorosis gemitibus apud divinam pro peccatoribus interpellare clementiam, deplorare etiam alta voce quasi coram positam dominicam passionem ². Ibi visus est nocte orans, manibus ad modum crucis protensis, toto corpore sublevatus a terra et nubecula quadam fulgente circumdatus, ut illustrationis mirabilis intra mentem mira circa corpus perlustratio testis esset. Ibi etiam, sicut certis est comprobatum indicibus, *incerta sibi et occulta* divinae sapientiae pandebantur, quamvis illa non vulgaret exterius, nisi quantum Christi urgebat caritas, et proximorum utilitas exigebat. Dicebat enim: « Levi mercede rem impetribilem contingit amitti, et illum qui dedit, ad non dandum iterum facile provocari ». — Quando a privatis redibat orationibus, quibus pene in virum alterum mutabatur, summopere studebat conformare se ceteris, ne forte quod foris ostenderet aura favoris intus a mercede vacuaret ³. Cum in publico subito afficeretur, visitatus a Domino, semper aliquid obiciebat astantibus, ne Sponsi familiares attactus forinsecus vulgarentur. Exsecrationes ⁴, gemitus, duros anhelitus, extrinsecos nutus orans inter Fratres devitabat omnino, sive quia diligebat secretum, sive quia ad interiora reintrans, totus ferebatur in Deum. Saepe talia familiaribus dixit: « Quando servus Dei orans visitatur divinitus, dicere debet: Istam consolationem mihi peccatori et indigno de caelo misisti, Domine, et ego illam tuae committo custodiae, quia thesauri tui me sentio esse latronem. Cum autem ab oratione revertitur, sic debet se pauperulum et peccatorem ostendere, ac si nullam sit novam gratiam consecutus ».

5. Orante autem viro Dei in loco de Portiuncula, contigit, Assisinatem episcopum venire ad eum, ut erat solitus, visitandum. Qui mox, ut locum fuit ingressus, ad cellam, in qua Christi servus orabat, plus debito fidenter accessit, pulsoque ostiolo, intraturum se ingerens, dum caput immisit Sanctumque orantem conspexit, repentino tremore ⁵ concussus, obrigescentibus membris, etiam loquelam amisit, subitoque voluntate divina per vim foras propulsus, retrogrado pede procul abductus est. Stupefactus episcopus ad Fratres festinavit, ut potuit, Deoque sibi restituente loquelam, primo verbo confessus est culpam. — Contigit tempore quodam, abbatem Monasterii sancti Iustini de episcopatu Perusii obviare famulo Christi ⁶. Quo viso, abbas devotus celeriter de equo descendit, ut et viro Dei reverentiam faceret et de salute animae aliqua cum ipso conferret. Tandem, habita collatione suavi, abbas abscedens orari pro se humiliter petiit. Cui vir Deo carus respondit: « Orabo libenter ». Parum itaque discedente abbate, dixit fidelis Franciscus ad socium: « Expecta, Frater, modicum, quia debitum volo solvere, quod promisi ». Orante autem illo, subito abbas insolitum calorem et dulcedinem hactenus inexper tam sensit in spiritu, ita quod in excessu mentis effectus, totus a se ipso in Deum defecit. Parva morula substitit, et in se reversus, virtutem orationis sancti Francisci cognovit. Maiori proinde circa Ordinem semper amore flagravat multisque factum pro miraculo retulit.

6. Solitus erat vir sanctus Horas canonicas non minus timorate Deo persolvere quam devote. Nam licet oculorum, stomachi, splenis et hepatis aegritudine laboraret; nolebat tamen muro vel parieti inhaerere, dum psalleret, sed Horas semper erectus et sine caputio, non gyrovagis oculis, non cum aliqua syncopa ⁷ persolvebat. Si quando esset in itinere constitutus, figebat tunc temporis gressum, huiusmodi consuetudinem reverentem et sacram propter pluviarum inundantiam non omittens. Dicebat enim: « Si quiete comedit corpus cibum suum futurum cum ipso vermium esca, cum quanta pace ac tranquillitate accipere debet anima cibum vitae »? Graviter etiam se putabat offendere, si quando orationi deditus, vanis phantasmatibus interius vagaretur. Cum aliquid tale accideret, non parcebat confessioni, quin illud protinus expiaret. Hoc studium sic in usum converterat, ut rarissime muscas huiusmodi pateretur. — Fecerat in Quadragesima quadam

¹ Illud Ps. 16, S. seq. Cfr. Wadding., loc. cit., ad an. 1213, n. 9.

² Cfr. Wadding., loc. cit., ad an. 1208, n. 12. — Vocibus *coram positam* edd. interserunt *se*. — Infra cfr. Ps. 50, 8.

³ Ita ABCDEIM; F *alienus existeret*, G *evacuaretur*, edd. *evacuaret*.

⁴ Acta SS. *Exsecrationes* (secundum Du Cange, Glossarium etc. idem ac *Exsecrationes*).

⁵ Edd. *timore*. Inferius pro *restituente loquelam* Vat. et ed. 1 *restituente linguam*.

⁶ Cfr. Wadding., loc. cit., ad an. 1218, n. 8.

⁷ Id est sine interruptione, vel mutilatione; cfr. Du Cange, Glossarium etc.: Est autem *syncopare*, scindere, seu potius intersecare, Gallis *entre couper*. ... *Syncopare*, verba non omnino pronuntiare, sed ea quasi secare, quomodo *couper les mots* dicimus.

vasculum unum, ut minutias temporis, ne omnino exciderent, occuparet. Quod cum dicenti Tertiam in memoriam veniens, paululum ipsius animum distraxisset; motus fervore spiritus, vasculum igne consumpsit, dicens: « Sacrificabo illud Domino, cuius sacrificium impeditur ». Psalmos cum tanta mentis ac spiritus attentione dicebat, quasi Deum praesentem haberet; et cum nomen Domini in ipsis occurreret, prae suavitatis dulcedine labia sua lingere videbatur. — Ipsum quoque Domini nomen non solum cogitatum, verum etiam prolatum et scriptum, reverentia volens honorificare praecipua, Fratribus persnasit aliquando, ut omnes schedulas scriptas, ubique repertas colligerent mundoque loco reponerent, ne forte sacrum illud nomen ibi scriptum contingeret conculcari¹. Nomen autem Iesu cum exprimeret vel audiret, inbilo quodam repletus interior, totus videbatur exterius alterari, ac si mellifluus sapor gustum, vel harmonicus sonus ipsius immutasset auditum².

7. Contigit autem anno tertio ante obitum suum³, ut memoriam nativitatis pueri Iesu ad devotionem excitandam apud castrum Graecii disponeret agere, cum quanta maiori solemnitate valeret. Ne vero hoc novitati posset ascribi, a Summo Pontifice petita et obtenta licentia, fecit praeparari praeseptum, apportari foenum, bovem et asinum ad locum adduci.

Advocantur Fratres, adveniunt populi, personat silva voces, et venerabilis illa nox luminibus copiosis et claris laudibusque sonoris et consonis et splendens efficitur et sollemnis. Stabat vir Dei coram praeseptio pietate repletus, respersus lacrymis et gaudio superflusus. Celebrantur Missarum sollemnia super praeseptum, levita Christi Francisco sacrum Evangelium decantante. Praedicat deinde populo circumstanti de nativitate pauperis Regis, quem, cum nominare vellet, puerum de Bethlehem prae amoris teneritudine nuncupabat. — Miles autem quidam virtuosus et verax, qui, propter Christi amorem saeculari relicta militia, viro Dei magna fuit familiaritate coniunctus, dominus Ioannes de Graecio, se vidisse asseruit puerulum quendam valde formosum in illo praeseptio dormientem, quem beatus pater Franciscus, ambobus complexans brachiis, excitare videbatur a somno. — Hanc quidem⁴ devoti militis visionem non solum videntis sanctitas credibilem facit, sed et designata veritas comprobatur, et miracula subsequuta confirmant. Nam exemplum Francisci consideratum a mundo excitativum est cordium in fide Christi torpentium, et foenum praeseptii reservatum a populo mirabiliter sanativum fuit⁵ brutorum languentium et aliarum repulsivum pestium diversarum, glorificante Deo per omnia servum suum sanctaeque orationis efficaciam evidentibus miraculorum prodigiis demonstrante.

Notandum.

Comprobatur miraculo.

CAPITULUM XI.

*De intelligentia Scripturarum et spiritu prophetiae*⁶.

1. Ad tantam autem mentis serenitatem indefessum orationis studium cum continua exercitatione virtutum virum Dei perduxerat, ut, quamvis non habuerit sacrarum litterarum peritiam per doctrinam, aeternae tamen lucis irradiatus fulgoribus, Scripturarum profunda miro intellectus scrutaretur acumine. Penetrabat enim ab omni labe purum ingenium mysteriorum abscondita, et ubi magistralis scientia foris stat, affectus introibat amantis. Legebatur quandoque in libris sacris, et quod animo semel iniecerat tenaciter imprimebat memoriae, quia non frustra mentalis attentionis percipiebat auditu quod continuae devotionis ruminabat affectu. Quaerenti-

bus aliquando Fratribus, ntrum sibi placeret, quod litterati iam recepti ad Ordinem intenderent studio sacrae Scripturae, respondit: « Mihi quidem placet, dum tamen exemplo Christi, qui magis orasse legitur quam legisse, orationis studium non omittant nec tantum⁷ studeant, ut sciant, qualiter debeant loqui, sed ut audita faciant, et cum fecerint, aliis facienda proponant. Volo, inquit, Fratres meos discipulos evangelicos esse sicque in notitia veritatis proficere, quod in simplicitatis puritate concrescant, ut simplicitatem columbinam a prudentia serpentina non separent, quas Magister eximius ore suo benedicto coniunxit⁸ ».

Commendat studium cum devotione.

¹ Cfr. Testamentum S. Francisci: Et sanctissima nomina eius et verba scripta, ubicumque invenero in locis illicitis, volo colligere et rogo, quod colligantur et in loco honesto collocentur. — Vat. et ed. 1 omittunt *ibi scriptum*. Superius pro *honorificare* edd. *honorare*, et pro *schedulas* codd. secundum antiquum scribendi modum substituunt *cedulas* (cfr. Du Cange, Glossarium etc.).

² Cfr. Wadding., loc. cit., ad an. 1223, n. 19. — Superius pro *harmonicus* Vat. et ed. 1 *harmoniacus*.

³ Anno 1223; cfr. Wadding. ad hunc annum, n. 20. (vide

etiam ad an. 1217, n. 16.). — Inferius pro *novitati* edd. *levitati*.

⁴ Edd. *Hanc siquidem*.

⁵ Codd. omittunt *fuit*.

⁶ Cfr. Thom. a Celano, Vita I. p. I. c. 48. et p. II. c. 2-4. 7-10. 48; ac p. III. c. 45. et 64. In cod. H hoc capitulum dividitur in novem lectiones.

⁷ Vat. cum ed. 1 *nec tamen*.

⁸ Matth. 10, 16: Estote ergo prudentes sicut serpentes et simplices sicut columbae. Cfr. Wadding., loc. cit., ad an. 1220, n. 26.

2. Interrogatus Senis a quodam religioso viro, theologiae sacrae doctore, de quibusdam quaestionibus difficilibus intellectu, tanta claritate doctrinae divinae sapientiae patefaciebat arcana, ut vehementer stupeat vir ille peritus et cum admiratione referret: « Vere theologia sancti Patris istius, puritate ac contemplatione tanquam alis in altum subvecta, est aquila volans; nostra vero scientia ventre graditur super terram ». Licet enim esset imperitus sermone, scientia tamen plenus enodabat dubia quaestionum et *abscondita producebat in lucem*¹. Nec absonum, si vir sanctus Scripturarum a Deo intellectum acceperat, cum per imitationem Christi perfectam veritatem ipsarum descriptam gestaret in opere et per sancti Spiritus unctionem plenariam doctorem earum apud se haberet in corde².

3. Adeo etiam in ipso claruit spiritus prophetiae, ut et praevideret futura et cordium contueretur occulta, absentia quoque velut praesentia cerneret et se praesentem absentibus mirabiliter exhiberet. Tempore namque, quo Damiatam Christianorum obsidebat exercitus, aderat vir Dei, non armis, sed fide munitus³. Cum igitur die belli Christiani pararentur ad pugnam, hoc audito, Christi servus vehementer ingemuit dixitque socio suo: « Si belli fuerit attentatus congressus, ostendit mihi Dominus non prospere cedere Christianis; verum, si hoc dixero, fatuus reputabor; si tacuero, conscientiam non evadam. Quid ergo tibi videtur? » Respondit socius eius dicens: « Frater, pro minimo tibi sit, ut ab hominibus iudicaris⁴, quia non modo incipis fatuus reputari. Exonera conscientiam tuam et Deum magis time quam homines ». Quo audito, exsiliens Christi praeco salutaribus monitis Christianos aggreditur, prohibet bellum, denuntiat casum. Fit veritas in fabulam, induraverunt cor suum et noluerunt reverti. Itur, committitur⁵ et bellatur, totaque in fugam vertitur militia christiana, finem belli opprobrium regerens, non triumphum. Tanta vero strage Christianorum imminutus est numerus, ut circa sex millia fuerint inter mortuos et captivos. In quo evidenter innotuit, quod spernenda non erat sapientia pauperis; cum *anima viri iusti enuntiet aliquando vera, quam septem circumspectores sedentes in excelso ad speculandum*⁶.

4. Alio quoque tempore, cum post reversionem ipsius de ultra mare Celanum⁷ praedicaturus accederet, miles quidam supplici eum devotione cum instantia magna invitavit ad prandium. Venit itaque ad militis domum, omnisque familia pauperum hospitum exsultavit ingressu⁸. Ante vero quam cibum sumerent, iuxta solitum morem vir mente devotus offerens Deo preces et laudes, oculis stabat elevatis in caelum. Oratione completa, benignum hospitem familiariter advocatum in partem sic allocutus est: « Ecce, frater hospes, tuis victus precibus; ut manducarem, domum tuam intravi. Meis nunc cito monitis acquiesce, quoniam non hic, sed alibi manducabis. Confitere nunc peccata tua, verae poenitentiae dolore contritus, nec in te remaneat quidquam, quod veridica confessione non pandas. Reddet tibi Dominus hodie vicem, quoniam tanta devotione suos pauperes suscepisti ». Acquievit continuo vir ille sermonibus Sancti, socioque ipsius universa peccata in confessione detegens, *disposuit domum suam*⁹ et ad mortem suscipiendam se, quantum valuit, praeparavit. Intraverunt tandem ad mensam, et incipientibus aliis manducare, hospes subito spiritum exhalavit, iuxta verbum hominis Dei repentina morte sublatu. Sicque factum est, hospitalitatis misericordia promerente, ut iuxta verbum Veritatis¹⁰ *Prophetam recipiens mercedem Prophetae acciperet*; dum per sancti viri praenuntiationem propheticam miles ille devotus sibi contra mortis subitationem providit, quatenus, armis poenitentiae praemunitus, perpetuam damnationem evaderet et in aeterna tabernacula introiret.

5. Tempore, quo vir sanctus Reate iacebat infirmus¹¹, praebendarius quidam nomine Gedeon, lubricus et mundanus, infirmitate gravi correptus et lectulo decubans, cum ad eum fuisset delatus, lacrymose rogabat cum simul astantibus, ut ab ipso crucis signaculo signaretur. Ad quem ille: « Cum vixeris olim secundum desideria carnis, non veritus iudicia Dei, quomodo te cruce signabo? Verum propter devotas intercedentium preces, signo te crucis signabo in nomine Domini. Tu tamen scito, te graviora passurum, si ad vomitum redieris¹² liberatus. Propter peccatum enim ingratitude semper peiora prioribus inferuntur ». Signo itaque crucis

¹ Iob 28, 14: Profunda quoque fluviorum scrutatus est et abscondita in lucem produxit. Cfr. Wadding., loc. cit., ad an. 1226, n. 3.

² Epist. I. Ioan. 2, 20: Sed vos unctionem habetis a Sancto et nostis omnia; cfr. ibid. v. 27.

³ Vide supra c. 9. n. 7. seq., ubi etiam nomen socii insinuatur, scil. Fr. Illuminati. Cfr. Wadding., loc. cit., ad an. 1219, n. 56. seq. — Inferius pro congressus Vat. cum ed. 4 ingressus.

⁴ Epist. I. Cor. 4, 3: Mihi autem pro minimo est, ut a vobis iudicer etc.

⁵ Pro *Itur*, committitur Acta SS. *Igitur committitur*.

⁶ Eccli. 37, 18: Anima viri sancti enuntiat etc. Vat. cum ed. 4 annuntiet.

⁷ Inter Marsorum populos in Latio, ut vult Wadding., loc. cit., ad an. 1225, n. 10. Oppidum hoc est prope lacum *Fucinum* in Aprutio Ulteriori, in regno Neapolitano. — Nomine *militis* intelligi potest vir nobilis; cfr. supra pag. 525, nota 8.

⁸ Vat. cum ed. 4 in ingressu.

⁹ Isai. 38, 1: Dispone domui tuae, quia morieris tu, et non vives. — Superius pro sermonibus Sancti A sermonibus sanctis.

¹⁰ Matth. 10, 41. — Superius pro hospitalitatis misericordia edd. hospitalitatis gratia. Inferius pro praenuntiationem Vat. cum ed. 4 pronuntiationem.

¹¹ Cfr. Wadding., loc. cit., ad an. 1225, n. 8. — Inferius pro et lectulo F in lectulo, edd. lectulo.

¹² Cfr. supra pag. 529, nota 6.

super eum facto, statim qui contractus iacuerat surrexit sanus, et in laudem Dei prorumpens: « Ego, inquit, sum liberatus ». Insonuerunt autem ossa renum eius, audientibus multis¹, veluti cum manu ligna sicca franguntur. Paucis autem interlapsis temporibus, Dei oblitus, corpus impudicitiae reddidit; cumque sero quodam coenasset in domo cuiusdam canonici nocteque illa dormiret ibidem, subito super omnes corruit tectum domus. Ceteris autem evadentibus mortem, solus miser ille interceptus atque interemptus est. Iusto igitur Dei iudicio facta sunt *novissima hominis illius peiora prioribus*² propter ingratitude vitium Deique contemptum, cum de accepta venia gratum esse oporteat, et duplo displiceat flagitium iteratum.

6. Alio quoque tempore mulier quaedam nobilis, Deo devota venit ad Sanctum, ut suum ei explicaret dolorem ac remedium postulatet. Habebat quidem virum valde crudelem, quem adversarium patiebatur in servitio Christi; et ideo petebat a Sancto, quatenus oraret pro illo, ut sua Deus cor ipsius dignaretur emollire clementia. Ipse vero hoc audiens, ait illi: « Vade cum pace, indubitanter expectans de viro tuo consolationem tibi de proximo affuturam ». Et adiecit: « Dices ei ex parte Dei et mea, quod nunc est tempus clementiae, postmodum aequitatis ». Benedictione accepta, revertitur mulier, invenit virum, denuntiat verbum. Cecidit super eum Spiritus sanctus et novum factum de veteri sic facit cum omni mansuetudine respondere: « Domina, serviamus Domino et salvemus animas nostras ». Suadente igitur sancta uxore, pluribus annis coelibem vitam agentes, eodem die ambo ad Dominum migraverunt³. — Miranda certe in viro Dei spiritus prophetici *virtus*, qua et membris iam arentibus restituebat vigorem et duris imprimebat cordibus pietatem, quamquam non minus eiusdem spiritus sit stupenda *limpiditas*, qua sic futurorum praecognoscebat eventum, ut etiam conscientiarum scrutaretur arcanum, quasi alter Eliseus duplicem Eliae spiritum assecutus⁴.

7. Nam cum Senis viro cuidam sibi familiari quaedam superventura finaliter praedixisset, et vir ille peritus, de quo supra⁵ mentio facta est, quod de Scripturis cum eo conferebat aliquando, his auditis, ab eodem sancto Patre dubitando perquireret, an haec ipse dixisset, quae illius viri relatione cognoverat; non solum se illa dixisse asseruit, verum etiam quaerenti alienum eventum proprium exitum prophetando praedixit. Quod ut certius cordi eius

imprimeret, quendam secretum conscientiae illius scrupulum, quem nulli viventi vir praefatus expresserat, et mirabiliter revelando explicuit et salubriter consulendo resecauit⁶. Ad quorum omnium firmitatem accedit, quod vir ille religiosus, sicut Christi famulus ei praedixit, sic finaliter consummavit.

8. Eo quoque tempore, quo revertebatur de *Sextum.* ultra mare, socium habens fratrem Leonardum de Assisio, contigit, eum fatigatum et lassum parumper asellum conscendere. Subsequens autem socius, et ipse non modicum fessus, coepit dicere intra se, humanum aliquid passus: « Non de pari ludebant parentes huius⁷ et mei. En, ipse equitat, et ego pedester asinum eins duco ». Haec illo cogitante, protinus de asino descendit vir sanctus et ait: « Non, Frater, convenit, ut ego equitem, tu venias pedes, quia nobilior et potentior in sacculo me fuisti⁸ ». Obstupuit illico Frater et rubore suffusus, deprehensum se recognoscens, procidit ad pedes ipsius, et lacrymis irrigatus, nudum exposuit cogitatum veniamque poposcit.

9. Frater quidam⁹ Deo devotus et famulo Christi frequenti cogitatione versabat in pectore, superna fore gratia dignum, quem vir sanctus familiari complecteretur affectu, quem vero tanquam extraneum reputaret extra numerum electorum reputandum a Deo. Cum igitur, cogitationis huiusmodi crebrius vexatus impulsu, viri Dei familiaritatem vehementer optaret, nec tamen cordis sui secretum revelaret alicui, advocans eum ad se dulciter Pater pius, sic allocutus est: « Nulla te turbet cogitatio, fili, quoniam te carissimum habens, inter praecipue mihi caros libenter tibi munus meae familiaritatis et dilectionis impendo ». Miratus exinde Frater factusque devotior ex devoto, non solum in amore¹⁰ crevit hominis sancti, verum etiam per Spiritus sancti gratiae munus donis est maioribus cumulatus. — Cum autem *Octavum.* in Monte maneret Alvernae cella reclusus, unus e sociis¹¹ magno desiderio cupiebat habere de verbis Domini aliquod scriptum manu ipsius breviter annotatum. Gravem enim qua vexabatur tentationem non carnis, sed spiritus ex hoc credebatur evadere, vel certe levius ferre. Tali desiderio languens, anxiebatur interius, quia, verecundia victus, reverendo Patri rem pandere non audebat. Sed cui homo non dixit, Spiritus revelavit. Portari namque sibi iussit a Fratre praedicto atramentum et chartam laudesque Domini iuxta Fratris desiderium propria manu scripsit et ultimo benedictionem ipsius¹², dicens: « Accipe

¹ Edd. *audientibus cunctis*.

² Math. 12, 45.

³ Cfr. Wadding., loc. cit., ad an. 1224, n. 2. — Superius fide codd. supplevimus *omni*.

⁴ Cfr. IV. Reg. 2, 9. seqq.

⁵ Num. 2. Cfr. Wadding., loc. cit., ad an. 1226, n. 4.

⁶ Edd. *reservavit*.

⁷ Edd. *eius*. Inferius pro *Haec* Vat. cum ed. 1 *Hoc*.

⁸ Edd. *tu me fuisti*.

S. Bonav. — Tom. VIII.

⁹ Riccius sive Richerius, ut insinuat Thom. a Celano; Vita I. p. I. c. 18. — Inferius pro *huiusmodi* Acta SS. *huius*.

¹⁰ Vat. cum nonnullis codd. et ed. 1 *in amore*.

¹¹ Fr. Leo, ut refert Wadding., loc. cit., ad an. 1224, n. 7. — Inferius pro *aliquod scriptum* K *aliquid scriptum*.

¹² Num. 6, 24-26: « Benedicat tibi Dominus et custodiat te; ostendat Dominus faciem suam tibi et misereatur tui; convertat Dominus vultum suum ad te et det tibi pacem ». Illic benedictioni secundum Wadding., loc. cit., praemissa fuit littera T

tibi chartulam istam et usque ad diem mortis tuae custodias diligenter». Accipit Frater donum illud optatum, et statim omnis illa tentatio effugatur. Servatur littera, et cum in posterum miranda effecerit, virtutum Francisci testimonium fuit.

Nonum. 10. Frater quidam erat, quantum a foris videbatur, sanctitate praeclarus, conversatione insignis, tamen admodum singularis. Omni tempore orationi vacans, tanta districtione silentium observabat, quod consueverat non verbis, sed nutibus confiteri. Accidit autem, sanctum Patrem venire ad locum videre Fratrem et de ipso cum aliis Fratribus habere sermonem. Commendantibus autem omnibus et magnificantibus illum respondit vir Dei: «Sinite, Fratres, ne mihi in eo diabolica figmenta laudetis. In veritate sciatis, quod diabolica tentatio est et deceptio fraudulenta». Dure acceperunt hoc Fratres, tanquam impossibile indicantes, quod tot perfectionis indicibus fraudis se commenta fucarent¹. Verum non post multos dies, eo Religionem egresso, evidenter apparuit, quanta luculentia interioris contuitus vir Dei cordis eius secreta perspexit. — Multorum quoque per hunc modum, qui stare videbantur, ruinam, sed et plurium perversorum conversionem ad Christum immobili veritate praenuntians, appropinquasse videbatur ad aeternae lucis speculum contemplandum, cuius fulgore mirabili absentia corporaliter, tanquam si essent praesentia, mentis eius cernebat obtutus².

Decimum. 11. Quodam namque tempore Vicarius suus tenebat Capitulum, ipse vero in cella orans, *sequester* erat *et medius* inter Fratres et Deum³. Cum igitur unus ex ipsis, defensionis quodam contextus pallio, non se subderet disciplinae; videns hoc vir sanctus in spiritu, vocavit quandam de Fratribus et dixit ad eum: «Vidi, Frater, diabolum super illius Fratris inobedientis dorsum, collum eius tenentem astrictum, qui tali sessore subactus, obedientiae freno spreto, instinctus eius sequebatur habenas. Et cum rogarem Deum pro Fratre, subito daemon confusus abscessit. Vade igitur et dic Fratri, ut obedientiae sanctae iugo collum sine mora submittat». Monitus per internuntium Frater statimque conversus ad Deum, ad pedes Vicarii humiliter se proiecit.

Undecimum. 12. Alio quoque tempore contigit, duos Fratres ad eremitorium Graecii de remotis venire, ut virum Dei cernerent et benedictionem multo desideratam

iam tempore reportarent. Venientes et non invenientes, quia de publico iam ad cellam redierat, desolati abibant. Et ecce, recedentibus illis, cum de ipsorum adventu vel recessu nihil secundum humanum sensum percipere potuisset, praeter solitum morem egressus e cella, clamavit post eos et ipsos⁴, iuxta quod optaverant, signo crucis facto in Christi nomine benedixit.

13. Duo Fratres venerunt aliquando de Terra Laboris⁵, quorum antiquior nonnulla intulit scandala iuniori. Cum autem pervenissent ad Patrem, quaesivit ille a iuniore, qualiter erga ipsum se Frater socius habuisset in via. Quo respondente: «Utique satis bene», subiunxit: «Cave, Frater, ne sub humilitatis specie mentiaris; scio enim, scio; sed expecta modicum et videbis». Miratus est perplurimum Frater, quomodo tam absentia per spiritum cognovisset. Igitur non post multos dies, contempta Religionem, foras egreditur qui scandalum fecerat Fratri et a Patre non petierat veniam nec correctionis debitam receperat disciplinam. Simulque duo in una illius claruere ruina: aequitas scilicet divinae iustitiae et perspicacitas spiritus prophetiae.

14. Qualiter autem absentibus se praesentem exhibuit, divina faciente virtute, evidenter ex superioribus⁶ innotescit, si revocetur ad mentem, qualiter absens in curru igneo Fratribus transfiguratus apparuit, et quomodo se Arelatensi Capitulo in crucis effigie praesentavit. Quod factum esse divina dispositione credendum est, ut ex praesentiae corporalis apparitione mirabili patenter claresceret, quam praesens et pervius spiritus eius luci sapientiae foret aeternae, quae *omnibus mobilibus mobilior est et ubique attingens propter sui munditiam per nationes in animas sanctas se transfert et Dei amicos et prophetas constituit*⁷. Simplicibus enim et parvulis sua pandere solet mysteria Doctor excelsus, sicut prius apparuit in David, Prophetarum eximio, et post in Apostolorum principe Petro et tandem in pauperculo Christi Francisco. Hi enim, cum essent litterarum imperitia simplices, facti sunt sancti Spiritus eruditione illustres: is quidem *pastor*, ut gregem pasceret Synagogae de Aegypto eductum⁸; iste *piscator*, ut sagenam repletet Ecclesiae multiformitate credentium; hic autem *negotiator*, ut *margaritam emeret* evangelicae vitae, venditis et dispersis omnibus propter Christum.

(thau; cfr. supra pag. 515, nota 5.) et in fine additum: Dominus benedicat Fratrem Leonem. — Cod. 1 *benedictionem suam*. Inferius pro *Accipit* edd. *Accepit*.

¹ Vat. cum ed. 1 *fusarent*.

² Cfr. Wadding, loc. cit., ad an. 1220, n. 33; ibid. n. 32. de seq. facto, et insinuat, Vicarium fuisse Petrum Cathanum.

³ Deut. 5, 5, ubi Moyses ait: Ego sequester et medius fui inter Dominum et vos. — Inferius pro *pallio* edd. *pallio*.

⁴ Vat. cum ed. 4 omittit *ipsos*.

⁵ Regni Neapolitani provincia in ora maris Tyrrheni. — Cfr. Wadding, loc. cit., ad an. 1218, n. 4.

⁶ Cap. 4. n. 4. et 10.

⁷ Sap. 7, 24. et 27. — Matth. 11, 25: Confiteor tibi, Pater, Domine caeli et terrae, quia abscondisti haec a sapientibus et prudentibus et revelasti ea parvulis. — Post *Simplicibus* Vat. cum ed. 1 omittit *enim*.

⁸ Libr. II. Reg. 5, 2: Tu pasces populum memm Israel etc. Matth. 13, 45-47. assimilatur regnum caelorum *negotiatori* quarenti bonas margaritas etc., et *sagenae* missae in mare et ex omni genere piscium congreganti.

CAPITULUM XII.

*De efficacia praedicandi et gratia sanitatum*¹.

1. Fidelis re vera famulus et minister Christi Franciscus, ut cuncta fideliter et perfecte perageret, illis potissime virtutum exercitiis intendebat, quae, sacro dictante Spiritu, Deo suo magis placere cognoverat. Qua de re contigit, illum in magnam dubitationis cuiusdam agoniam incidere, quam multis diebus ab oratione rediens terminandam Fratribus sibi familiaribus proponebat. « Quid, inquit, Fratres, consulitis, quid landatis? An quod orationi vacem, an quod praedicando discurram? Siquidem ego parvulus, simplex et *imperitus sermone*² maiorem orandi accepi gratiam quam loquendi. Videtur etiam in oratione lucrum et cumulatio gratiarum, in praedicatione distributio quaedam donorum caelitus acceptorum; in oratione etiam purificatio interiorum affectuum et unio ad unum, verum et summum bonum cum vigoratione virtutis; in praedicatione spiritualium pulverizatio pedum, distractio circa³ multa et relaxatio disciplinae. Tandem in oratione Deum alloquimur et audimus et quasi angelicam vitam agentes, inter Angelos conversamur; in praedicatione multa oportet condescensione uti ad homines et humane inter eos vivendo, humana cogitare, videre, dicere et audire. Sed unum est in contrarium, quod videtur praeponderare his omnibus ante Deum, quod videlicet unigenitus Dei Filius, qui est sapientia summa, propter animarum salutem de sinu Patris descendit, ut, suo mundum informans exemplo, verbum salutis hominibus loqueretur, quos sacri sanguinis et pretio redimeret et emundaret lavacro⁴ et poculo sustentaret, nihil sibi omnino reservans, quod non in salutem nostram liberaliter erogaret. Et quia nos debemus omnia facere *secundum exemplar* eorum, quae videmus in ipso tanquam in monte sublimi; videtur magis Deo placitum, quod intermissa quiete, foras egrediar ad laborem ». Cumque per multos dies verba huiusmodi ruminaret cum Fratribus, certitudinaliter nequibat percipere, quid horum sibi foret ut Christo vere acceptius eligendum. Cum enim miranda nosset per spiritum prophetiae, hanc per se ipsum quaestionem dissolvere non valebat ad liqui-

dum, Deo melius providente, ut praedicationis meritum per supernum manifestaretur oraculum, et servi Christi humilitas servaretur⁵.

2. Non erubescere a minoribus parva quare vere minor, qui magna didicerat a Magistro supremo. Studio namque praecipuo solitus erat exquirere, quali via qualique modo Deo posset secundum ipsius beneplacitum perfectius deservire. Haec summa eius philosophia, hoc summum eius desiderium exstitit, quoad vixit, ut quaereret a sapientibus et simplicibus, perfectis et imperfectis, parvulis et grandaevis, qualiter ad perfectionis culmen virtuosius pervenire valeret. — Assumens itaque duos ex Fratribus, misit ad Fratrem Silvestrum, qui crucem egredientem viderat de ore ipsius⁶ et tunc in monte supra Assisium ingiter orationi vacabat, ut divinum super dubitatione huiusmodi responsum perquireret, quod sibi ex parte Domini demandaret. Hoc ipsum mandavit⁷ sacrae virgini Clarae, ut per aliquam puriorem et simpliciore de virginibus sub ipsius disciplina degentibus, et ipsa cum Sororibus aliis orans, super hoc exquireret Domini voluntatem. Concordaverunt autem mirabiliter in id ipsum, superno eis revelante Spiritu, venerabilis sacerdos et virgo Deo dicata, beneplaciti scilicet esse divini, quod Christi praeco ad praedicandum exiret. — Revertentibus itaque Fratribus⁸ et Dei, iuxta quod acceperant, indicantibus voluntatem, exsurgens continuo succinxit se, nulla prorsus contracta mora, iter aggressus est. Ibat autem cum tanto fervore, ut divinum exsequeretur imperium, tamque celeriter percurreret, ac si, facta manu Domini super eum, novam induisset e caelo virtutem⁹.

3. Cum igitur appropinquaret Bevanio¹⁰, ad quendam locum devenit, in quo diversi generis avium maxima multitudo convenerat. Quas cum Sanctus Dei vidisset, alacriter cucurrit ad locum et eas velut rationis participes salutavit. Omnibus vero expectantibus et convertentibus se ad eum, ita ut quae in arbustis erant, inclinatis capitibus, cum appropinquaret ad eas, insolito modo in ipsum intenderent,

Continuatio.

Zelus eius in praedicando.

Praedicat avibus.

¹ Cfr. Thom. a Celano, Vita I. p. I. c. 17. 21. 23-26.

² Epist. II. Cor. 11, 6.

³ Cod. A cura. Inferius pro *Deum alloquimur* B C F Domini *alloquimur*.

⁴ Eph. 5, 26: Mundans lavacro aquae in verbo vitae. — Subinde respicitur Exod. 25, 40: Inspice et fac secundum exemplar, quod tibi in monte monstratum est. Inferius vocibus *quia debemus fide* codd. interserimus nos.

⁵ Cfr. Wadding., loc. cit., ad an. 1212, n. 28. seqq., ubi etiam de iis quae infra usque ad n. 4. proponuntur.

⁶ Vide supra c. 3. n. 5. — Inferius pro *supra Assisium* A G *super Assisium*.

⁷ Edd. *demandavit*.

⁸ Philippo et Massaco, ut notat Wadding., loc. paulo superius cit.

⁹ Ezech. 1, 3: Et facta est super eum ibi manus Domini. Luc. 24, 49: Sedete in civitate, quoadusque induamini virtute ex alto.

¹⁰ Id est Bevagna, oppidum in Umbria; Vat. cum pluribus codd. et ed. 1 *Bevanium*.

usque ad eas accessit et omnes, ut verbum Dei audirent, sollicite admonuit, dicens: « Fratres mei volucres, multum debetis laudare Creatorem vestrum, qui plumis vos induit et pennas tribuit ad volandum, puritatem concessit aëris et sine vestra sollicitudine vos gubernat ». Cum autem eis haec et his similia loqueretur, aviculae modo mirabili gestientes coeperunt extendere colla, protendere alas, aperire rostra et in illum attente respicere. Ipse vero cum spiritus fervore mirando per medium ipsarum transiens, tunica contingebat easdem, nec tamen de loco aliqua mota est, donec, signo crucis facto et licentia data, cum benedictione viri Dei omnes insimul avolarunt ¹. Haec omnia contuebantur socii expectantes in via. Ad quos reversus vir simplex et purus, pro eo quod non hactenus avibus praedicaverat, coepit se de negligentia inculpare.

Indicit hirundinibus silentium.

4. Exinde praedicando per loca vicina procedens, venit ad castrum quoddam nomine Alvianum ², ubi, congregato populo et indicto silentio, propter hirundines nidificantes in eodem loco magnisque garritibus perstreptentes audiri vix poterat. Quas vir Dei, audientibus omnibus, allocutus est dicens: « Sorores meae hirundines, iam tempus est, ut loquar et ego, quia vos usque modo satis dixistis. Audite verbum Dei, tenentes silentium, donec sermo Domini compleatur ». At illae tanquam intellectus capaces subito tacuerunt nec fuerunt motae de loco, donec fuit omnis praedicatio consummata. Omnes igitur, qui viderunt, stupore repleti, glorificaverunt Deum. Istius miraculi fama circumquaque diffusa multos ad Sancti reverentiam et fidei devotionem accendit.

Miraculum simile.

5. In civitate namque Parmensi ³ scholaris quidam indolis bonae cum sociis aliis studio diligenter intentus, dum importuna garrulitate cuiusdam infestaretur hirundinis, dicere coepit ad socios: « Haec hirundo una de illis est, quae virum Dei Franciscum praedicantem aliquando, donec silentium eis imponeret, molestabant »; et conversus ad hirundinem fiducialiter ait: « In nomine servi Dei Francisci praecipio tibi, ut ad me veniens continuo conticescas ». At illa, Francisci audito nomine, quasi viri Dei disciplinis edocta, et statim conticuit et ipsius manibus tanquam tutae custodiae se commisit. Stupefactus scholaris, statim eam libertati restituit et eius garritum amplius non audivit.

6. Alio quoque tempore, cum famulus Dei Caietae ⁴ semel in maris littore praedicaret, turbis prae devotione irruentibus, ut eum contingerent; horrens Christi servus tantum populorum applausum, in unam haerentem littori naviculam prosilivit solus. Illa vero, tanquam si rationis particeps ⁵ motore moveretur intrinseco sine aliquo remige, cernentibus et mirantibus cunctis, se longius a terra protraxit. Cum autem aliquanto spatio in maris altitudinem secessisset, stetit inter fluctus immobilis, quamdiu vir sanctus turbis expectantibus in littore praedicavit. Cumque, audito sermone et viso miraculo ac benedictione accepta, multitudo cederet ⁶, ne ipsum amplius molestaret; navicula proprio ductu ad terram reversa est. — Quis igitur tam obstinatae mentis esset et impiae, quod praedicationem Francisci contemneret, cuius miranda fiebat virtute, ut non solum carentia ratione disciplinam suscipere, verum etiam inanimata corpora tanquam animata praedicanti servirent?

7. Aderat equidem servo suo Francisco, ad quaecumque pergeret, is qui eum *unxerat et miserat, Spiritus Domini* ⁷ et ipse *Dei virtus et sapientia Christus*, ut sanae doctrinae verbis afflueret et magnae potentiae miraculis coruscaret. Erat enim verbum eius velut ignis ardens ⁸, penetrans intima cordis, omniumque mentes admiratione replebat, cum non humanae inventionis ornatum praetenderet, sed divinae revelationis afflatum redoleret. Nam cum semel, praedicaturus coram Papa et cardinalibus, ad suggestionem domini Ostiensis sermonem quendam studiose compositum commendasset memoriae stetitque in medio, ut aedificationis verba proponeret; sic oblivioni tradidit omnia, ut effari aliquid omnino nesciret. Verum, cum hoc veridica humilitate narrasset, conferens se ad sancti Spiritus gratiam invocandam, tam efficacibus subito coepit verbis effluere tamque potenti virtute illorum mentes virorum sublimium ad compunctionem inflectere, ut aperte clareret, quod non ipse, sed Spiritus Domini loquebatur ⁹.

8. Et quoniam sibi primo suaserat opere quod aliis suadebat sermone, reprehensorem non timens, veritatem fidentissime praedicabat. Nesciebat aliquorum culpas palpare, sed pungere, nec vitam fovere peccantium, sed aspera increpatione ferire. Eadem mentis constantia magnis loquebatur et parvis eademque spiritus incunditate paucis loquebatur et multis.

¹ Vat. cum ed. 1 et nonnullis codd. perperam *advolarunt*.

² Alvianum olim dictum, in modico colle haud procul amne Tiberi in Umbria exstructum, non longe a Tudertina [Todi] civitate, ut ait Wadding., loc. cit., ad an. 1212, n. 32, ubi etiam de iis quae infra n. 5. proponuntur.

³ Edd. *Parisiensi*.

⁴ Italice Gaëta. Plures codd. *Gaietae*. Cfr. Wadding., loc. cit., ad an. 1222, n. 6. — Inferius pro *irruentibus* edd. *ruentibus*.

⁵ Edd. cum nonnullis codd. *particeps*.

⁶ Edd. *recederet*. Inferius Vat. cum ed. 1 omittit *tam*, et subinde pro quod Vat. substituit *qui*, Acta SS. ut.

⁷ Isai. 61, 1: Spiritus Domini super me, eo quod unxerit Dominus me, ad annuntiandum mansuetis misit me etc.; cfr. Luc. 4, 18. — Subinde allegatur I. Cor. 4, 24: Christum Dei virtutem et Dei sapientiam.

⁸ Eccli. 48, 1: Et surrexit Elias Propheta quasi ignis, et verbum ipsius quasi facula ardebat.

⁹ Cfr. Wadding., loc. cit., ad an. 1217, n. 3. Editores Act. SS. insinuant, quod S. Franciscus hunc sermonem habuit coram Honorio III. Pontifice et sacro cardinalium collegio an. 1223. — Superius pro *effluere* (ita A) edd. cum aliis codd. *affluere*.

Omnis aetas omnisque sexus properabat virum novum mundo caelitus datum et cernere et audire¹. Ipse vero per diversas regiones progrediens, evangelizabat ardentem, *Domino cooperante et sermonem confirmante sequentibus signis*². In virtute namque nominis eius veritatis praeco Franciscus eiciebat daemonia, sanabat infirmos, et quod maius est, sui sermonis efficacia obstinatorum mentes ad poenitentiam mollebat simulque sanitatem corporibus reddebat et cordibus, sicut aliqua comprobant operum eius exempli gratia inferius adnotanda.

9. In civitate Tuscanella³ a milite quodam hospitio devote susceptus, filium eius unicum a natiuitate contractum ad multam ipsius instantiam, manu allevans, sic subito incolumem reddidit, ut, videntibus cunctis, protinus consolidarentur omnia corporis membra, et puer, sanus effectus et fortis, confestim exsurgeret *ambulans et exsiliens et laudans Deum*⁴.

In civitate Narniensi cum paralyticum quendam membrorum omnium destitutum officio, signo crucis a capite usque ad pedes ad instantiam signasset episcopi, perfecte restituit sanitati⁵.

In episcopatu Reatino puer quidam sic turgidus a quatuor annis, ut nullo modo propria crura cernere posset, a matre cum lacrymis praesentatus eidem, statim, ut vir sanctus tetigit eum manibus sacris, incolumis est effectus.

Apud civitatem Ortensem puer unus ita conglomeratus, ut caput pedibus portaret applicitum et haberet ossa nonnulla contracta, signo crucis ad parentum lacrymales preces ab eodem suscepto, subito extensus exstitit et illico liberatus⁶.

10. Mulier quaedam civitatis Eugubii ambas contractas et aridas habens manus adeo, ut nihil per illas operari valeret, signo crucis ab eodem in nomine Domini sibi facto tam perfectam obtinuit sospitatem, quod statim rediens domum, cibos in ministerium eius et pauperum quasi altera socrus Simonis⁷ propriis manibus praepararet.

Puellae cuidam in castro Bevanii⁸ oculorum privatae luminibus, cum in Trinitatis nomine sputo suo ter ipsius oculos linivisset, lumen concupitum restituit.

Mulier quaedam civitatis Narnii oculorum caecitate percussa, signum crucis ab eodem suscipiens, lucem recuperavit optatam⁹.

Bononiae puer quidam unum oculorum macula adeo habens obtectum, ut nihil prorsus videre posset, nec aliquo adiuvari remedio, post signum crucis a capite usque ad pedes per servum Domini sibi factum visum recuperavit tam limpidum, ut, postmodum Ordinem Fratrum Minorum ingressus, se longe clarius videre assereret de oculo prius infirmo quam de oculo semper sano.

In castro sancti Gemini¹⁰ servus Dei a quodam devoto viro susceptus hospitio, cuius uxor a daemonio vexabatur, post orationem factam in virtute obedientiae imperavit daemone, ut exiret, eumque potestate divina tam subito effugavit, ut vere claresceret, quod obedientiae sanctae virtuti pervicacia daemonum non obsistat.

In civitate de Castello¹¹ quidam furibundus et nequam spiritus quamdam obsidens mulierem, a viro sancto obedientiae accepto mandato, indignabundus discessit, mente simul et corpore liberam obsessam prius feminam derelinquens.

11. Frater quidam infirmitate tam horribili gravabatur, ut magis esse vexatio daemonis quam naturalis infirmitas a pluribus firmaretur. Nam totus saepe allidebatur et *volutabatur spumans*¹², membris corporis nunc contractis, nunc extensis, nunc plicatis, nunc tortis, nunc rigidis effectis et duris. Quandoque totus extensus et rigidus, pedibus aequatis capiti levabatur in altum, horribiliter illico relapsurus. Hunc sic miserabiliter et irremediabiliter aegrotantem plenus misericordia Christi servus commiserans, buccellam sibi panis, de quo edebat, transmisit. Tantam vero gustatus panis contulit aegro virtutem, ut deinceps huius infirmitatis molestiam non sentiret¹³.

In comitatu Aretii cum diebus pluribus mulier quaedam laborasset in partu essetque iam proxima morti, nullum omnino desperanti de vita supererat remedium nisi Dei. Cum autem equo vectus propter corporis infirmitatem Christi famulus per partes illas transitum habuisset, contigit, reduci animal per villam, in qua mulier torquebatur. Homines vero loci, viso equo, cui vir sanctus insederat, extraxerunt frenum, ut superponerent mulieri; ad cuius contactum mirificum, omni remoto periculo, mulier illico peperit cum salute.

Vir quidam de Castro Plebis¹⁴ religiosus ac timens Deum chordam apud se, qua cinctus fuerat

¹ Cfr. Wadding., loc. cit., ad an. 1211, n. 4.

² Marc. 16, 20. — Aliquanto inferius pro *annotanda* K M *annotata*.

³ Urbs Phaliscorum Etruscorum ad dextram lacus Volsinii, ditionis pontificiae, ut notat Wadding., loc. cit., ad an. 1222, n. 4, ubi etiam pro *milite* substituit *equite*; cfr. supra pag. 525, nota 8.

⁴ Act. 3, 8.
⁵ Cfr. Wadding., loc. cit., ad an. 1213, n. 49. — Superius pro *In civitate* codd. *Civitate*. Cod. E quatuor sequentia miracula omittit.

⁶ Cfr. Wadding., loc. cit.

⁷ Vide Matth. 8, 14, seq.

⁸ Cfr. supra pag. 539, nota 10. Codd. C D G H et Acta SS.

Mevanii (F *Mevaniae*). Cfr. Wadding., loc. cit., ad an. 1212, n. 31, ubi notat, quod *Bevanium* sit « Plinio et Propertio, qui hoc oppido natus est, *Mevania* ».

⁹ Cfr. Wadding., loc. cit., ad an. 1213, n. 49.

¹⁰ In episcopatu Narniensi (nunc Interamnae), ut refert Thom. a Celano, Vita I. p. I. c. 25. Cfr. Wadding., loc. cit., ad an. 1213, n. 49, seq.

¹¹ In Umbria (Città di Castello).

¹² Simile refertur Marc. 9, 49.

¹³ Cfr. Wadding., loc. cit., ad an. 1224, n. 28, ubi etiam n. 3, seq. miraculum narratur.

¹⁴ In Umbria (Castello di Pieve). Secundum Thom. a Celano, Vita I. p. I. c. 22, vir ille vocabatur Gualfredutius.

sanctus Pater, habebat. Cumque multitudo virorum ac mulierum in castro illo variis infirmitatibus laboraret, ibat per infirmantium domus, et intincta chorda in aqua, dabat bibere patientibus, sicque per hunc modum plurimi sanabantur. Sed et de panibus a viro Dei contactis gustantes aegroti, divina operante virtute, consequebantur celeriter remedia sanitatum.

12. Cum his et aliis multis miraculorum prodigiis praeco Christi praedicans coruscaret, attendebatur his quae dicebantur ab eo, ac si Angelus Domini loqueretur. Excellens namque in ipso praerogativa virtutum, prophetiae spiritus, efficacia miraculorum, oraculum de praedicando caelitus datum,

obedientia creaturarum ratione carentium, vehemens immutatio cordium ad verborum ipsius auditum, eruditio eius a Spiritu sancto praeter humanam doctrinam, praedicandi auctoritas a Summo Pontifice non sine revelatione concessa, insuper et Regula, in qua forma praedicandi exprimitur, ab eodem Christi Vicario confirmata¹, summi quoque Regis signacula per modum sigilli corpori eius impressa tanquam testimonia decem toti saeculo indubitanter affirmant, Christi praeconem Franciscum et venerandum officio et doctrina authenticum et admirabilem sanctitate, ac per hoc tanquam vere Dei nuntium Christi Evangelium praedicasse.

CAPITULUM XIII.

*De stigmatibus sacris*².

1. Mos erat angelico viro Francisco nunquam otiari a bono, quin potius instar spirituum supernorum in scala Iacob aut ascendebat in Deum, aut descendebat ad proximum³. Nam tempus sibi concessum ad meritum dividere sic prudenter dixerat, ut aliud proximorum lucris laboriosis impenderet, aliud contemplationis tranquillis excessibus dedicaret. Unde cum secundum exigentiam locorum et temporum alienae condescendisset procurandae saluti, inquietationibus derelictis turbarum, solitudinis secreta petebat locumque quietis, quo liberius Domino vacans, extingeret, si quid pulveris sibi ex conversatione hominum adhaesisset. Biennio itaque, antequam spiritum redderet caelo⁴, divina providentia duce, post labores multimodos perductus est in *locum excelsum seorsum*, qui dicitur Mons Alvernae. Cum igitur iuxta solitum morem Quadragesimam ibidem ad honorem sancti Archangeli Michaelis ieiunare coepisset⁵, supernae contemplationis dulcedine abundantius solito superfusus ac caelestium desideriorum ardentiori flamma succensus, supernarum coepit immissionum cumulatius dona sentire. Ferebatur quidem in altum, non ut curiosus *maiestatis perscrutator opprimendus a gloria*⁶, sed tanquam *servus fidelis et prudens*, investigans beneplacitum Dei, cui se conformare omnimode summo peroptabat ardore.

2. Immissum est igitur menti eius per divinum oraculum, quod in apertione libri evangelici revelaretur ei a Christo, quid⁷ Deo in ipso et de ipso maxime foret acceptum. Oratione itaque cum multa devotione praemissa, sacrum Evangeliorum librum de altari sumtum in sanctae Trinitatis nomine aperiri fecit per socium⁸, virum utique Deo devotum et sanctum. Sane cum in trina libri apertione Domini passio semper occurreret, intellexit vir Deo plenus, quod sicut Christum fuerat imitatus in actibus vitae, sic conformis ei esse deberet in afflictionibus et doloribus passionis, antequam ex hoc mundo transiret. Et licet propter multam austeritatem vitae praeteritae crucisque dominicae baiulationem continuam imbecillis esset iam corpore, nequaquam est territus, sed ad martyrii sustentiam vigorosius animatus. Excreverat siquidem in eo insuperabile amoris incendium boni Iesu in *lampades ignis atque flammarum*, ut *aquae multae caritatem eius* tam validam *extinguere non valerent*⁹.

3. Cum igitur seraphicis desideriorum ardoribus sursum ageretur in Deum et compassiva dulcedine in eum transformaretur, qui ex caritate nimia voluit crucifigi; quodam mane circa festum Exaltationis sanctae Crucis¹⁰, dum oraret in latere montis, vidit Seraph unum sex alas habentem tam ignitas quam

¹ Cfr. supra c. 3. n. 10. in fine.

² Cfr. Thom. a Celano, Vita I. p. I. c. 18, et p. II. c. 3; Vita II. p. II. c. 40. et p. III. c. 75-77; Legenda trium Sociorum, c. 47.

³ Gen. 28, 12: Viditque [Iacob] in somnis scalam... Angelos quoque Dei ascendentes et descendentes per eam. Cfr. Wadding., loc. cit., ad an. 1224, n. 2.

⁴ Anno 1224. Cfr. Wadding., loc. cit., ad an. 1224, n. 15. seqq. — Subinde respicitur Matth. 47, 1. seq., ubi Christus duxit Petrum, Iacobum et Iohannem « in montem excelsum seorsum et transfiguratus est ante illos ».

⁵ Cfr. supra pag. 530, nota 10.

⁶ Prov. 23, 27: Sicut qui mel multum comedit, non est ei bonum; sic qui scrutator est maiestatis opprimetur a gloria. — Matth. 24, 48: Quis, putas, est fidelis servus et prudens etc.

⁷ Acta SS. quod.

⁸ Fr. Leonem, ut notat Wadding., loc. cit., ad an. 1224, n. 9.

⁹ Cant. 8, 6. seq. Cfr. Wadding., loc. cit., n. 34. seqq. — Superius pro *siquidem* (ita K) edd. cum aliis codd. *quidem*.

¹⁰ Quod celebratur 14. Sept. — De Seraph sex alas habente cfr. Isai. 6, 2.

Ita praedicatio eius redidit athenica.

Sollicitudo in usu temporis.

Ultimo accedit ad Montem Alvernae.

Revelatio proximo cum C...

App. Seraph. clix.

splendidas de caelorum sublimitate descendere. Cumque volatu celerrimo pervenisset ad aëris locum viro Dei propinquum, apparuit inter alas effigies hominis crucifixi, in modum crucis manus et pedes extensos habentis et cruci affixos. Duae alae super caput ipsius elevabantur, duae ad volandum extendebantur, duae vero totum velabant corpus. Hoc videns, vehementer obstupuit, mixtumque moerore gaudium cor eius incurrit. Laetabatur quidem in gratioso aspectu, quo a Christo sub specie Seraphi cernebat se conspici, sed crucis affixio compassivi doloris gladio ipsius animam pertransibat¹. Admirabatur quam plurimum in tam inscrutabilis visionis aspectu, sciens, quod passionis infirmitas cum immortalitate spiritus seraphici nullatenus conveniret. Intellexit tandem ex hoc, Domino revelante, quod ideo huiusmodi visio sic divina providentia snis fuerat praesentata conspectibus, ut amicus Christi praenosceret, se non per martyrium carnis², sed per incendium mentis totum in Christi crucifixi similitudinem transformandum. Disparens igitur visio mirabilem in corde ipsius reliquit ardorem, sed et in carne non minus mirabilem signorum impressit effigiem. Statim namque in manibus eius et pedibus apparere coeperunt signa clavorum, quemadmodum paulo ante in effigie illa viri crucifixi conspexerat. Manus enim et pedes in ipso medio clavis confixi³ videbantur, clavorum capitibus in interiori parte manuum et superiori pedum apparentibus, et eorum acuminibus existentibus ex adverso; erantque clavorum capita in manibus et pedibus rotunda et nigra, ipsa vero acumina oblonga, retorta et quasi reperiussa, quae de ipsa carne surgentia carnem reliquam excedebant. Dextrum quoque latus quasi lancea transfixum rubra cicatrice obductum erat, quod saepe sanguinem sacram effundens, tunicam et femoralia respergebat.

4. Cernens autem Christi servus, quod stigmata carni tam luculenter impressa socios familiares latere non possent; timens nihilominus publicare Domini sacramentum⁴, in magno positus fuit dubitationis agone, utrum videlicet quod viderat diceret, vel taceret. Vocavit proinde aliquos ex Fratribus, et generalibus verbis loquens, dubium coram eis proposuit et consilium requisivit. Quidam vero ex Fratribus, gratia illuminatus⁵ et nomine, intelligens, quod aliqua miranda vidisset, pro eo quod videbatur admodum stupefactus, dixit ad virum sanctum: «Frater, non solum propter te, verum etiam propter alios, scias, tibi ostendi aliquando sacramenta divina. Ti-

endum propterea iure videtur, ne, si quod pluribus profuturum accepisti celaveris, pro talento abscondito reprehensibilis iudicaris». Ad cuius verbum motus vir sanctus, licet alias dicere solitus esset⁶: *Secretum meum mihi*; tunc tamen cum multo timore seriem retulit visionis praefatae, addens, quod is qui sibi apparuerat, aliqua dixerit, quae nunquam, dum viveret alicui hominum aperiret. Credendum sane, tam arcana illa fuisse sacri illius Seraphi in cruce mirabiliter apparentis eloquia, quod forte non liceret *hominibus* ea loqui⁷.

5. Postquam igitur verus Christi amor *in eandem imaginem transformavit* amantem, quadraginta dierum numero, iuxta quod decreverat, in solitudine consummato, superveniente quoque solemnitate Archangeli Michaelis⁸, descendit angelicus vir Franciscus de monte, secum ferens Crucifixi effigiem, non in tabulis lapideis vel ligneis manu figuratam artificis, sed in carneis membris descriptam *digito Dei vivi*. Et quoniam *sacramentum Regis abscondere bonum est*⁹, ideo secreti regalis vir conscius signacula illa sacra pro viribus occultabat. Verum, quia Dei est ad gloriam suam magna revelare, quae facit, Dominus ipse, qui signacula illa secrete impresserat, miracula quaedam aperte per ipsa monstravit, ut illorum occulta et mira vis stigmatum manifesta pateret claritate signorum.

6. In provincia namque Reatina pestis invaluerat valde gravis, quae boves et oves omnes sic consumeat crudeliter, quod nullum poterat remedium adhiberi. Vir autem quidam timens Deum nocte fuit per visionem commonitus, ut ad eremitorium Fratrum festinanter accederet et loturam manuum ac pedum famuli Dei Francisci, qui tunc temporis morabatur ibidem, acceptam super animalia cuncta respergeret. Mane itaque surgens, venit ad locum, loturaque huiusmodi per socios sancti viri latenter obtenta, oves et boves languentes ex ea respersit. Mirabile dictu! Statim ut aspersio animalia languida et in terra iacentia quantumcumque paululum attingebat, pristino recuperato vigore, surgebant continuo, et tanquam nihil mali sensissent, ad pascua festinabant. Sicque factum est, ut per virtutem mirandam aquae illius, quae sacras plagas contigerat, omnis prorsus plaga cessaret, pestilensque morbus a gregibus fugaretur.

7. Circa praefatum Montem Alvernae, antequam vir sanctus ibi contraheret moram, nube ex ipso monte surgente, grandinis violenta tempestas fructus

Miracolum
sociis timide
manifestat.

Descendit de
monte.

Dens stigma-
ta miraculis
comprobat.

Miracolum
primum.

Secundum.

¹ Luc. 2, 35: Et tuam ipsius animam pertransibit gladius.

² Ad quod, ut supra n. 2. in fine dicitur, vigorosius erat animatus. — Superius pro *huiusmodi* A *huius*. Inferius pro *sed et in carne* BDE *sed in carnem*.

³ Codd. I M *crucifixi*, edd. cum pluribus codd. *confixae*.

⁴ Tob. 12, 7: Etenim sacramentum regis abscondere bonum est.

⁵ Cfr. supra pag. 532, nota 6.

⁶ Cum Isaia 24, 16.

⁷ Epist. II. Cor. 12, 4: Et audiavi arcana verba, quae non licet homini loqui. — Superius pro *sacri* A *sacra*.

⁸ Cuius Dedicatio celebratur 29. Sept. — Supra respicitur II. Cor. 3, 18; et infra Exod. 31, 18: Deditque Dominus Moysi, completis huiusmodi sermonibus in monte Sinai, duas tabulas testimonii lapideas, scriptas digito Dei.

⁹ Tob. 12, 7; cfr. supra nota 4. Vide Wadding., loc. cit., ad an. 1224, n. 21. seqq.

terrae consuetudinarie devastabat. Sed post illam apparitionem felicem non sine incolarum admiratione grando cessavit, ut caelestis illius visionis excellentiam et stigmatum ibidem impressorum virtutem serenata¹ praeter morem ipsa caeli facies declararet.

Contigit quoque, eum tempore hiemali propter debilitatem corporis et asperitatem viarum hominis unius pauperis subvectum asello sub rupis cuiusdam prominentis pernoctare crepidine, ut nivis et noctis supervenientium quoquo modo declinaret incommoda, quibus praepeditus, ad hospitii locum non valuerat pervenire. Cum autem vir sanctus hominem illum querulosis submurmurante gemitibus hinc inde se ipsum iactare sensisset, tanquam qui tenui operimento contextus, quiescere prae frigoris acerbitate nequibat; divini amoris fervore succensus, manu illum protensa palpavit. Mirabile certe! Repente ad illius sacrae manus contactum, quae seraphici calculi² gerebat incendium, omni fugato frigore, tantus in virum intus et extra calor advenit, ac si quaedam in eum vis flammea ex fornacis spiraculo processisset. Nam illico et mente confortatus et corpore, suavius inter saxa et nives usque mane dormivit, quam unquam in proprio lecto pausaverat, sicut ipse postmodum asserebat. — Certis itaque constat indicis, sacra illa signacula illius impressa fuisse virtute, qui operatione seraphica purgat, illuminat et inflamat³, cum ipsa forinsecus expurgando a peste salutem, serenitatem et calorem corporibus efficacia mira conferrent, sicut et post mortem evidentioribus est demonstratum prodigiis suo loco posterius⁴ annotandis.

8. Ipse vero, licet *thesaurum inventum in agro*⁵ multa diligentia studeret abscondere, latere tamen non potuit, quin aliqui stigmata manuum viderent ac pedum, quamquam manus quasi semper portaret contextas et pedibus ex tunc incederet calceatis. Viderunt enim, dum viveret, Fratres plurimi, qui, licet essent propter sanctitatem praecipuam viri per omnia fide digni, tamen ad omne dubium amovendum, sic esse ac se vidisse, tactis sacrosanctis,

iuramento firmarunt. Viderunt etiam ex familiaritate, quam cum viro sancto habebant, aliqui cardinales⁶, laudes sacrorum stigmatum prosis et hymnis ac antiphonis, quas ad ipsius ediderunt honorem, veraciter inserentes, qui tam verbo quam scripto perhibuerunt testimonium veritati. Summus etiam Pontifex dominus Alexander⁷, cum populo praedicaret coram multis Fratribus et me ipso, affirmavit, se, dum Sanctus viveret, stigmata illa sacra suis oculis conspexisse. Viderunt in morte plus quam quinquaginta Fratres virgoque Deo devotissima Clara cum ceteris Sororibus suis et saeculares innumeri, ex quibus, quemadmodum suo loco dicitur⁸, quam plurimi et osculati sunt ex devotionis affectu et contrectaverunt manibus ad testimonii firmitatem. — Vulnus autem lateris tam sollicitè occultavit, ut illud nemo posset nisi furtim contueri, dum viveret. Unus etenim Frater⁹, qui ei sedule ministrare solitus erat, cum pia enim cautela, ut ad excutiendum extraheret tunicam, induxisset, attente respiciens vidit plagam, cui etiam tres veloci contactu digitos applicans, tam visu quam tactu vulneris quantitatem agnovit. Consimili cautela vidit etiam Frater ille, qui tunc temporis erat Vicarius eius¹⁰. Frater vero socius mirandae simplicitatis, dum infirmitatis causa languentes scapulas contrectaret, manu per caputium missa et casualiter vulnere sacro illapsa, magnum ei dolorem infixit. Proinde portabat ex tunc femoralia ita facta, ut usque ad ascellas¹¹ pertingerent ad vulnus lateris contegendum. Fratres quoque, qui illa lavabant vel tunicam excutiebant pro tempore, quia inveniebant ea sanguine rubricata, indubitanter per evidens signum in cognitionem sacri vulneris pervenerunt, quod postmodum in morte revelata facie et ipsi cum aliis plurimis contemplati simul et venerati sunt.

9. Eia nunc, strenuissime miles Christi, ipsius fer arma invictissimi Ducis, quibus munitus et insignitus¹², omnes adversarios superabis. Fer *vexillum* Regis altissimi, ad cuius intuitum omnes pugnatore divini exercitus animentur. Fer nihilominus *sigillum*

¹ Vat. cum ed. 4 *serenati*.

² Respicitur Isai. 6, 6. seq., ubi de Seraphim, qui calculo de altari accepto labia Isaiae tangens ipsum mundabat.

³ Respiciuntur tres actus hierarchici, qui a Dionysio referuntur; cfr. supra pag. 3, nota 4.

⁴ Infra de miraculis § 1.

⁵ Matth. 13, 44. Cfr. Wadding., ad an. 1224, n. 23. seq.

⁶ Cfr. Wadding., loc. cit., ad an. 1228, n. 78, ubi praeter Pontificem Gregor. IX. (qui composuit hymnum « Proles de caelo prodiit », antiphonas « Sancte Francisce, propera » et « Plange, turba pauperula »; prosam « Caput draconis »), adducuntur e cardinalibus Otho Candidus (qui fecit responsorium: « De paupertatis horreo »; hymnos: « In caelesti collegio » et « Decus morum, dux Minorum »), Thomas Capuanus (qui fecit responsorium: « Carnis spicam » et antiphonam: « Salve, sancte Pater »), Bainerius Capoccini (qui fecit hymnum: « Plaudite, turba pauperula »), Stephanus de Casa nova (qui fecit antiphonam: « Caelorum candor splenduit »).

⁷ Scilicet quartus; cfr. ipsius Bolla *Benigna operatio* (apud Wadding., Annal. tom. II. ad an. 1255, n. 9.), ad quam recurrit idem Pontifex in alio Brevi *Quia longum esset* (ibid. ad an. 1259, n. 2.).

⁸ Infra c. 15. n. 3. seq.

⁹ Ioannes de Laudibus; cfr. *Analecta Franciscana*, tom. III. pag. 225. seq. et Wadding., loc. cit., ad an. 1224, n. 23.

¹⁰ Fr. Elias; cfr. Thom. a Celano, Vita I. p. II. c. 3, ubi simile ei, quod immediate post adducitur et secundum Wadding., loc. cit., Fr. Leoni accidit, narratur de Fr. Rufino. — Superius pro *Consimili cautela* Acta SS. *Cum simili cautela*.

¹¹ Du Cange, Glossarium etc. *Ascella*, ascilla, assellia, axella, *axilla* [Tullio], nostris *aisselle*. Cfr. Isidor., XI. Etymolog. c. 1. n. 65. Acta SS. *axillus*, quae etiam inferius pro ea sanguine rubricata substituunt eam sanguine rubricatam.

¹² Codd. A B C D E F G M quibus munitus [B indutus] insigniter [E signifer], 1 quibus munitus, insignitus.

summi pontificis Christi, quo verba et facta tua tanquam irreprehensibilia et authentica merito ab omnibus acceptentur. Iam enim propter *stigmata Domini Iesu, quae in corpore tuo portas, nemo tibi debet esse molestus*¹, quin potius quilibet Christi servus omni esse tenetur affectione devotus. Iam per haec signa certissima, non dnobus aut tribus testibus ad sufficientiam², sed quam plurimis ad superabundantiam comprobata, *testimonia Dei* in te et per te *credibilia facta nimis* omne tollunt infidelibus excusationis velamen, dum credentes in fide stabiliunt, spei fiduciam sursum agunt et igne caritatis accendunt.

10. Iam vere impleta est *prima visio*, quam vidisti, videlicet quod dux in militia Christi futurus, armis deberes caelestibus, signo quoque crucis insignibus decorari³. Iam in *principio* tuae conversionis Crucifixi *visio* compassivi doloris gladio mentaliter te transfigens, sed et *auditus* vocis de cruce tanquam de throno Christi sublimi et secreto propitiatorio procedentis, iuxta quod tuo sacro firmasti eloquio, vera indubitanter fuisse creduntur. Iam in tuae *conversationis progressu* et crucem, quam vidit Frater Silvester⁴ ex ore tuo mirabiliter procedentem, et gladios in crucis modum tua viscera transfigentes, quos sacer vidit Pacificus, teque secundum crucis

figuram in aëre sublevatum, cum de crucis titulo sanctus praedicabat Antonius, iuxta quod perspexit angelicus vir Monaldus, non phantastica visione, sed revelatione caelica fuisse conspecta, vere creditur et firmatur. Iam denique *circa finem*, quod simul tibi ostenditur et sublimis similitudo Seraph et humilis effigies Crucifixi, interius te incendens et exterius te consignans tanquam *alterum Angelum ascendentem ab ortu solis*, qui *signum* in te habeas *Dei vivi*⁵, et praedictis dat firmitatem fidei et ab eis accipit testimonium veritatis. — Ecce, iam septem apparitionibus crucis Christi in te et circa te secundum ordinem temporum mirabiliter exhibitis et monstratis, quasi sex gradibus ad istam septimam, in qua finaliter requiesceres⁶, pervenisti. Christi namque crux in tuae conversionis primordio tam proposita quam assumpta et delinque in conversationis progressu per vitam probatissimam baiulata in te ipso continue et in exemplum aliis demonstrata tanta certitudinis claritate ostendit, evangelicae perfectionis apicem te finaliter conclusisse, ut demonstrationem hanc christianae sapientiae in tuae carnis pulvere exaratam nullus vere devotus abiiciat, nullus vere fidelis impugnet, nullus vere humilis parvipendat, cum sit vere divinitus expressa et *omni acceptione condigna*⁷.

CAPITULUM XIV.

*De patientia ipsius et transitu mortis*⁸.

1. Christo igitur iam *cruci confixus*⁹ Franciscus tam carne quam spiritu, non solum seraphico amore ardebat in Deum, verum etiam sitiabat cum Christo crucifixo multitudinem salvandorum. Faciebat proinde, quoniam propter excrescentes in pedibus clavos ambulare non poterat, corpus emortuum per civitates et castella circumvehi, ut ad crucem Christi ferendam ceteros animaret. Fratribus quoque dicebat: « Incipiamus, Fratres, servire Domino Deo nostro, quia usque nunc parum profecimus ». Flagrabat etiam desiderio magno ad humilitatis redire primordia, ut leprosis sicut a principio ministraret corpusque iam prae labore collapsum revocaret ad

pristinam servitatem. Proponebat, Christo duce, se facturum ingentia, et fatiscientibus membris, spiritu fortis et fervidus novo sperabat certamine de hoste triumphum. Neque enim languor vel desidia locum habet, ubi amoris stimulus semper ad maiora perurget. Tanta autem in eo carnis ad spiritum erat concordia, tanta obedientiae promptitudo, quod cum ille ad omnem niteretur sanctitatem pertingere, ipsa non solum non repugnaret, sed et praecurrere niteretur¹⁰.

2. Ut autem viro Dei cumulus meritorum accresceret, quae omnia vere in patientia consummantur, coepit infirmitatibus multimodis laborare tam

¹ Gal. 6, 17: De cetero nemo mihi molestus sit, ego enim stigmata Domini Iesu in corpore meo porto.

² Deut. 19, 15: In ore duorum aut trium testium stabit omne verbum. — Subinde allegatur Ps. 92, 5.

³ Cfr. supra c. 1. n. 3; ibid. n. 5. et c. 2. n. 1. de seq. propositione. — Superius pro *signo quoque* (ita A) edd. cum aliis codd. *signoque*.

⁴ Vide supra c. 3. n. 5; de visione Fr. Pacifici cfr. supra c. 4. n. 9; ibid. n. 10. de visione Fr. Monaldi. — Superius pro *conversationis* edd. *conversionis* (circa finem cap. tamen habent *conversationis*), quae etiam inferius pro *perspexit* substituit *prospexit*.

S. Bonae. — Tom. VIII.

⁵ Apoc. 7, 2: Et vidi alterum Angelum ascendentem ab ortu solis, habentem signum Dei vivi.

⁶ Edd. *requiescis*. Inferius pro *assumpta* Vat. cum ed. 1 perperam *absumpta*.

⁷ Respicitur 1. Tim. 1, 15. et 4, 9: Fidelis sermo et omni acceptione dignus.

⁸ Cfr. Thom. a Celano, Vita I. p. II. c. 9. et p. III; Legenda trium Sociorum, c. 18.

⁹ Gal. 2, 19. Cfr. Wadding., loc. cit., ad an. 1224, n. 30. — Inferius pro *castella* edd. *castra*; cfr. supra pag. 514, nota 5. in fine.

¹⁰ Codd. BCDEIM *conaretur*.

graviter, ut vix in eo membrum aliquod remaneret absque ingenti passionis dolore. Ad hoc tandem per varias et diuturnas ac continuas¹ aegritudines deductus est, ut, consumptis iam carnibus, quasi sola cutis ossibus cohaereret. Cumque duris corporis angereetur doloribus, illas suas angustias non poenarum censebat nomine, sed sororum. Cum autem semel gravius solito dolorum urgeretur aculeis, quidam Frater simplex dixit ad eum: «Frater, ora Dominum, ut mitius tecum agat; manum enim suam plus debito super te gravare videtur». Quo audito, vir sanctus cum eiulatu exclamans ait: «Nisi nossem² in te simplicem puritatem, tuum ex nunc abhorrerem consortium, qui ausus fueris circa me divina indicia reprehensibilia iudicare». Et licet totus esset attritus gravis prolixitate languoris, proiciens se in terram, ossa debilia duro casu collisit. Et deosculans humum: «Gratias, inquit, tibi ago, Domine Deus, de omnibus his doloribus meis teque, mi Domine, rogo, ut centuplum, si tibi placuerit, addas; quia hoc erit mihi acceptissimum, ut affligens me dolore, non parcas³, cum tuae sanctae voluntatis adimpletio sit mihi consolatio superplena». Videbatur propterea Fratribus, quod quasi alterum Iob viderent, cui, cum languor cresceret carnis, crescebat simul et vigor mentis. — Ipse autem obitum suum longe ante praescivit, dieque transitus imminente, dixit Fratribus, sui corporis tabernaculum deponendum in proximo, quemadmodum sibi fuerat revelatum a Christo⁴.

3. Cum itaque per biennium ab impressione scro-
 Notandum. rorum stigmatum, anno videlicet a sua conversione vigesimo⁵, multis fuisset angustiantium infirmitatum probativis tusionibus conquadatus, tanquam lapis in supernae Ierusalem aedificio collocandus et tanquam ductile opus sub multiplicis tribulationis malleo ad perfectionem adductus; ad sanctam Mariam de Portiuncula se portari poposcit, quatenus, ubi acceperat spiritum gratiae, ibi redderet spiritum vitae. Quo cum fuisset perductus, ut veritatis exemplo monstraret, quod nihil erat illi commune cum mundo, in illa infirmitate tam gravi, quae omnem languorem conclusit, super nudam humum se totum nudatum in spiritus fervore prostravit, quatenus hora illa extrema, in qua poterat adhuc hostis irasci, nudus luctaretur cum nudo⁶. Decubans sic in terra, saccina veste deposita, faciem solito more levavit in caelum, et intendens illi gloriae totus, manu sinistra

dextri lateris vulnus, ne videretur, obtexit et ait ad Fratres: «Ego quod meum est feci; quod vestrum est Christus edoceat».

4. Illacrymantibus autem sociis Sancti, qui miro
 Amorem per- quem vir Dei Guardianum suum esse dicebat, votum ipsius divina inspiratione cognoscens, festinus surrexit et acceptam cum chorda et femoralibus tunicam pauperulo Christi obtulit, dicens: «Haec tibi tanquam pauperi commodo, et tu illa suscipias obedientiae sanctae mandato». Gaudet ex hoc vir sanctus et inbilat prae laetitia cordis, quoniam fidem tenuisse dominae paupertati usque in finem se vidit, palmasque levans ad caelum, Christum suum magnificat, pro eo quod, exoneratus ab omnibus, liber vadit ad ipsum. Fecerat enim haec omnia paupertatis zelo, ut nec habitum quidem vellet habere nisi ab alio commodatum. Voluit certe per omnia Christo crucifixo esse conformis, qui pauper et dolens et nudus in cruce pependit. Propter quod et in principio conversionis suae nudus remansit coram antistite⁷ et in consummatione vitae nudus voluit de mundo exire, Fratribusque sibi assistentibus in obedientia caritatis iniunxit, ut, cum viderent, eum iam esse defunctum, per tam longum spatium nudum super humum iacere permitterent, quod unius milliarii tractum suaviter quis perficere posset. O vere christianissimum virum, qui et vivens Christo viventi et moriens morienti et mortuus mortuo perfecta esse studuit imitatione conformis et expressa promeruit similitudine decorari!

5. Hora denique sui transitus propinquante, fecit
 Conso- omnes Fratres existentes in loco ad se vocari, et eos consolatoriis verbis pro sua morte demulcens, paterno affectu ad divinum est hortatus amorem. De patientia et paupertate et sanctae Romanae Ecclesiae fide servandis sermonem protraxit, ceteris institutis sanctum Evangelium anteponebat. Circumsedentibus vero omnibus Fratribus, extendit super eos manus in modum crucis brachiis cancellatis, pro eo quod hoc signum semper amabat, et omnibus Fratribus, tam praesentibus quam absentibus, in Crucifixi virtute ac nomine benedixit. Insuper et adiecit: «Valete, filii omnes, in timore Domini et permanete in eo semper. Et quoniam futura tentatio et tribulatio appropinquat, felices, qui perseverabunt in his quae coeperunt. Ego vero ad Deum propero, cuius gratiae vos omnes commendo». Suavi huiusmodi admonitione

¹ Cod. A omittit ac continuas.

² Edd. noscerem.

³ Iob 6, 10: Et haec mihi sit consolatio, ut affligens me dolore, non pareat, nec contradicam sermonibus Sancti. Cfr. Wadding., loc. cit., ad an. 1226, n. 20.

⁴ Epist. II. Petr. 4, 14: Certus, quod velox est depositio tabernaculi mei, secundum quod et Dominus noster Iesus Christus signavit mihi. Cfr. Thom. a Celano, Vita I. p. II. c. 7, ubi insinuat, quod ante biennium Franciscus certior factus sit de hora mortis suae.

⁵ Scilicet 1226. Vide de hoc Analecta Franciscana, tom. III. pag. 32.

⁶ Gregor., II. Homil. in Evang. homil. 32. n. 2: Nihil autem maligni spiritus in hoc mundo proprium possident; nudi ergo cum nudis luctari debemus etc. — Superius cum Wadding., loc. cit., ad an. 1226, n. 34. et Act. SS. substituimus quae omnem languorem conclusit pro quae omni languori conclusit, quod habent omnes codd. hic et in Legenda minore.

⁷ Cfr. supra c. 2. n. 4.

completa, iussit vir Deo carissimus, Evangeliorum sibi codicem apportari et Evangelium secundum Iohannem, quod incipit ab eo loco ¹: *Ante diem festum Paschae*, sibi legi poposcit. Ipse vero, prout potuit, in huius Psalmi vocem erupit: *Voce mea ad Dominum clamavi, voce mea ad Dominum deprecatus sum*, et ad finem usque complevit: *Me*, inquit, *expectant iusti, donec retribuas mihi*.

6. Tandem cunctis in eum completis mysteriis, anima illa sanctissima carne soluta et in abyssum divinae claritatis absorpta, beatus vir obdormivit in Domino. Unus autem ex Fratribus et discipulis eius ² vidit animam illam beatam, sub specie stellae prae-fulgidae a candida subvectam nubecula super aquas multas in caelum recto tramite sursum ferri, tanquam sublimis sanctitatis candore praenitidam et caelestis sapientiae simul et gratiae ubertate reple- tam, quibus vir sanctus promeruit locum introire lucis et pacis, ubi cum Christo sine fine quiescit. — Minister quoque Fratrum in Terra Laboris tunc erat Frater Augustinus, vir utique sanctus et iustus, qui in hora ultima positus, cum diu iam pridem amisisset ³ loquelam, audientibus qui astabant, subito cla-

mavit et dixit: « Expecta me, Pater, expecta, ecce, iam venio tecum ». Quaerentibus Fratribus et admi- rantibus multum, cui sic loqueretur audacter, re- spondit: « Nonne videtis Patrem nostrum Franciscum, qui vadit ad caelum »? Et statim sancta ipsius ani- ma, migrans a carne, Patrem est secuta sanctissi- mum. — Episcopus Assisinas ad oratorium sancti Mi- chaelis in monte Gargano tunc temporis peregrina- tionis causa perrexerat, cui beatus Franciscus, ap- parens nocte transitus sui, dixit: « Ecce, relinquo mundum et vado ad caelum ». Mane igitur surgens episcopus sociis narravit quae vidit, et Assisium rediens, cum sollicite perquisisset, certitudinaliter comperit, quod ea hora, qua sibi per visionem inno- tuit, beatus Pater ex hoc mundo migravit. — Alau- dae aves, lucis amicae et crepusculorum tenebras horrescentes, hora transitus sancti viri, cum iam esset noctis secuturæ crepusculum, venerunt in mul- titudine magna super tectum domus et diu cum in- solita quadam inbilatione rotantes, gloriae Sancti, qui eas ad divinam laudem invitare solitus erat, tam iucundum quam evidens testimonium perhibe- bant.

Tertia.

Veniunt
multae alau-
dae.

CAPITULUM XV.

De canonizatione et translatione ipsius ⁴.

1. Franciscus igitur, servus et amicus Altissimi, Ordinis Minorum Fratrum institutor et dux, pauper- tatis professor, poenitentiae forma, veritatis praeco, sanctitatis speculum et totius evangelicae perfectionis exemplar, superna praeventus gratia, ordinato pro- gressu ab infimis pervenit ad summa. Ilunc virum mirabilem, utpote paupertate praedivitem, humilitate sublimem, mortificatione vividum, simplicitate pru- dentem omnique morum honestate conspicuum, quem in vita Dominus mirabiliter effecerat clarum, in morte fecit incomparabiliter clariorem. Beato namque viro migrante a saeculo, spiritus ille sacer domum aeter- nitatis ingrediens fontisque vitae haustu plenario glo- riosus effectus, expressa quaedam in corpore futurae gloriae signa reliquit, ut caro illa sanctissima, quae *crucifixæ cum vitiis* ⁵ *in novam iam creaturam transierat*, et passionis Christi effigiem privilegii sin-

gularitate praeferret et novitate miraculi resurre- ctionis speciem praemonstraret.

2. Cernebantur quidem in membris illis felicibus clavi ex eius carne virtute divina mirifice fabrefacti sicque carni eidem innati, quod dum a parte quali- bet premerentur, protinus quasi nervi continui et duri ad partem oppositam resultabant. Inventæ quo- que fuit patentius in ipsius corpore non inflicta hu- manitus neque facta plaga vulneris lateralis, instar vulnerati lateris Salvatoris, quod redemptionis et re- generationis humanae in ipso Redemptore nostro pro- tulit sacramentum. Erat autem similitudo clavorum nigra quasi ferrum, vulnus autem lateris rubeum et ad orbicularitatem quandam carnis contractione reductum rosa quaedam pulcherrima videbatur. Caro vero ipsius reliqua, quae prius tam ex infirmitate quam ex natura ad nigredinem declinabat, candore

Describuntur
stigmata.

¹ Cap. 13, 1. — Subinde allegatur Ps. 141, 2 seqq.

² Fr. Iacobus; cfr. *Analecta Franciscana*, tom. III, pag. 226. — Superius B omittit *in eum*.

³ Edd. *cum iam diu perdidisset*.

⁴ Cfr. Thom. a Celano, *Vita* I, p. II c. 9, et p. III; *Le- genda trium Sociorum*, c. 18. Plurimi eodd., ut A B E G M (in M principium cap. deest), etiam non collati, hoc cap. in 9 lectiones dividunt. Bonelli post finem Legendae minoris hoc capitulum cum inscriptione: « Novem Lectiones de canonizatione et de translatione S. Francisci » tanquam speciale opusculum

edidit (Supplement. etc. col. 1117 seqq.), licet ipse viderit, has lectiones verbotenus exhibere capitulum 15. Legendae maioris. Numeri novem huius capituli in nostra editione, in qua omnino secuti sumus nostros eodd., respondent lectionibus istis apud Bonelli, exceptis quarta et quinta lectionibus, quae incipiunt a propositione praecedente.

⁵ Gal. 5, 24: Qui autem sunt Christi carnem suam cruci- fixerunt cum vitiis et concupiscentiis. II. Cor. 5, 17: Si qua ergo in Christo nova creatura, vetera transierunt; ecce, facti sunt omnia nova.

nimio renitescens, illius secundae stolae¹ pulcritudinem praetendebat.

3. Membra ipsius adeo mollia et tractabilia se praebebant palpatibus, ut conversa viderentur in teneritudinem puerilis aetatis et quibusdam cernebantur evidentibus signis innocentiae decorata. Cum igitur in candidissima carne clavi nigresceret, plaga vero lateris² ut vernans roseus flos ruberet; mirandum non est, si tam formosa et miraculosa varietas iucunditatem et admirationem contuentibus ingerebat. Lacrymabantur filii pro subtractione tam amabilis Patris, sed et non modica perfundebantur laetitia, dum deosculabantur in eo signacula summi Regis. Miraculi novitas planctum vertebat in iubilum et intellectus rapiebat indaginem in stuporem. Erat quippe tam insolitum tamque insigne spectaculum contuentibus omnibus et firmamentum fidei et incitamentum amoris, audientibus vero admirationis materia et excitatio desiderii ad videndum.

4. Audito siquidem transitu Patris beati³, et fama diffusa miraculi, accelerans populus confluebat ad locum, ut id cerneret oculis carnis, quod a ratione dubium omne repelleret et affectioni gaudium cumlaret. Admissi sunt itaque cives Assinates quam plurimi ad stigmata illa sacra contemplanda oculis et labiis osculanda. Unus autem ex eis, miles quidam litteratus et prudens, Hieronymus nomine, vir utique famosus et celebris, cum de huiusmodi sacris signis dubitasset essetque incredulus quasi Thomas⁴; ferventius et audacius coram Fratribus et aliis civibus movebat clavos Sanctique manus, pedes et latus manibus propriis contrectabat, ut, dum vulnerum Christi veracia illa signa palpando contingeret, de sui et omnium cordibus omne dubietatis vulnus amputaret⁵. Propter quod et ipse inter alios huius veritatis tam certitudinaliter agnitae testis constans postmodum effectus est, et tactis sacrosanctis⁶, iuramento firmavit.

5. Fratres autem et filii, qui vocati fuerant ad transitum Patris, cum omni multitudine populorum noctem illam, in qua Christi almus confessor decessit, sic divinis laudibus dedicaverunt, ut non defunctorum exsequiae, sed Angelorum excubiae viderentur. Mane vero⁷ facto, turbae, quae convenerant, acceptis arborum ramis et cereorum multiplicatis luminibus, cum hymnis et canticis sacrum corpus

ad civitatem Assisii detulerunt. Transeuntes quoque per ecclesiam sancti Damiani, in qua virgo illa nobilis Clara, nunc gloriosa in caelis⁸, tunc inclusa cum virginibus morabatur, ibique aliquantulum subsistentes sacrum corpus, margaritis caelestibus insignitum videndum et osculandum sacris illis virginibus obtulerunt. Pervenientes denique ad civitatem cum iubilo, pretiosum thesaurum, quem portabant, in ecclesia sancti Georgii cum omni reverentia condiderunt. In eo siquidem loco puerulus litteras didicit ibique postmodum primitus praedicavit, postremo ibidem locum primum quietis accepit.

6. Transiit autem venerabilis Pater ex huius mundi naufragio anno dominicae Incarnationis millesimo ducentesimo vigesimo sexto, quarto nonas Octobris⁹, die Sabbati in sero, sepultus in die dominico. — Coepit autem vir beatus continuo, divinae faciei superirradiante respectu, magnis et multis coruscare miraculis, ut sublimitas sanctitatis eius, quae, ipso vivente in carne, ad morum directionem per exempla perfectae iustitiae innotuerat mundo, illo iam regnante cum Christo, ad omnem fidei firmitatem per miracula divinae potentiae comprobaretur e caelo. Cumque in diversis orbis partibus gloriosa eius miracula largaque per ipsum impetrata beneficia plurimos ad Christi devotionem accenderent et ad ipsius Sancti reverentiam incitarent, acclamantibus tam linguis sermonum quam operum; ad aures Summi Pontificis, domini Gregorii noni¹⁰, quae per servum suum Franciscum Deus operabatur magnalia pervenerunt.

7. Sane cum idem Pastor Ecclesiae non solum ex miraculis auditis post mortem, verum etiam experimentis in vita ipsius oculis visis et manibus contrectatis sanctitatem eius mirabilem plena fide certificatus agnosceret ac per hoc in caelis glorificatum a Domino nullatenus dubitaret; ut Christo, cuius erat Vicarius, concorditer ageret, hunc in terris reddere celebrem, tanquam omni veneratione dignissimum, pia consideratione disposuit. Ad omnem quoque certitudinem faciendam orbi terrarum de¹¹ glorificatione viri sanctissimi inventa miracula et conscripta et testibus idoneis approbata examinari fecit per illos qui minus inter cardinales favorabiles negotio videbantur. Quibus diligenter discussis et ab omnibus approbatis, de fratrum suorum et omnium

¹ Scilicet gloriae corporis. Cfr. Wadding., loc. cit., ad an. 1226, n. 41. seq.

² Vat. cum ed. 1 *lateralis*.

³ Edd. omittunt *beati*. Inferius Vat. cum ed. 1 omittit *carnis*, et subinde pro *Admissi sunt itaque* edd. substituunt *Admissi sunt igitur*.

⁴ Cfr. Ioan. 20, 24. seqq. — Superius pro *miles* (cfr. supra pag. 523, nota 8.) *quidam* Vat. cum ed. 1 et nonnullis codd. *miles quidem*.

⁵ Gregor., II. Homil. in Evang. homil. 29. n. 1. de Apostolo Thoma ait: Minus enim mihi Maria Magdalena praestitit, quae citius credidit, quam Thomas, qui diu dubitavit. Ille

etenim dubitando vulnerum cicatrices tetigit et de nostro pectore dubietatis vulnus amputavit.

⁶ Du Cange, Glossarium etc.: *Sacrosancta*, sancta Evangelia, sacrae reliquiae, crux etc. — Superius post *veritatis* I K M addunt *mirabilis*.

⁷ Ita A G; edd. *Mane autem*, quae etiam inferius pro *Transeuntes quoque* (ita A G) substituunt *Transeuntes vero*.

⁸ Mortua est an. 1253 et inter sanctas Virgines ascripta an. 1255; cfr. Wadding., tom. II. ad an. 1253, n. 9. et ad an. 1255, n. 5. seq.

⁹ Sive die 4. Octobris.

¹⁰ De quo vide supra c. 6. n. 5. in fine.

¹¹ Cod. A omittit *de*.

Mira pulcritudo corporis mortui.

Confluxus populi.

Testimonium militis Hieronymi.

Mirae exsequiae.

S. Clara corpus construitur.

Depositi corporis.

Quando mortui.

Magna miracula.

Examen.

praelatorum, qui tunc erant in curia, concordi consilio et assensu canonizandum decrevit. Veniens itaque personaliter ad civitatem Assisii anno dominicae Incarnationis millesimo ducentesimo vigesimo octavo, decimo septimo Kalendas Augusti¹, die dominico, cum maximis quae longum foret enarrare solemnibus beatum Patrem catalogo Sanctorum ascripsit.

8. Anno vero Domini millesimo ducentesimo trigesimo convenientibus Fratribus ad Capitulum generale Assisii celebratum, ad basilicam in honorem ipsius constructam corpus illud Domino dedicatum octavo Kalendas Iunii² translatus est. Dum autem ille sacer transportaretur thesaurus, bulla Regis altissimi consignatus, miracula plurima ille cuius effigiem praeferebat, operari dignatus est, ut per odorem salvificum affectus traheretur fidelium *ad currendum post Christum*³. Erat re vera condignum, ut quem Deus in vita sibi placentem et dilectum effectum in paradisum per contemplationis gratiam transtulerat

ut Henoch et ad caelum in curru igneo per caritatis zelum rapuerat ut Eliam, eius iam vernantes inter flores illos caelicos plantationis aeternae ossa illa felicia de loco suo pullulatione mirifica redolerent⁴.

9. Porro, sicut vir iste beatus mirandis virtutum signis in vita claruerat, sic et a die transitus sui usque in praesens per diversas mundi partes praeclaris miraculorum prodigiis, divina se potentia glorificante, coruscat. Nam caecis et surdis, mutis et claudis, hydropicis et paralyticis, daemoniis et leprosis, naufragis et captivis ipsius meritis remedia conferuntur, omnibusque morbis, necessitatibus et periculis subvenitur. Sed et multis mortuis per ipsum mirifice suscitatis, innotescit fidelibus *mirificans Sanctum suum*⁵ magnificentia virtutis Altissimi, cui est honor et gloria per infinita saecula saeculorum. Amen.

Miracula posteriora.

EXPLICIT VITA BEATI FRANCISCI⁶.

INCIPIUNT QUAEDAM DE MIRACULIS IPSIUS POST MORTEM OSTENSIS.

§ 1. *Et primo de virtutibus sacrorum stigmatum*⁷.

1. Ad omnipotentis Dei honorem et gloriam. Beati Patris Francisci post glorificationem ipsius in caelis aliqua ex approbatis conscripturus miracula⁸, ab illo praecipue censui sumendum fore initium, in quo crucis Iesu virtus ostenditur, et gloria innovatur. Novus igitur homo Franciscus novo et stupendo miraculo claruit, cum singulari privilegio retroactis saeculis non concesso, insignitus apparuit, sacris videlicet stigmatibus decoratus et configuratus in *corpore mortis huius corpori Crucifixi*⁹. De quo quidquid humana lingua dicatur, minus erit a laude condigna. Totum quidem viri Dei studium, tam publicum quam privatum, circa crucem Domini versabatur; et ut crucis signaculo *cordi* eius a principio suae conversionis impresso *corpus* consignaret exterius, in ipsa se cruce recludens, habitum poenitentiae sumsit crucis imaginem praeferentem¹⁰,

quatenus, sicut mens eius intus Dominum crucifixum induerat, sic et corpus eius indueret arma crucis, et in quo signo Deus potestates aëreas debellarat, in eodem suus exercitus Domino militaret. Sed et a principio temporis, quo Crucifixo militare coeperat, diversa circa eum crucis praefulsere mysteria, sicut vitae ipsius consideranti decursum clarius innotescit¹¹, qualiter apparitione crucis dominicae septiformi tam cogitatu quam affectu et actu totus fuit in Crucifixi effigiem per ipsius ecstaticum transformatus amorem. Digne igitur summi Regis clementia suis amatoribus ultra omnem aestimationem hominum condescendens, suae crucis vexillum ipsius corpori deferendum impressit, ut qui mirando fuerat crucis amore praeventus, mirando etiam fieret crucis honore mirificus.

Mysteria crucis in vita Sancti.

2. Ad huius stupendi miraculi irrefragabilem firmitatem non solum videntium et palantium testimonia per omnem modum credibilia, verum etiam apparitiones mirabiles et virtutes post ipsius obitum coruscantes ad omne mentis effugandum nubilum

Apparitiones et virtutes stigmatum.

¹ Sive die 16. Iulii. — Superius pro *Veniens itaque* edd. *Veniensque* (de Perusio).

² Sive die 25. Maii.

³ Cant. 1, 3: Trahe me, post te curremus in odorem unguentorum tuorum. — Superius post *odorem* (Vat. cum ed. 1 *ardorem*) edd. cum codd., A excepto, addunt *ipsius*.

⁴ Eccli. 46, 14: Ut sit memoria illorum in benedictione, et ossa eorum pullulent de loco suo. De Henoch cfr. Gen. 5, 24: Ambulavitque cum Deo et non apparuit, quia tulit eum Deus. De Elia vide IV. Reg. 2, 11. (cfr. supra c. 4. n. 4.). — Superius fide A substituimus *vernantes pro vernantis*.

⁵ Psalm. 4, 4: Et scitote, quoniam mirificavit Dominus sanctum suum.

⁶ Edd. contra A G I M omittunt *Explicit vita beati Francisci*. Cod. C hic desinit.

⁷ Cfr. Wadding., loc. cit., ad an. 1228, n. 12. seqq. — Edd. *De virtute sacrorum stigmatum*.

⁸ Edd., interpunctione variata, legunt: *Ad omnipotentis Dei honorem et gloriam beati Patris Francisci. Post glorificationem ipsius in caelis aliqua ex approbatis scripturis miracula*. Secuti sumus praecipue interpunctionem in A.

⁹ Rom. 7, 24: Quis me liberabit de corpore mortis huius! Phil. 3, 21: Qui reformabit corpus humilitatis nostrae configuratum corpori claritatis suae etc. — Superius pro *configuratus* A *transfiguratus*. Inferius pro *erit a laude* edd. *erit laude*.

¹⁰ Cfr. Thom. a Celano, Vita I. p. l. c. 9. in fine; vide etiam supra c. 2. n. 4. circa finem.

¹¹ Cfr. supra c. 13. n. 10. — Superius pro *praefulsere* Vat. *perfulsere*.

Apparet Pa-
pae Grego-
rio.

suffragantur. Felicis namque recordationis dominus Gregorius Papa nonus, de quo vir sanctus propheta-
tando praedixerat, quod ad dignitatem foret apostolicam sublimandus¹, antequam crucis signiferum catalogo Sanctorum ascriberet, scrupulum quendam dubitationis in corde gerebat de vulnere laterali. Nocte vero quadam, sicut ipse felix antistes referebat cum lacrymis, beatus ei Franciscus, quadam faciei praetensa duritia, in somnis apparuit et haesitationem cordis ipsius redarguens, elevavit brachium dextrum, detexit vulnus phialamque poposcit ab ipso, ut scaturientem reciperet sanguinem, qui ex latere defluebat. Obtulit in visione Summus Pontifex² phialam postulatam, quae usque ad summum sanguine profluente de latere videbatur impleri. Ex tunc ad illud sacrum miraculum tanta coepit devotione affici et aemulatione fervere, ut nullo modo pati posset, quod aliquis praefulgentia illa signa superba praesumeret impugnatione fuscare, quin eum severa increpatione feriret³.

Item, Fratri
Minori.

3. Frater quidam Ordine Minor, officio praedicator, virtutis et famae praerogativa praepollens, cui firmiter erat de Sancti stigmatibus persuasum, dum humano sensu miraculi huius apud se rationem perquireret, dubitationis coepit cuiusdam scrupulo titillari. Cum igitur per dies plurimos, sensualitate sumente vigorem, luctam⁴ huiusmodi pateretur; nocte dormienti sanctus Franciscus pedibus lutulentis apparuit, humiliter durus et patienter iratus. « Et quae sunt, ait, ista in te conflictationum certamina, quae dubitationum sordes? *Vide manus meas*⁵ et pedes meos ». Cumque ille videret manus confixas, lutulentorum pedum stigmata non videbat. « Remove, inquit, lutum a pedibus meis et cognosce loca clavorum ». Quos cum ille apprehendisset devote, lutum sibi videbatur abstergere locaque clavorum manibus contrectare. Continuo, ut evigilat, lacrymis irrigatur et priores affectus quodam modo lutulentos tam lacrymarum profluvio quam publica confessione detergit.

Factum mirum quoad
imaginem
Sancti.

4. In urbe Roma matrona quaedam, morum claritate ac parentum gloria nobilis, sanctum Franciscum in suum elegerat advocatum, ipsius habens depictam imaginem in secreto cubiculo, ubi *Patrem in abscondito exorabat*⁶. Die vero quadam cum orationi vacaret, considerans imaginem Sancti sacra illa signa stigmatum non habentem, dolere coepit non modicum et mirari. Sed non mirum, si in pictura non erat quod pictor omiserat. Cumque per

plures dies, quid causae foret defectus huiusmodi mente sollicita pertractaret; ecce, subito die quadam apparuerunt signa illa mirifica in pictura, sicut in aliis ipsius Sancti imaginibus pingi solent. Tremefacta illa filiam suam Deo devotam protinus advocavit, requirens, si absque stigmatibus usque tunc imago fuisset. Affirmat illa et iurat, sic olim sine stigmatibus⁷ exstitisse et nunc vere cum stigmatibus apparere. Verum, quia mens humana semetipsam frequenter impellit, ut cadat, et in dubium revocat veritatem; subintrat iterum cor mulieris dubitatio noxia, ne forte sic fuisset imago a principio consignata. At Dei virtus, ne primum contemneretur miraculum, addidit et secundum. Continuo namque disparentibus signis illis, nudata privilegiis imago remansit, ut per sequens signum fieret probatio praecedentis.

5. In Catalaunia quoque apud Ilerdam⁸ accidit, virum quendam nomine Ioannem beato Francisco devotum quodam sero per quandam incedere viam, in qua pro inferenda morte latitabant insidiae, non quidem ipsi, qui inimicitias non habebat, sed alteri cuidam, qui videbatur similis eius et tunc erat in comitatu ipsius. Exsurgens autem quidam de insidiis, cum hostem suum hunc esse putaret, tam letaliter eum plagis pluribus⁹ gladiavit, ut nulla prorsus superesset spes recuperandae salutis. Siquidem primo inflicta percussio humerum cum brachio pene totum absciderat, et ictus alius sub mammilla tantam reliquerat aperturam, ut flatus inde procedens circa sex candelas simul iunctas exstingeret. Cum igitur iudicio¹⁰ medicorum ipsius impossibilis esset curatio, pro eo quod, putrescentibus plagis, ex eis foetor tam intolerabilis exhalaret, ut etiam ipsa eius uxor vehementer horreret, nullisque iam humanis iuvare posset remediis; convertit se ad beati Patris Francisci patrocinium quanta poterat devotione poscendum, quem et inter ipsos ictus una cum beata Virgine fidentissime invocarat¹¹. Et ecce, misero in lectulo calamitatis solitario decubanti, cum Francisci nomen vigilans et eiulans frequentius replicaret, astitit quidam in habitu Fratris Minoris, per fenestram, ut ei videbatur, ingressus. Qui vocans eum ex nomine, dixit: « Quia fiduciam habuisti in me, ecce, Dominus liberabit te ». A quo cum aeger, quis esset, inquireret¹², Franciscum ille se esse respondit et statim appropians vulnere illius ligaturas resolvit et eum unguento per omnes plagas, ut videbatur, perunxit. Statim autem, ut sensit illarum sacrarum manuum stigmatum Salvatoris virtute sanare

Sanat gr
vissim v
ner.

¹ Cfr. supra pag. 321, nota 6. et c. 13. n. 7.

² In A secunda manus male substituit *Summo Pontifici*.

³ De hac visione vide Wadding., loc. cit., ad an. 1228, n. 3, qui etiam ad an. 1237, n. 1. seqq. tria Brevia eiusdem Pontificis de stigmatibus S. Francisci affert, in quibus ipsa stigmata commendantur et defenduntur contra impugnantes. — Superius vocibus *illa signa* edd. interserunt *sacra*.

⁴ Edd. *luctamen*. Cod. E hanc visionem omittit.

⁵ Ioan. 20, 27.

⁶ Matth. 6, 6. — Inferius pro *cum orationi vacaret* edd. *dum orationi vacaret*.

⁷ Edd. *et iurat, olim sine illis sacris stigmatibus*. Inferius A omittit *iterum*, et pro *contemneretur* edd. substituunt *contemneret*.

⁸ Nunc *Lerida* appellatur.

⁹ Edd. cum paucis codd. *plurimis*.

¹⁰ Edd. *consilio*.

¹¹ Vat. cum ed. 1 *invocaret*.
¹² Edd. *requireret*. Inferius pro *ille se esse* Acta SS. *illum se esse*.

valentium suavem contactum, expulsa putredine, restituta carne et vulneribus solidatis, restitutus est integre pristinae sospitati. Quo facto, beatus Pater abscessit. Et ipse sentiens se sanatum et in vocem divinae laudis et beati Francisci laetanter erumpens, vocavit uxorem. At illa celerius currens et stare iam videns quem sepeliendum credebatur in crastino, cum esset stupore vehementer¹ perterrita, viciniam totam clamore complevit. Accurrentes autem sui, cum illum niterentur tanquam phreneticum in lecto reponere, et ille econtra renitens assereret et ostenderet se sanatum; tanto sunt stupore attoniti, ut quasi sine mente omnes effecti, phantasticum esse crederent quod videbant, quia quem paulo ante conspexerant plagis atrocissimis laniatum et totum iam marcidum plena cernebant incolumitate iucundum. Ad quos ille qui factus fuerat sanus: «Nolite timere, inquit, nolite credere inane quod cernitis, quia sanctus Franciscus modo a loco recessit et illarum sacrarum manuum tactu me integre ab omni plaga curavit». Crebrescente tandem huius miraculi, accelerat populus omnis et videntes in tam aperto prodigio stigmatum beati Francisci virtutem, admiratione simul et gaudio replebantur. Christique signiferum magnis laudum praeconiis extollebant. — Digne quidem beatus Pater, carne iam mortuus et vivens cum Christo, praesentiae suae ostensione mirabili et manuum sacrarum palpatione suavi vulnerato letaliter viro sanitatem concessit, cum illius in se stigmata tulerit, qui, misericorditer moriens et mirabiliter surgens, vulneratum genus humanum et *semivivum relictum* plagarum suarum virtute sanavit².

6. Apud Potentiam, Apuliae civitatem, erat quidam clericus Rogerus³ nomine, vir honorabilis et ecclesiae maioris canonicus. Illic, cum infirmitate quassatus, die quadam ecclesiam oraturus intrasset, in qua erat imago beati Francisci depicta, gloriosa stigmata repraesentans, coepit de illius sublimitate miraculi tanquam de re omnino insolita et impossibili dubitare. Subito igitur, dum mente plagatus, interiorius cogitaret inania, in palma sinistrae manus sub chirotheca graviter se sensit esse percussum, sonitum audiens percussurae, veluti cum spiculum pro-siliret de balista, moxque, tam vulnere saucius⁴ quam sonitu stupefactus, chirothecam de manu traxit, ut visu dignosceret, quod tactu perceperat et auditu. Cumque nulla fuisset prius in palma percussio, con-spexit in medio manus plagam quasi sagittae percussione inflictam, ex qua tanta vis procedebat ardoris, ut videretur ex illo deficere. Mirabile dictu!

Nullum in chirotheca vestigium apparebat, ut latenti plagae cordis latenter inflicti poena vulneris responderet. Clamat exinde per duos dies et rugit, dolore gravissimo stimulatus, et increduli cordis velamen explicat universis. Credere se veraciter sacra stigmata in sancto fuisse Francisco fatetur et iurat, contestans omnis dubitationis absecessisse phantasmata. Orat suppliciter Sanctum Dei per sacra sibi stigmata subvenire et multas cordis preces multo impinguat pro-fluvio lacrymarum. Mirum certe! Incredulitate pro-jecta, sanationem mentis sanatio sequitur corporalis. Omnis quiescit dolor, frigescit ardor, nullum remanet vestigium percussurae, sicque factum est, ut latens mentis infirmitas per patens carnis cauterium superna providente elementia curaretur, menteque sanata, et ipsa caro pariter sanaretur. Fit homo humilis, Deo devotus, Sancto et Fratrum Ordini perpetua familiaritate subiectus. Huius rei tam solemne miraculum iuramentis firmatum fuit, et litteris sigilli episcopi munimine roboratis ipsius ad nos notitia delata pervenit. — De sacris ergo stigmatibus nulli sit ambiguitati locus, nullius in hoc, quia Deus *bonus est, nequam sit oculus*⁵, quasi huiusmodi doni largitio sempiternae bonitati non congruat. Si enim illo amore seraphico multa membra capiti cohaerent Christo, ut et in bello simili armatura invenirentur condigna et in regno ad similem forent gloriam subvehenda, nullus hoc sanae mentis nisi ad Christi gloriam diceret pertinere.

Notandum.

Epilogus.

§ II. De mortuis suscitatis⁶.

1. In castro montis Marani prope Beneventum mulier quaedam sancto Francisco peculiari devotione cohaerens viam universae carnis intravit. Convenientibus autem clericis nocte ad exsequias et vigilias cum Psalteriis decantandas, subito, cunctis cernentibus, erexit se mulier super lectum et unum de astantibus sacerdotem, patrum videlicet suum, vocavit⁷ dicens: «Volo confiteri, pater; audi peccatum meum. Ego enim mortua duro eram carceri mancipanda, quoniam peccatum, quod tibi pandam, necdum confessa fueram. Sed orante, inquit, pro me sancto Francisco, cui, dum viverem, devota mente servivi, redire nunc ad corpus indultum est mihi, ut, illo revelato peccato, sempiternam promerear vitam. Et ecce, vobis videntibus, postquam illud detexero, ad promissam requiem properabo». Trementer ergo sacerdoti trementi confessa, post absolutionem receptam quiete se in lecto collegit et in Domino feliciter obdormivit.

Miraculum primum.

¹ Edd. cum esset stupore vehementi.² Respicitur parabola de Samaritano Luc. 10, 30. seqq.

— Superius post cum illius edd. addunt etiam.

³ Vat. cum ed. 4 Rogerius.⁴ Edd. saucius.⁵ Math. 20, 15: An oculus tuus nequam est, quia ego bonus sum? — Superius pro nulli sit edd. nullus sit.⁶ Nonnulli codd., ut DEF, hanc rubricam omittunt; idem occurrit in seqq.⁷ Edd. advocavit, quae et omittunt audi peccatum meum.

Miraculum
secundum.

2. In castro Pomarico¹ in montanis Apuliae posito patri et matri unica erat filia in tenera aetate tenere praedilecta. Qua infirmitate gravi ad mortem perducta, parentes eius successionem aliam non sperantes, se in illa quasi mortuos reputabant. Convenientibus ergo consanguineis et amicis ad flebile nimis funus, iacebat mater infelix ineffabilibus completa doloribus et absorpta suprema tristitia, de his quae fiebant nihil penitus advertebat. Interim sanctus Franciscus, uno tantum socio comitatus, apparens desolatam visitare dignatus est feminam, quam sibi senserat esse devotam et piis eam affatus alloquiis: « *Noli flere*², inquit; nam lucernae tuae lumen, quod deploras exstinctum, mea tibi est intercessione reddendum ». Surrexit continuo mulier, et quae sibi dixerat Sanctus omnibus manifestans, non permisit, exstinctum corpus efferri, sed cum magna fide sancti Francisci nomen invocans et mortuam filiam apprehendens, vivam et incolumem, cunctis videntibus et mirantibus, allevavit.

Tertium.

3. Cum Fratres de Nocerita³ peterent quoddam plastrum a quodam viro, Petro nomine, quo aliquantulum indigebant; stulte respondit eis pro petito subsidio irrogando convicium, et pro eleemosyna ad honorem sancti postulata Francisci in nomen ipsius blasphemiam iaculando. Poenituit hominem statim insipientiae suae, divino super eum irruente pavore, ne forte ultio Domini sequeretur, sicut et fuit protinus subsecuta. Nam infirmatus continuo primogenitus eius, parvo elapso spatio, spiritum exhalavit. Volutabatur per humum pater infelix et sanctum Dei Franciscum invocare⁴ non cessans, cum lacrymis exclamabat: « Ego sum, qui peccavi, ego, qui inique locutus sum; me in persona propria flagellare debuisti. Redde, Sancte, iam poenitenti quod abstulisti impie blasphemanti. Tibi me reddo, tuis me obsequiis semper expono; nam et devotum sacrificium laudis pro tui honore nominis semper offeram Christo ». Mira res! Ad haec verba surrexit puer, et planctum prohibens, se morientem, eductum de corpore, per beatum Franciscum deductum asseruit et reductum.

Quartum.

4. Cuiusdam urbis Romae notarii puerulus vix septennis matrem ad ecclesiam sancti Marci euntem puerili more sequi desiderans, dum remanere domi compelleretur a matre, per fenestram palatii se proiecit, et ultima quassatione collisus, continuo spiravit⁵. Mater vero, quae nondum longe discesserat, ad sonitum corruentis praecipitium pignoris suspicata, celeriter rediit filiumque reperiens tam mise-

rabili casu repente subtractum, protinus sibi ipsi manus iniecit ultrices ac dolorosis clamoribus totam excitavit viciniam ad lamentum. Frater vero quidam, nomine Raho de Ordine Minorum, illuc se ad praedicandum conferens, propinquavit ad puerum et fide plenus ait ad patrem: « Credisne, sanctum Dei Franciscum posse filium tuum a mortuis suscitare propter amorem, quem semper ad Christum habuit pro reddenda vita hominibus crucifixum »? Quo respondente, se firmiter credere et fideliter confiteri servumque Sancti in perpetuum se esse futurum, si tantum a Deo munus per ipsius merita recipere mereretur; prostravit se Frater ille cum Fratre socio in oratione, ceteros, qui aderant, excitans ad orandum. Quo facto, coepit puer aliquantulum oscitare, et apertis oculis brachiisque elevatis⁶, se ipsum erexit et statim coram omnibus ambulavit incolumis, per mirandam Sancti virtutem vitae simul redditus et saluti.

5. In civitate Capuae, dum puer quidam circa⁷ Quiripam Vulturni fluminis cum pluribus iocaretur, incaute cecidit in profundum, quem fluminis impetus celeriter vorans, sub sabulo mortuum sepelivit. Proclamantibus autem pueris, qui cum eo luserant circa flumen, populosa illic multitudo convenit. Cumque universus populus suppliciter et devote beati Francisci merita invocaret, ut devotorum sibi parentum fidem aspiciens, prolem a mortis periculo dignaretur eripere, natator quidam procul astans, clamoribus auditis, accessit. Et post diutinam inquisitionem, invocato tandem beati Francisci subsidio, locum invenit, in quo limus in modum sepulcri pueri cadaver obtexerat; quem effodiens et extra deportans, dolens defunctum inspexit. Licet autem populus, qui astabat, videret iuvenem mortuum; nihilominus tamen flens et eiulans proclamabat: « Sancte Francisce, redde puerum patri suo ». Sed et iudaei, qui venerant, naturali pietate commoti, dicebant: « Sancte Francisce, redde puerum patri suo ». Subito puer, laetantibus et mirantibus cunctis, exsurgens incolumis, duci se ad ecclesiam beati Francisci suppliciter postulavit, ut gratias illi devotus exsolveret, cuius se noverat virtute mirabiliter suscitatum.

6. In civitate Suessa⁸ in vico, qui *Ad columnas* dicitur, repente quaedam corruens domus unum absorbit iuvenem et subito interemit. Viri autem et mulieres ruinae sonitu excitati, undique accurrentes, elevaverunt hinc inde ligna et lapides et miserae matri mortuum filium reddiderunt. Illa vero amarissimis repleta singultibus, sicut poterat, dolorosis

¹ Locus huius nominis adhuc invenitur in regno Neapolitano, provincia Basilicatae. Secuti sumus B; alii codd. *Pomarico*, edd. *Pamarco*.

² Sicut dixit Iesus viduae in Naim, cuius filium suscitavit, Luc. 7, 13.

³ Cfr. supra pag. 525, nota 6.

⁴ Vat. cum ed. 1 *vocare*.

⁵ Du Cange, Glossarium etc.: *Spirare*, Italica, animam efflare. Codd. 1 M et Acta SS. *exspiravit*.

⁶ Plures codd., ut A G 1 M, *levatis*.

⁷ Edd. *super*, quae etiam inferius pro *incaute* (ita A) cum aliis codd. substituunt *incantus* et *illuc* pro *illic* (ita A B D E 1 M).

⁸ Nunc *Sessa*, in regno Neapolitano, in provincia Terrae Laboris.

vocibus exclamabat: « Sancte Francisce, sancte Francisce, redde mihi filium meum ». Non solum autem illa, sed et omnes, qui aderant, beati Patris praesidium flagitabant. Sed cum non esset neque vox neque sensus, cadaver posuerunt in lectulo, ad sepeliendum ipsum diem crastinum exspectantes. Mater vero fiduciam habens in Domino per merita Sancti eius, votum emisit, nova se sindone beati Francisci operturam altare, si filium suum sibi¹ revocaret ad vitam. Et ecce, circa mediam noctis horam coepit iuvenis oscitare, et calescentibus membris vivus exurgens et sanus, in laudis verba prorumpit. Sed et clerum, qui convenerat, et populum universum excitavit ad laudes et gratias Deo et beato Francisco cum mentis laetitia persolvendas.

7. Iuvenis quidam, Gerlandinus nomine, de Ragusia² oriundus, vindemiarum tempore ad vineas exiens, cum in vase vinario, ut utres impleret, sub torculari se mitteret, repente praegrandes lapides, motis in se lignorum struibus, caput ipsius letali percussione quassarunt. Festinavit continuo pater ad filium et desperans obrutum non adjuvit, sed eum sub onere, sicut corruit, sic reliquit. Accurrerunt expeditius vinitores magni clamoris vocem lugubrem audientes multoque cum patre pueri dolore completi, extraxerunt iuvenem iam mortuum a ruina. Pater vero ipsius, lesu pedibus provolutus, humiliter precabatur, ut filium suum unicum per sancti Francisci merita, cuius tunc imminebat solemnitas, sibi reddere dignaretur. Ingeminabat preces, vovebat officia pietatis, et sancti viri corpus se visitaturum cum filio, si suscitaretur a mortuis, promittebat³. Mirum certe! Continuo puer, qui toto fuerat corpore conquassatus, restitutus vitae et integrae sospitati, gaudens coram omnibus exsurrexit, plangentes obliurgans et sancti Francisci suffragiis vitae se redditum asseverans.

8. Quendam alium mortuum in Alemania suscitavit, de quo dominus Papa Gregorius tempore translationis ipsius Sancti Fratres omnes, qui ad translationem et Capitulum convenerant, per apostolicas litteras⁴ certos reddidit et gaudentes. Miraculi huius seriem, quia ignoravi, non scripsi, credens, papale testimonium omnis assertionis excellere instrumentum.

§ III. De his quos a mortis periculo liberavit.

1. In confinibus Urbis vir quidam nobilis, Rodolphus⁵ nomine, cum Deo devota uxore Fratres Minores suo recepit hospitio tam hospitalitatis gratia quam beati Francisci reverentia et amore. Nocte vero illa in summitate turris dormiens custos castris, cum iaceret super struem lignorum in ipsa muri positorum crepidine, ipsorum soluta compage, in tectum palatii corruit et exinde super terram. Excitata est ad sonitum casus tota familia, et custodis intellecta ruina, dominus castris et domina cum Fratribus accurrerunt. Is vero, qui ex alto corruerat, absorptus fuerat tam profundo sopore, ut nec ad casum evigilaret iteratae ruinae nec ad strepitum accurrentis familiae cum clamore. Trahentium tandem et impellentium manibus excitatus, conqueri coepit, quod dulci fuisset quiete privatus, inter beati Francisci brachia suaviter asserens se dormisse. Cum vero de casu proprio doceretur ab aliis et in imo se videret qui in alto iacuerat, stupens, esse factum quod fieri non perceperat, poenitentiam se facturum ob reverentiam Dei et beati Francisci coram omnibus reprobavit.

Miraculum primum.

2. In⁶ castro Pophis, quod in Campania positum est, sacerdos quidam, Thomas nomine, accessit ad reparandum ecclesiae molendinum. Deambulans autem incaute secus extrema canalis, quo gurgis profundus copioso defluebat influxu, subito casu caviloso⁷ ligno intrusus est, cuius impulsu volvitur molendinum. Cum igitur consortus iaceret in ligno, et super os ipsius, quia supinus erat, aquarum impetus inundaret, corde tantum, quia lingua non poterat, sanctum Franciscum flebiliter invocabat. Per magnum vero spatium sic illo iacente, ac de vita ipsius iam penitus sociis desperatis, in contrariam partem molam cum violentia revolverunt, et sic eiectus, sacerdos palpitans volutabatur in aquae meatu. Et ecce, quidam Frater Minor, indutus tunica candida et fune succinctus, cum magna suavitate arptum per brachium extra flumen eduxit, dicens: « Ego sum Franciscus, quem invocasti ». Ille vero, sic liberatus, nimis obstupuit volensque pedum ipsius deosculari vestigia, huc atque illuc anxius discurrebat, quaerens a sociis: « Ubi est ille? Quo abiit

Secundum.

¹ Edd. omittunt *sibi*.

² Acta SS. *Ragusa* (vel *Ragusium* in Dalmatia).

³ Edd. *repromisit*.

⁴ Incipientes *Mirificans misericordias suas Dominus*, in quibus dicitur: « Nuper in Theutonia, ipsius Sancti celebri nomine invocato, mortuum mirifice suscitavit [Redemptor], sicut nobis est solemniter intimatum » etc. Litterae inveniuntur apud Wad-diag., loc. cit., ad an. 1230, n. 1, qui praenitit, quod « habet has litteras Petrus Rodulphus fol. 170. et Regestum Vaticanum hoc anno, n. 18 ». Acta SS. hic dicunt: « Ipsas tamen eiusdem Pontificis litteras non vidimus hactenus ». — Agitur de translatione corporis S. Francisci de ecclesia S. Georgii ad basilicam

in honorem S. Francisci aedificatam (an. 1230); cfr. supra c. 15, n. 8.

⁵ Plures codd., ut A B D E, *Radulfus*. Inferius vocibus *cum iaceret* Vat. interserit *iam*.

⁶ Cod. A praenitit hanc rubricam: *De molendino*, B illam, quam supra omisit: *De his quos a mortis periculo liberavit*.

⁷ Derivatur a *cavile*, quo etiam secundum Du Cange, Glosarium etc. designatur clavus ligneus aut ferreus, qui inseritur ad continendos asseres, aut alia quavis, quasi *clavile*, a *clavus*; eadem notione sumitur *cavilla*, *cavillus* (Vat. cum ed. 1 et codd. *cavilloso ligno*). — Inferius pro *corde tantum* codd. *corde tamen*.

Sanctus? Qua via discessit? Viri autem illi tremefacti, proni ceciderunt in terram, sublimis Dei gloriosa extollentes magnalia et virtuosa merita humilis servi eius.

Tertium. 3. Iuvenes quidam de Burgo Celani¹ pro mendendis herbis exierant ad campestria quaedam, in quibus vetus latebat puteus, herbis in summo ore virentibus obumbratus, qui quasi per passus quatuor aquarum altitudinem continebat. Segregatim igitur per campum discurrentibus pueris, unus ex improvise decurrit in puteum. Absorbente autem profunda fovea corpus, spiritus mentis sursum recurrebat ad beati Francisci suffragium, clamans in ipso lapsu fideliter et fidenter: « Sancte Francisce, adiuva me ». Ceteri huc et illuc se vertentes, dum puer alius non comparet², clamore, circuitu et lacrymis requirebant eundem. Comperto tandem, quod in puteum cecidisset, festinanter cum gemitibus redierunt ad Burgum, indicantes eventum, exposcentes auxilium. Rediuntibus autem illis cum multa hominum turba, demissus unus per funem in puteum, puerum respexit in aquarum superficie residentem, nihil passum penitus laesionis. Extractus vero de puteo puer dixit omnibus, qui astabant: « Quando subito cecidi, beati Francisci patrocinium invocavi, qui corruenti mihi statim praesentialiter affuit, et manum porrigens, leviter apprehendit nec unquam deseruit, donec una vobiscum de puteo me eduxit ».

Quartum. 4. In ecclesia beati Francisci apud Assisim, dum, praesente Romana curia, praedicaret dominus episcopus Ostiensis, qui et postmodum Summus Pontifex exstitit Alexander³, quidam lapis ponderosus et magnus incaute super pulpitem excelsum et lapideum derelictus, prae nimietate pressurae impulsus, super caput cuiusdam cecidit mulieris. Aestimantes igitur circumstantes, perfecte ipsam iam mortuam et caput eius totaliter conqussatum, cooperuerunt eam pallio, quo erat amicta, ut, sermone finito, educeretur extra ecclesiam lugubre funus. Ipsa vero se beato Francisco, ante cuius iacebat altare, fideliter commendavit. Et ecce, praedicatione finita, mulier coram omnibus adeo surrexit incolumis, ut nullius in ea laesionis vestigium appareret. Sed et⁴, quod est amplius admirandum, cum per longa tempora usque ad horam illam dolorem capitis quasi continuum habuisset, plene fuit ex tunc ab omni morbi molestia liberata, sicut ipsa postmodum testabatur.

Quintum. 5. Apud Cornetum⁵, cum in loco Fratrum ad fusionem campanae viri quidam convenissent devoti,

puerulus quidam octennis, Bartholomaeus nomine, exenium quoddam Fratribus pro laborantibus apportavit. Et ecce, subito ventus vehemens, concussa domo, ostium portae grave quidem et magnum super ipsum puerulum ita valido proiecit impulsu, ut quem tam ingens pondus opprimeret letali crederetur collisione quassatus. Sic enim totaliter iacebat tumulatus sub pondere, ut nihil exterius appareret. Accurrerunt omnes, qui aderant, beati Francisci virtuosam dexteram invocantes. Sed et pater ipsius, qui, rigescentibus membris, se movere non poterat prae dolore, votis et voce sancto Francisco filium offerebat. Levatum est denique funestum pondus desuper puerum, et ecce, quem credebant mortuum, quasi suscitatus a somno, laetus apparuit, nullam in se prorsus praefereens laesionem. Igitur cum quatuordecim esset annorum, factus est Frater Minor, vir postea litteratus et famosus in Ordine praedicator.

Sextum. 6. Homines de Lentino lapidem praegrandum absiderunt de monte, qui superponendus⁶ erat altari cuiusdam ecclesiae beati Francisci iam proximo consecrandae. Cum autem fere quadraginta homines lapidem illum superponere vehiculo niterentur, repetitis saepius viribus, super quendam hominem lapis⁷ cecidit et in modum sepulcri obtexit. Sed cum mente confusi, quid facerent, ignorarent; maior pars hominum desperata discessit. Porro viri decem, qui remanserant, lugubri voce sanctum invocantes Franciscum, ne in suo servitio sic horrendo mori hominem pateretur, resumpto tandem corde, tanta facilitate lapidem amoverunt, ut nullus dubitaret, virtutem affuisse Francisci. Surrexit homo incolumis⁸ in omnibus membris, insuper et lumen recuperavit limpidum oculorum, quod prius habuerat obscuratum, ut sic omnibus daretur intelligi, quam in rebus desperatis beati Francisci merita valida sint virtutis.

Septim. 7. Simile quiddam⁹ accidit apud sanctum Severinum in Marchia de Ancona. Dum enim lapis praegrandis, de Constantinopoli apportatus ad basilicam beati Francisci multorum viribus traheretur, rapido lapsu est super quendam trahentium devolutus. Cumque ille non solum crederetur defunctus, sed etiam totaliter comminutus, assistente sibi beato Francisco et lapidem sublevante, absque omni laesione sanus et incolumis, lapidis proiecto pondere, prosilivit.

Octavum. 8. Bartholomaeus, Caietanus¹⁰ civis, cum ad constructionem cuiusdam ecclesiae beati Francisci non modicum desudaret, ruente trabe quadam infirmiter posita eiusque opprimente cervicem, fuit gravior

¹ Cfr. supra pag. 536, nota 7. — Vat. cum ed. 1, posito *Iuvenis*, subinde substituit *exierat*.

² Gen. 37, 30. — Edd. *compareret*. Inferius pro *festinanter* Vat. cum ed. 1 *festinantes*.

³ Scilicet quartus, an. 1254 Summus Pontifex constitutus.

⁴ Cod. B omittit *et*. Inferius pro *omnis* Aeta SS. *omni*.

⁵ Analecta Franciscana, tom. III. pag. 201, nominant castrum Corneti Viterbiensis dioecesis. — Inferius pro *exenium*

(munus) edd. eadem notione *xenium*, quae etiam subinde perperam omittunt pro.

⁶ Vat. cum ed. 1 *supponendus*. Inferius vocibus *iam proximo* GIM interserunt *in*, edd. legunt tantum *in proximo*.

⁷ Edd. *lapis ille*.

⁸ Cod. A addit *et*. Inferius Vat. et ed. 1 omittunt *prius* et *sic*.

⁹ Vat. *quoddam*.

¹⁰ Cfr. supra pag. 540, nota 4, ubi urbs Gaëta occurrit; hic sicut ibi plures codd. *Gaietanus*.

conquassatus. Ipse vero mortem sibi sentiens imminuentem, uti erat vir fidelis et pius, a quodam Fratre Viaticum postulavit. Quod Frater ille tam celeriter afferre non valens, quia mori subito credebatur, beati Augustini verbum ¹ protulit, dicens ei: « Crede, et manducasti ». Sequenti vero nocte beatus Franciscus cum undecim Fratribus illi apparuit, et inter ubera portans agniculum, ad lectum eius accessit vocavitque illum ex nomine, dicens: « Bartholomaeae, noli timere, quia non praevalebit adversum te inimicus, qui te in meo servitio voluit impedire. Ille est Agnus, quem tibi dari petebas, quem et propter bonum desiderium suscepisti, cuius etiam virtute consequeris utriusque hominis sospitatem ». Et sic per vulnera manum ducens, ad opus, quod coeperat, eum redire praecepit. Qui valde mane consurgens, et his qui eum seminecem reliquerant, incolumis et laetus apparet, admirationem intulit et stuporem, sed et ipsorum mentes ad beati Patris reverentiam et amorem tam exemplo sui quam Sancti miraculo excitavit.

9. Quidam de castro Ceperani ², nomine Nicolaus, in manus inimicorum crudelium incidit die quadam. Qui crudelitate ferali vulneribus eum super vulnera concidentes, usque adeo super miserum saevierunt, donec vel exstinctum crederent, vel protinus exstinguendum. Clamaverat autem Nicolaus praedictus, cum primos ictus exciperet, alta voce: « Sancte Franciscus, succurre mihi; sancte Franciscus, adiuva me ». Hanc vocem a remotis audierunt quam plurimi, licet auxilium ferre non possent. Deportatus tandem domum, totus suo sanguine volutatus, fiducialiter asserebat, se mortem ex illis vulneribus non visurum nec etiam se tunc sentire dolores, quoniam sanctus Franciscus sibi succurrerat, et ut poenitentiam ageret, a Domino impetrarat ³. Quod et sequens confirmavit eventus, nam lotus a sanguine, continuo contra humanam spem existit liberatus.

10. Filius cuiusdam nobilis in castro sancti Geminiani ⁴, valido languore detentus omnique ulterius desperatus salute, ad extremum usque perductus est. Rivus etenim sanguinis emanabat ab oculis eius, sicut ex vena ⁵ brachii assolet ebullire, ceterisque propinquae mortis veris indiciis in reliquo corpore apparentibus, iudicabatur pro mortuo, sed et prae debilitate spiritus et virtutis sensus et motus usu privatus, visus est penitus emigrasse. Congregatis autem ex more ad planetum parentibus et amicis, ac de sola agentibus sepultura, pater ipsius, fiduciam ha-

bens in Domino, concito gressu ad ecclesiam cucurrit beati Francisci, quae in eodem erat castro constructa, et cingulo suspenso ad guttur, cum omni humilitate se prostravit in terram; sicque vota vovens et multiplicans preces, suspiriis et gemitibus meruit apud Christum sanctum Franciscum habere patronum. Reversus itaque statim pater ad filium et sanitati restitutum inveniens, luctum in gaudium commutavit.

11. Simile quiddam meritis Sancti operatus est Dominus circa puellam quandam in Catalaunia de villa, nomine Thamarit ⁶, et circa aliam de Ancona, quas, cum essent prae nimietate aegritudinis in ultimo spiritu constitutae, beatus Franciscus, fideliter a parentibus invocatus, perfectae continuo restituit sanitati.

12. Clericus quidam de Vico Albo ⁷, nomine Matthaeus, veneno mortifero bibito, in tantum fuit gravatus, quod loqui aliquo modo non valens, solum finalem exitum expectabat. Sacerdos quidam, ut sibi confiteretur, admonuit et verbum unum ab eo extorquere non valuit. Ipse vero in corde suo humiliter Christum orabat, ut per beati Francisci merita a mortis eum faucibus eripere dignaretur; moxque, ut confortatus a Domino, beati Francisci nomen fideli devotione deprompsit testibus, qui aderant, veneno evomito, liberatori suo gratias egit.

§ IV. De naufragis liberatis ⁸.

1. In magno maris periculo positi quidam nautae, cum per milliaria decem a portu Barulitano ⁹ distarent, ingravescente nimium tempestate, iam de vita dubii ancoras submiserunt. Verum spiritu procellarum mari ferventius tumescente, fractis funibus et relictis ancoris, incerto et inaequali cursu per aequora vagabantur. Tandem nutu divino mari placato, ad resumendas anchoras, quarum funes superius enatabant, toto se conamine paraverunt. Cumque id perficere propriis viribus non valerent, plurimorum Sanctorum invocato subsidio multisque iam sudoribus liquescentes, nec unam per totam diem resumere potuerunt. Aderat autem nauta quidam, Perfectus ¹⁰ nomine, sed moribus imperfectus, qui cum irrisione quadam dixit ad socios: « Ecce, Sanctorum omnium invocastis auxilium, et, ut videtis, nullus est, qui succurrat. Invocemus istum Franciscum, qui novellus est Sanctus, si quo modo in mare se mergat ¹¹ et ancoras perditas reddat ». Consenserunt ceteri, non irrisorie, sed veraciter suasioni Perfecti, et ipsius

¹ In Ioan. Evang. tr. 25. n. 12.

² In Campania Romana ad fluvium Lirim.

³ Edd. cum uno alteroque cod. *impetravit*.

⁴ In Tuscia.

⁵ Supple *secta*. Inferius pro *prae debilitate* Vat. cum ed. 1 pro *debilitate*.

⁶ Ad oram maris Iberici. — Inferius pro *quas* edd. *quae*.

⁷ Acta SS. de *vico Albo*.

⁸ Edd. *De liberatis a naufragio*. Codd. DEF hanc rubricam omittunt.

⁹ Est portus Baruli sive Baroli (Barletta) in regno Neapolitano, prov. Bari. Codd. B1 *Barolitano*.

¹⁰ Ille desinit cod. A.

¹¹ Vat. cum ed. 1 *emergat*. Inferius pro *suasione Perfecti* B *suasione non perfectae*.

Undecimam et duodecimam.

Decimum tertium.

Miraculum primum.

obiurgantes irrisorium verbum, firmaverunt cum Sancto spontaneum votum; statimque in momento sine aliquo adminiculo nataverunt ancorae super aquas, quasi ferri natura versa foret in ligneam levitatem.

Secundum. 2. Peregrinus quidam, invalidus corpore propter febris peracutae symptomata, quam fuerat ante perpassus, navi quadam subvectus, de ultramarinis partibus veniebat. Ferebatur autem et ipse ad beatum Franciscum praecipuo devotionis affectu et eum sibi apud caelestem Regem elegerat advocatum. Cum igitur necdum perfecte liber a morbo sitis angustiareretur ardoribus, deficiente iam aqua, coepit alta voce clamare: « Ite fidenter, haurite poculum mihi, quia beatus Franciscus vasculum meum aqua replevit ». Mirum certe! Invenirent vas aqua repletum, quod fuerat ante vacuum derelictum. Alio vero die, cum tempestate suborta *operiretur navis fluctibus*¹ et procellis quateretur pervalidis, ita ut iam naufragium timerent, coepit idem infirmus subito clamore vociferari per navem: « Surgite omnes, inquit, et beato Francisco venienti occurrere. Ecce, ad salvandum nos adest ». Sicque cum voce magna et lacrymis in faciem procidens, adoravit. Statim ad Sancti visionem omnem sospitatem resumpsit infirmus, et maris fuit tranquillitas subsecuta².

Tertium. 3. Frater Iacobus Reatinus, cum in navicula parva fluvium quendam cum aliis Fratribus pertransiret, sociis primo super ripa³ positus, postremo se ad exitum praeparabat. Sed modico illo ligno per infortunium revoluta, rectore natante, Frater mersus est in profundum. Invocabant Fratres extra positi affectuosis precibus beatum Franciscum, et ut filio succurreret, lacrymosis gemitibus supplicabant. Submersus etiam⁴ Frater de ventre gurgitis nimis immensi, cum ore non posset, corde clamabat, ut poterat, implorans pii Patris subsidium. Et ecce, auxiliante sibi beati Patris praesentia, per profundum sicut per aridam ambulabat, et demersam naviculam capiens, cum ea pervenit ad littus. Mirabile dictu! Vestimenta eius madidata non sunt, nec aquae gutta proximavit ad tunicam.

Quartum, quintum, sextum. 4. Frater Bonaventura nomine, cum duobus viris per lacum quendam navigans, confracta ex parte navicula propter aquae influentis impetum, demersus est cum navi et sociis in profundum. Cum autem *de lacu miseriae*⁵ misericordem Patrem Franciscum

invocarent cum multa fiducia, superenatavit subito aqua plena navicula, et cum eis, Sancto praebente ducatum, salubriter devenit ad portum. — Sic et quidam Frater de Esculo⁶, submersus in flumine, sancti Francisci meritis exstitit liberatus. — Sed et in lacu Reatino cum quidam viri et mulieres in consimili essent periculo constituti, ad invocationem nominis sancti Francisci de aquarum multarum periculo naufragio salubriter evaserunt.

5. Quidam nantae Anconitani, periculosa⁷ tempestate iactati, submersionis periculum iam videbant. Cumque sic desperati de vita sanctum Franciscum suppliciter invocarent, lumen in navi magnum apparuit, et cum ipso lumine tranquillitas concessa divinitus, ac si beatus vir sua miranda virtute et ventis imperare posset et mari⁸. — Quantis autem miraculorum prodigiis beatus hic Pater in mari clauerit et clarescat, quoties ibidem opem tulerit desperatis, nullatenus credo possibile per singula enarrare. Nec mirum, si iam regnanti in caelis collatum est imperium super aquas, cui et in hac mortalitate degenti omnis corporea creatura ad suam refigurata originem mirabiliter serviebat⁹.

§ V. De liberatis a vinculis et carceribus.

1. In Romania¹⁰ Graecum cuiusdam domini servientem contigit de furto fallaciter accusari, quem dominus terrae in arcto carcere mandavit includi et graviter vinculari. Domina vero domus, miserta servi, quem indubitanter credebatur a culpa sibi imposita innocentem, pro liberatione ipsius apud virum precibus insistebat devotis. Verum non acquiescente viri sui duritia obstinata¹¹, recurrit domina supplex ad sanctum Franciscum et eius pietati voto commendavit insontem. Protinus affuit miserorum adiutor et virum in carcere positum misericorditer visitavit. Solvit vincula, carcerem fregit, innocentem manibus apprehensum foras eduxit et ait: « Ego sum ille cui domina tua te devote commisit ». Cumque ille timore magno corripere et pro descensu altissimae rupis voraginem circuiret, subito liberatoris sui virtute inveniens se in plano, rediit ad dominam suam, relataque per ordinem miraculi veritate, devotam dominam ad Christi amorem et reverentiam servi eius Francisci ferventius inflammavit.

¹ Matth. 8, 24: Navicula operiretur fluctibus. — Inferius pro *naufragium timerent* B I L M *naufragori* (F G *naufragare*) *timerent*.

² Matth. 8, 26: Et facta est tranquillitas magna. — Cod. E hoc factum omittit.

³ Codd. I L M et Acta SS. *super ripam*.

⁴ Edd. *autem*.

⁵ Psalm. 39, 3. — Inferius pro *superenatavit* Acta SS. *superenatavit*; deinde B D E F omittunt *Sancto*, et pro *devenit* edd. substituunt *pervenit*.

⁶ Hoc nomen idem est ac *Asculum* (Ascoli); cfr. *Analecta Franciscana*, tom. III. pag. 352 et 355, ubi Bonaventurae successor in Generalatu Ordinis Hieronymus dicitur fuisse de *Esculo*

(Asculo in Piceno); invenitur etiam aliud *Asculum*, scilicet *Apulum* (Ascoli di Satriano) in regno Neapolitano.

⁷ Codd. G I K M *procellosa*. Inferius pro *in navi* (ita B D F G L M) edd. *in mari*. Cod. E hoc factum omittit.

⁸ Matth. 8, 26: Tunc surgens [Iesus] imperavit ventis et mari, et facta est tranquillitas magna.

⁹ Vide supra c. 8, n. 6. seqq.

¹⁰ Quae alio nomine Thracia vocabatur; cfr. infra § 7, n. 2, ubi urbs *Thebae* in Romania exhibetur. Romania accipitur etiam pro provincia *Romandiola* (cfr. Du Cange, *Glossarium* etc.). — Post *Graecum* edd. addunt *quendam*.

¹¹ Cod. K *Verum non acquiescente marito, qui erat duritia obstinatus*.

2. In Massa sancti Petri cuidam militi ¹ debebat pecuniae quantitatem pauperculus quidam. Cumque prae inopia facultas non suppetere persolvendi, captus debitor a milite repetente, misereri sibi orabat suppliciter, dilationem quaerens amore beati Francisci. Sprevit superbus miles preces oblatas et Sancti amorem veluti inane quid inaniter vilipendit. Nam cervicose respondens: « Tali te, ait, loco recludam et tali recludam ² carcere, quod nec Franciscus nec aliquis te poterit adinvare ». Tentavit quod dixit. Carcerem adinvenit obscurum, in quo hominem vinculatum coniecit. Paulo post affuit beatus Franciscus, et fracto carcere ruptisque compedibus, illaesum hominem reduxit ad propria. Sic fortitudo Francisci, militem praedata superbum, captivum, qui se sibi subiecerat, liberavit a malo militisque proterviam mirando miraculo ³ in mansuetudinem commutavit.

3. Albertus de Aretio, cum in vinculis aretissimis ⁴ teneretur pro debitis iniuste ab eo petitis, suam innocentiam sancto Francisco humiliter commendavit. Ordinem quidem Fratrum Minorum plurimum diligebat et sanctum Franciscum inter Sanctos speciali venerabatur affectu. Dixit autem creditor suus voce blasphemia, quod nec Franciscus nec Deus posset eum de suis manibus liberare. Factum est itaque in vigilia sancti Francisci, cum vinctus ille nihil comedisset, sed ob Sancti amorem victum suum cuidam tribuisset egeno, nocte veniente apparuit ei vigilanti sanctus Franciscus. Ad cuius ingressum vincula de pedibus et *catenae de manibus ceciderunt* ⁵, sponte aperta sunt ostia, prosilierunt tabulae de solario, et liber abscessit homo, ad propria rediens. Implevit ex tunc votum, ieiunans vigiliam beati Francisci et cereo, quem annuatim consuevit offerre, in accrescentis devotionis indicium annuatim unam unciam superaddens.

4. Residente in sede beati Petri domino Gregorio nono, quidam Petrus nomine de civitate Alisia ⁶, de haeresi accusatus, Romae captus est et de mandato eiusdem Pontificis, ad custodiendum traditus episcopo Tiburtino. Quem sub poena episcopatus accipiens, compedibus alligavit obscuroque ipsum carcere, ne posset effugere, fecit includi, *panem ei praebens in pondere et poculum in mensura* ⁷. Coepit autem homo ille beatum Franciscum ad sui miserendum multis precibus et fletibus invocare, eo quod audierat, sollemnitate eius iam adesse vigiliam. Et quoniam fidei puritate omnem abdicaverat haereticae

pravitatis errorem totaque cordis devotione adhaeserat fidelissimo Christi servo Francisco, intercedentibus ipsius meritis, a Domino meruit exandiri. Instante enim iam nocte suae festivitatis, circa crepusculum beatus Franciscus in carcerem miseratus descendit et illum suo nomine vocans, ut cito surgeret, imperavit. Qui timore perterritus, quisnam esset, interrogans, beatum Franciscum adesse audivit. Cumque virtute praesentiae viri sancti vincula pedum suorum confracta conspiceret cecidisse, et tabulas carceris elavis ultro prosilientibus aperiri, et apertum iter sibi ad exeuendum praebere; solutus tamen et obstupefactus fugere nesciebat, sed ad ianuam clamans, custodes omnes perterritus. Qui cum eum liberatum a vinculis episcopo nuntiassent, post intellectum ordinem rei ad carcerem pontifex devotus accessit, et manifeste Dei virtutem cognoscens, ibidem Dominum adoravit. Vincula quoque coram domino Papa et cardinalibus delata fuerunt, qui, videntes quod factum fuerat, admirati plurimum benedixerunt Deum.

5. Guidolottus de sancto Geminiano ⁸ falso accusatus fuit, quod veneno interemerat quendam virum et quod eodem genere mortis filium eiusdem viri et universam eius familiam proposuerat enecare. Captus proinde a potestate ⁹ terrae, gravissimis vinculis aggravatus, in turri quadam reclusus est. Ipse vero fiduciam habens in Domino, pro sua innocentia, quam sciebat, causam commisit beati Francisci patrocinio defendendam. Excogitante igitur potestate, qualiter criminis obiecti confessionem eliceret per tormenta qualibusque ¹⁰ poenis confessum faceret interire, nocte illa, cum mane ad cruciatus deberet adduci, sancti Francisci praesentia exstitit visitatus et immenso luminis fulgore usque mane circumdatus repletusque gaudio et fiducia multa, securitatem evasionis accepit. Advenerunt mane tortores et eductum de carcere equuleo suspenderunt, aggravantes super eum multa pondera ferri. Depositus est pluries et iterum elevatus, ut, poena poenae succedente, citius ad confessionem criminis arceretur. Sed spiritu innocentiae laetabatur in vultu, nullam moestitiam praetendens in poenis. Deinde accensus est ignis sub ipso non modicus, nec propterea capillus est laesus, cum tamen capite dependeret ad terram. Tandem bulliente oleo superfusus, virtute patroni, cui se commiserat defensandum, haec omnia superavit et sic dimissus liber ¹¹, salvus abscessit.

¹ Designari videtur *vir nobilis*; cfr. supra pag. 525, nota 8.

² Edd. cum uno alteroque cod. *retrudam*, quod L M superius post loco substitunt pro *recludam*. Inferius pro *fracto* Vat. cum ed. I *confracto*.

³ Vat. *militemque protervum admirando miraculo*.

⁴ Edd. *atrocissimis*. Dein B *detineretur*. Cod. E hoc factum omittit.

⁵ Act. 12, 7. idem de Petro dicitur.

⁶ Invenitur *Alisia* (Alysia) in Graecia, in Epiro. Acta SS. verosimiliter putant, per *Alisiam* indicari *Alexiam*, alias *Alesiam*, Gallice *Alise*, quae nunc vicus Burgundiae est. Codd.

B I bene substitunt *Alifia* (*Allifa*, italice *Alife*, quae est civitas regni Neapolitani in provincia Terrae Laboris). Wadding, loc. cit., ad an. 1228, n. 45. legit *de civitate Assisia*.

⁷ Ezech. 4, 16: Comedent panem in pondere et in sollicitudine et aquam in mensura et in angustia bibent.

⁸ In Tuscia.

⁹ Du Cange, Glossarium etc.: *Potestas*, rex, princeps, superius loci magistratus.

¹⁰ Vat. *qualibuscumque*. Inferius pro *accepit* L *recepit*.

¹¹ Cod. I addit *et*.

§ VI. *De liberatis a periculo partus.*Miraculum
primum.

1. Comitissa quaedam in Scлавonia, sicut nobilitate illustris, sic et aemula probitatis erga sanctum Franciscum devotione flagrabat, erga Fratres vero sedula pietate. Tempore partus duris pervasa doloribus¹, tanta fuit molestata angustia, ut prolis futurus ortus praesens videretur matris occasus. Non videbatur infantem eniti posse ad vitam, nisi exspiraret e vita, nec tali nisu parere, sed perire. Subvenit cordi eius sancti Francisci fama, virtus et gloria, excitatur fides, inflammatur devotio. Convertit se ad auxilium efficax, ad fidum amicum, ad devotorum solatium, refugium afflictorum: « Sancte Francisce, inquit, pietati tuae supplicant omnia ossa mea, et mente voveo quod explicare non possum ». Mira celeritas pietatis! Finis dicendi finis fuit dolendi, parturiendi meta, pariendi principium. Statim enim omni cessante pressura, partum edidit cum salute. Non fuit immemor voti, non propositi refuga. Ecclesiam quandam pulcrum construi fecit et constructam ad Sancti honorem Fratribus assignavit.

Secundum.

2. In partibus Romanis mulier quaedam, Beatrix nomine, vicina partui, cum per dies quatuor fetum in ventre portaret exstinctum, multis infelix agitabatur angustiis et exitiis doloribus urgebatur. Mortuus fetus matrem cogebat ad mortem, et nondum in incem proditum abortivum publicum matris periculum pariebat. Tentabat medicorum auxilium, sed omne humanum remedium laborabat in vanum. Sic de primis maledictionibus² copiosius aliquid declinarat in miseram, ut, sepulcrum facta conceptus, sepulcrum pro certo proximum exspectaret. Fratribus tandem Minoribus per internuntios tota se devotione committens, suppliciter aliquid de sancti Francisci reliquiis fide plena poposcit. Contigit, nutu divino aliquantulum inveniri de chorda, qua fuerat Sanctus quandoque praecinctus. Mox, ut super dolentem posita chorda fuit, omnis facillime solutus est dolor, mortis causa mortuus fetus emissus, pristina sanitas restituta.

Tertium.

3. Cuiusdam de Carvio³ nobilis viri uxor, Iuliana nomine, pro filiorum morte annos trahebat lugubres et continue infelices deplorabat eventus, pro eo quod omnes quos cum pressura portaverat filios, modico interiecto tempore, cum vehementiori dolore sepulturae tradiderat. Cum igitur quatuor mensium conceptum haberet in utero magisque propter eventus praeteritos de conceptae prolis sollicitaretur obitu

quam de ortu; beatum Patrem Franciscum pro vita nondum nati fetus fideliter precabatur. Ecce autem, nocte quadam dormienti sibi mulier quaedam apparebat in somnis, formosum puerulum gestans in manibus, illumque laetissime offerebat eidem. Cum vero illa recipere recusaret, quem statim formidabat amittere, mulier illa subiunxit; « Secure suscipias, quia quem, tuo moerori compatiens, sacer mittit Franciscus, vita vivet et sospitate gaudet ». Statim evigilans mulier, intellexit per ostensam sibi caelitus visionem, beati Francisci sibi adesse suffragium; et ex tunc abundantiori completa laetitia, pro suscipienda prole iuxta promissum multiplicavit preces et vota promisit. *Impletum est denique tempus pariendi, et peperit*⁴ femina masculum, qui juvenilis robore florens aetatis, tanquam per beati Francisci merita fomentum susciperet vitae, incitamentum parentibus praebebat ad Christum et Sanctum eius devotioris affectus. — Simile quiddam huic in Tiburis⁵ Quarta

4. Apud Viterbium partui propinqua mulier^{Quinta} morti propinquior censebatur, visceralibus tormentata doloribus et tota calamitosa infortuniis⁶ mulierum. Cumque, naturae succumbente virtute, omnis deficeret artis industria, invocato beati Francisci nomine, liberata confestim mulier, partum salubriter terminavit; sed assecuta quod voluit et oblita beneficii, quod acceperat, honori Sancti non deferens, die natalis ipsius ad opera servilia manus extendit. Et ecce, subito dextrum brachium ad laborem extensum inflexibile remansit et aridum. Quod cum studeret ad se revocare cum altero, ultione consimili et illud exaruit. Timore igitur divino correpta mulier, reintegravit⁷ votum usumque membrorum, quem propter ingratitude amiserat et contemptum, per misericordis et humilis Sancti merita, cui se iterato devovit, recuperare promeruit.

5. Mulier quaedam de partibus Aretinis, cum^{Sexta} per septem dies partus discrimina sustineret, et iam in nigredinem versa, desperata esset ab omnibus; votum fecit beato Francisco et eius coepit moriens auxilium invocare. Emissa autem voto, celeriter obdormivit viditque in somnis beatum Franciscum se dulciter alloquentem ac requirentem, utrum faciem

¹ Edd. *Tempore vero partus duos perpassa dolores.*

² Gen. 3, 16: Mulieri quoque dixit: Multiplicabo aerumnas tuas et conceptus tuos, in dolore paries filios. — Vat. cum ed. 1 hic addit *Evae*. Superius pro *proditum* edd. *productum*, et pro *matris* Vat. cum ed. 1 *matris*.

³ Datur *Carvico* (quod fortasse idem erit cum *Carvio*) in provincia Bergomi. Cod. B *Carvio*. Vat. et Acta SS. *Narnio*. — Inferius pro *conceptum* Acta SS. *conceptus*.

⁴ Sicut Luc. 1, 57. de Elisabeth dicitur. — In fine propo-

sitionis L legit: *et ad Sanctum eius devotionis affectu* (B D F *devotionis affectus*).

⁵ Italice *Tivoli*. Cod. E hoc et praecedens miraculum omittit.

⁶ Vat. cum ed. 1 *in infortuniis*. Inferius pro *honori Sancti* edd. *honorem Sancto*.

⁷ Du Cange, Glossarium etc.: *Reintegrare*, redintegrare, instaurare, in pristinum statum restituere. Cod. G et Acta SS. *reintegravit*.

ipsius agnosceret, et an antiphonam illam Virginis gloriosae¹: « Salve, Regina misericordiae », sciret ad honorem eiusdem Virginis recitare. Qua respondente, se habere notitiam de utrisque: « Incipe, ait Sanctus, antiphonam sacram, et antequam compleas, paries cum salute ». Ad hanc vocem evigilavit mulier et cum timore coepit dicere: « Salve, Regina misericordiae ». Cumque illos misericordes oculos precaretur fructumque commemoraret uteri virginis; continuo cunctis liberata pressuris, infantem peperit speciosum, gratias agens Reginae misericordiae, quae per beati Francisci merita ipsius dignata fuerat misereri.

§ VII. De caecis illuminatis.

1. In conventu Fratrum Minorum de² Neapoli, cum quidam Frater, Robertus nomine, caecus annis plurimis exstisset, crevit in oculis eius caro superflua, motum et usum impediens palpebrarum. Cum igitur Fratres forenses, ad diversas mundi partes tendentes, ibidem plurimi convenissent; beatus Pater Franciscus speculum obedientiae sanctae, ut eos miraculi novitate hortaretur ad iter, praedictum Fratrem, ipsis praesentibus, tali modo curavit. Iacebat nocte quadam Frater Robertus praedictus aeger ad mortem, iamque sibi fuerat anima commendata, cum ecce, astitit ei beatus Pater cum tribus Fratribus omni sanctitate perfectis, videlicet sancto Antonio, Fratre Augustino³ et Fratre Iacobo de Assisio, qui sicut eum perfecte fuerant secuti, dum viverent, ita et ipsum alacriter comitabantur post mortem. Accipiens cultellum, sanctus Franciscus carnem superfluum resecavit, lumen restituit pristinum et a mortis eum fauce redixit dixitque illi: « Fili Roberte, gratia, quam tecum feci, signum est Fratribus ad remotas nationes euntibus, quod ego praecedam eos et ipsorum dirigam gressus. Vadant, inquit, gaudentes et iniunctam obedientiam alacri animo exsequantur ».

2. Apud Thebas in Romania⁴ mulier caeca vigiliam sancti Francisci in pane tantum et aqua ieiunans, ad ecclesiam Fratrum Minorum summo mane festivitatis a viro suo perducta est. Quae, dum Missa celebraretur, in elevatione corporis Christi oculos aperuit, clare vidit, devotissime adoravit. In ipsa vero adoratione voce magna proclamans: « Gratias, inquit, Deo et Sancto eius, quia video corpus Chri-

sti », omnibus, qui aderant, in vocem⁵ exultationis conversis. Post sacrorum expletionem reversa est mulier in domum suam cum gaudio spiritus et lumine oculorum. Exultabat quidem mulier, non solum quia lucis corporeae recuperarat aspectum, verum etiam, quia Sacramentum illud mirificum, quod est lumen animarum verum et vivum, respectu primario per beati Francisci merita, fidei suffragante virtute, meruerat intueri.

3. In Campania puer quidam quatuordecim annorum de castro Pophis⁶ subita vexatus angustia, sinistrum oculum amisit ex toto. Passionis acerbitas sic de loco suo propulit oculum, quod per octo dies extra, nervo relaxato, longitudine digiti unius ad maxillas dependens, pene aridus est effectus. Sed cum sola superesset abscissio, et a medentibus foret penitus desperatus; pater eius ad auxilium beati Francisci tota se mente convertit. Non defuit ille indefessus miserorum adiutor precibus supplicantis. Nam oculum aridum mirabili virtute in locum suum pristinumque vigorem restituit et lucis optatae radiis illustravit.

4. In eadem provincia apud Castrum magni ponderis lignum ex alto proruit⁷, et cuiusdam sacerdotis caput gravissime quassans, sinistrum oculum excaecavit. Qui, humi deiectus, coepit alta voce sanctum Franciscum luctuose clamare, dicens: « Succurre, Pater sanctissime, ut ad festum tuum ire valeam, sicut Fratribus tuis ire promisi »; erat enim vigilia Sancti; qui statim exurgens, peroptime liberatus, in vocem prorupit laudis et gaudii, et circumstantes omnes, qui eius miseriae condolebant, in stuporem convertit et inebulum. Ivit ad festum, narrans omnibus, quam in se expertus fuerat clementiam et virtutem.

5. Vir quidam de monte Gargano, dum, in vinea sua laborans, lignum quoddam ferro succideret, proprium percussit oculum et sic divisit per medium, ut quasi media⁸ pars ipsius exterius dependeret. Cumque in tam desperato periculo desperaret, sibi posse per hominem subveniri; ieiunaturum se in festo sancti Francisci, si ei succurreret, repromisit. Statim in loco debito viri oculum Sanctus Dei restituit sicque divisum reiunxit et lumine pristino decoravit, ut nullius laesionis vestigia remanerent.

6. Filius cuiusdam nobilis viri a nativitate caecus meritis sancti Francisci lumen accepit optatum; qui, nomen ab eventu sortitus, *Illuminatus* vocatus

¹ Echard., Scriptores Ord. Praedicator., tom. I. pag. 97 in nota: Notandum, quod antiphona illa alias diceretur, nempe: *Salve, Regina misericordiae* tantum, non addito *mater*, ut et in fine *O dulcis Maria* tantum; quod et diutius observatum, ut ex antiquis codd. Ms. expertus sum. — Mox pro *eiusdem* Vat. cum ed. 1 *huius*. Cod. E hoc miraculum omittit.

² Edd. omittunt *de*.

³ De quo, ut videtur, supra c. 14. n. 6; cfr. etiam Analecta Franciscana, tom. III. pag. 226, ubi vocatur Augustinus de Assisio; ibid. pag. 498 dicitur: In provincia sancti Angeli

requiescit Foggiae [Italice Foggia] frater Iacobus de Assisio, qui multos a periculosis infirmitatibus miraculose curavit. — Superius pro *cum ecce* Vat. et ed. 1 *et ecce*, Acta SS. *ecce*.

⁴ Cfr. supra pag. 556, nota 10.

⁵ Ita G1M; edd. in voce (cfr. Ps. 41, 5: Transibo in locum tabernaculi... in voce exultationis et confessionis). — Superius B omittit *vero*.

⁶ Iam supra § 3. n. 2. allato. — Cod. E hoc miraculum omittit.

⁷ Cod. 1 et Acta SS. *prorupit*.

⁸ Codd. G1M *dimidia*.

est. Assumpsit postea, cum in aetate esset, Ordinem beati Francisci, accepti beneficii non ingratus, tantumque profecit in lumine gratiae et virtutis, ut verae lucis filius videretur. Tandem beati Patris promerentibus meritis, sanctum initium fine sanctiori conclusit.

7. In Zachanto¹, quod est castrum iuxta Anagnin², miles quidam, Girardus nomine, oculorum lumen ex toto perdidit. Accidit autem, ut duo Fratres Minores ab exteris partibus venientes, ad domum ipsius hospitaturi diverterent. Suscepti itaque devote propter reverentiam sancti Francisci a familia tota et cum omni benignitate tractati, gratias agentes Deo et hospiti, ad locum Fratrum devenere vicinum. Nocte igitur quadam beatus Franciscus uni Fratrum illorum in somnis apparuit, dicens: « Surge, festina cum socio ad domum hospitis nostri³, qui Christum et me suscepit in vobis. Volo enim ei officia rependere pietatis. Caecus quidem effectus est, suis promerentibus culpis, quas poenitentiali non studuit confessione purgare ». Disparente quoque Patre, Frater festinus surrexit, ut mandatum cum socio celeriter adimpleret, venientesque ad hospitis domum, cuncta, quae viderat alter, per ordinem narrarunt eidem. Stupuit vir ille non modicum, et universa, quae dicebantur, vera esse confirmans, compunctus ad lacrymas, confessus est libens. Tandem correctione promissa, interiorique homine taliter renovato⁴, exteriorem continuo recuperavit aspectum. Huius miraculi fama circumquaque diffusa non solum ad reverentiam Sancti, verum etiam ad confessionem humilem peccatorum et hospitalitatis gratiam plurimos incitavit⁵.

§ VIII. De liberatis a variis morbis⁶.

1. Apud Castrum Plebis⁶ invenis quidam mendicus surdus erat et mutus a nativitate sua, qui lin-

guam adeo curtam habebat ac tenuem, quod multoties exquisita a pluribus, praecisa penitus videretur. Vir quidam, Marcus nomine, ipsum propter Deum suscepit hospitio; qui, eum sibi benefacere sentiens, coepit cum ipso assiduus demorari. Sero quodam, cum praedictus vir coenaret cum coniuge, astante puero coram eis, dixit uxori: « Hoc ego maximum miraculum reputarem, si beatus Franciscus huic auditum redderet et loquelam ». Et adiecit: « Voveo Deo, quod si hoc sanctus Franciscus dignabitur operari, propter amorem suum huic puero expensas conferam, donec vivet. Mirum certe! Subito lingua crevit et locutus est, dicens: « Gloria Deo et sancto Francisco, qui mihi loquelam praebuit et auditum ».

2. Frater Iacobus de Iseo⁷, cum puerulus esset in domo paterna, rupturam incurrit corporis valde gravem. Superno vero afflatus Spiritu, licet esset juvenis et infirmus, Ordinem sancti Francisci devotus intravit, nulli tamen, qua urgebatur, infirmitatem detexit. Factum est autem, cum corpus beati Francisci transferretur ad locum, ubi pretiosus sacrorum osium eius nunc thesaurus est conditus⁸; affuit et tunc dictus Frater translationis gaudiis, ut glorificati iam Patris sanctissimo corpori honorem debitum exhiberet. Et appropinquans tumbae, in qua ossa sacra fuerant collocata, prae devotione spiritus sacrum tumultum complexatus, subito, miro modo ad loca debita partibus revocatis, sanum se sensit, succinctorium deposuit et ex tunc ab omni dolore praeterito liber fuit. — Ab infirmitate quoque consimili Frater Bartholus de Eugubio, Frater Angelus de Tuderto, Nicolaus, sacerdos de Sucano⁹, Ioannes de Fora, vir quidam de Pisis et alius de castro Cisternae, Petrus quoque de Sicilia et homo quidam de castro Spelli iuxta Assisium et quam plures alii per Dei misericordiam et beati Francisci merita exstiterunt mirabiliter liberati.

¹ Codd. G I M *Zanchanto*, L *Zarchanto*. Mox pro *Anagnin* Vat. cum ed. 1 *Ananiam*.

² Codd. G I M *vestri*. Inferius pro *ei officia* (ita B D E F) G I L M *ei beneficia*, edd. *beneficia*.

³ Cod. B *totaliter revocato*.

⁴ Hic refertur a cod. K ad calcem paginae, a Waddingo, loc. cit., ad an. 1228, n. 59. et ab ed. Seduliana miraculum illud (de caeco, effossis iam oculis, luce donato), quod Generalis Hieronymus ab Asculo Legendae Bonaventuriana apposit (cfr. supra pag. 512, nota 2. in fine): Quidam pro furti calumnia caccatus fuit rigore iustitiae saecularis apud Assisium, Othone milite per ministros publicos sententiam Octaviani iudicis de eruendis accusato oculis exsequente; qui taliter deformatus, effossis oculis, praecisis nervis opticis etiam cum cultello, ductus ad altare beati Francisci, implorata ipsius clementia, et sua in praedicti criminis impositione innocentia allegata, Sancti ipsius merito infra triduum novos recepit oculos, minores quidem illis quibus orbatus fuerat, sed non minus limpide visus officium exercentes. Huius autem stupendi miraculi testis fuit praenominatus miles Otho, iuramento ad hoc astrictus, coram domino Iacobo abbate sancti Clementis, auctoritate domini Iacobi episcopi Tiburtini de ipso miraculo inquirente. Testis etiam exstitit eiusdem miraculi Frater Guillelmus [Wadding. et

ed. Sedul. *Guillelmus*] Romanus a Fratre Hieronymo [Wadding. addit: Esculano], Generali Ministro Ordinis Minorum, ad veritatem dicendam, quam circa hoc noverat, praeepto et excommunicationis sententia obligatus; qui taliter astrictus coram pluribus Ministris Provincialibus eiusdem Ordinis et aliis magni meriti Fratribus affirmavit, se dudum, adhuc saecularem existentem, vidisse eum habentem oculos et postmodum actu executionis iniuriam patientem, ac se excaecati oculos in terram proiectos curiose cum baculo revolvisse, et postmodum virtute divina eundem, novae lucis receptis oculis, videntem clarissime conspexisse. Cfr. *Analecta Franciscana*, tom. III. pag. 358, nota 1, ubi documentum authenticum hac de re refertur.

⁵ Vat. cum ed. 1 a *diversis infirmitatibus*, Acta SS. a *variis infirmitatibus*; codd. E F hanc rubricam omittunt.

⁶ Vide supra pag. 541, notam 14. — Inferius pro *propter Deum* B F *propter Dominum*.

⁷ In Lombardia iuxta lacum Isei (Iseo sive Sabino) in confinibus prov. Brixianae et Bergomi. Plures codd., ut B D E F M, *Iseo*. — Inferius pro *infirmitatem* edd. *infirmitate*.

⁸ Cfr. supra pag. 553, nota 4. — Inferius edd. omittunt *sanctissimo*.

⁹ In Umbria, ita D E G I K L M; B *Succano*, edd. *Stichano*.

3. In maritima mulier quaedam mentis alienationem per quinquennium passa, visu et auditu privata est, indumenta dilaniabat dentibus, ignis et aquae periculum non timebat et caduci morbi ad summum incurrerat horribilem passionem. Nocte vero quadam, cum disponderet sibi divina misericordia misereri, salutaris fulgore lucis superillustrata divinitus, vidit, beatum Franciscum super solium sedere sublime, ante quem prostrata, sanitatem suppliciter exposcebat. Illo vero nondum favente precibus, firmavit mulier votum, promittens pro Dei amore ac Sancti petentibus, donec haberet, eleemosynam non negare. Illico Sanctus pactum recognovit, quod olim cum Domino simile fecerat¹, et signans eam crucis signaculo, integram sibi restituit sanitatem. — A consimili passione puellam quandam de Nursia et filium cuiusdam nobilis viri et alios quosdam relatione veridica compertum est Sanctum Dei Franciscum misericorditer liberasse.

4. Petrus de Fulgino ad visitanda limina beati Michaelis² quodam tempore pergens, dum minus reverenter peregrinationem peregit, fontis cuiusdam aquam degustans, a daemonibus est invasus. Et exinde per tres annos obsessus, discerpebatur in corpore, pessima loquens et horrenda praetendens; habens tamen aliquando lucida intervalla, beati viri virtutem, quam efficacem audierat ad effugandas aëreas potestates, humiliter requisivit et ad sepulcrum pii Patris accedens, mox ut illud contigit manu, a daemonibus crudeliter enim discerpentibus mirifice liberatus fuit. — Simili etiam modo mulieri cuidam de Narnio habenti daemonium misericordia Francisci subvenit et aliis pluribus, quarum vexationum angustias et curationum modos longum esset per singula enarrare.

5. Vir quidam, nomine Bonus, homo de civitate Fani³, paralyticus et leprosus, ad ecclesiam beati Francisci a parentibus deportatus, ntriusque morbi plenam consecutus est sanitatem. — Sed et alius iuvenis quidam, Acto nomine, de sancto Severino⁴, totus leprosus, voto emisso, et ad sepulcrum Sancti delatus, meritis ipsius lepra mundatus est. Habuit quidem Sanctus supra huiusmodi morbo curando praecellentem virtutem, pro eo quod humilitatis et pietatis amore leprosororum obsequiis semetipsum humiliter deputarat.

6. Nobilis quaedam mulier, Rogata nomine, in episcopatu Sorano⁵, per viginti tres annos fluxu fuit sanguinis fatigata, sed et a quam pluribus medicis

quam plurima mala perpessa; prae nimietate quidem languoris saepius videbatur mulier exspirare; sed si quando fluxus huiusmodi stringebatur, tumescebat corpore toto. Audiens autem quendam puerum Romano sermone canentem miracula, quae Deus per beatum Franciscum fuerat operatus, nimio dolore commota, tota prorupit in lacrymas sicque intra se fide accensa dicere coepit: « O beate Pater Francisce, qui tantis coruscas miraculis, si me digneris ab hac aegritudine liberare, magna tibi accrescet gloria, quoniam adhuc tantum miraculum non fecisti ». Quid plura? Illis dictis, sensit se beati Francisci meritis liberatam. — Filium quoque ipsius, Marium⁶ nomine, qui brachium habebat contractum, sanctus Franciscus, voto ad ipsum emisso, sanavit. — Feminam etiam quandam de Sicilia per septennium fluxu sanguinis fatigatam beatus Christi signifer sanam fecit⁷.

7. In urbe Romana Praxedis quaedam nomine, religiositate famosa, quae a tenella aetate propter aeterni Sponsi amorem arcto se carcere per quadraginta iam fere annos abdiderat, apud beatum Franciscum gratiam promeruit specialem⁸. Nam cum die quadam pro rebus opportunis solarium suae cellulae conscendisset, et impulsione phantastica cornuens, contractum haberet pedem cum crure et humerum a positione debita sequestratum; apparuit ei benignissimus Pater, vestimentis gloriae candidatus, dulcibusque affatibus alloqui coepit eandem: « Surge, inquit, filia benedicta, surge, ne timeas », et apprehensa manu ipsius, allevans eam, disparuit. Ipsa vero per cellulam suam huc atque illuc se convertens, putabat, *se visum videre*⁹; usquequo ad clamorem ipsius apportato iam lumine, perfecte se sentiens per servum Dei Franciscum esse sanatam, cuncta, quae acciderant, per ordinem narravit.

§ IX. De non observantibus festum et inhonorantibus Sanctum¹⁰.

1. In Pictaviae partibus, in villa, quae Symo¹¹ dicitur, sacerdos quidam, Reginaldus nomine, beato Francisco devotus, festum ipsius parochianis suis indixerat solemniter celebrandum. Unus autem de populo, ignorans Sancti virtutem, sui parvipendit sacerdotis mandatum. Egressus autem foras in agrum, ut ligna succideret, cum se praeparasset ad opus, vocem audivit huiusmodi ter dicentem: « Festum est; operari non licet ». Verum, cum nec imperio

¹ Cfr. supra c. 1. n. 1. — Cod. E hoc et duo seqq. miracula omittit.

² In monte Gargano; cfr. supra c. 14. n. 6. — Pro *visitanda* edd. *visitandum*.

³ *Fanum Fortunae* (Fano) in Marchia Anconitana, civitas ditionis Pontificiae, ducatus Urbinatis. Alterum *Fanum* est castrum regni Neapolitani, prov. Aprutii Ulterioris.

⁴ Cfr. supra pag. 515, nota 3. — Inferius pro *lepra mundatus* edd. *a lepra mundatus*.

S. Bonav. — Tom. VIII.

⁵ Sora in regno Neapolitano, prov. Terrae Laboris. — Cod. E hoc et seqq. miracula usque ad § 9. omittit.

⁶ Vat. cum ed. 1 *Marcum*.

⁷ Edd. *satram fecit*.

⁸ Vat. cum ed. 1 *spiritualem*. Inferius pro *contractum* edd. cum *fractum*.

⁹ Act. 12, 9: Existimabat [Petrus] autem, se visum videre.

¹⁰ Edd. *et non inhonorantibus Sanctum*. Cod. F hanc rubricam omittit.

¹¹ Ita codd., qui tamen ante *villa* omittunt *in*; edd. *Simo*.

sacerdotis nec supernae vocis oraculo servilis temeritas frenaretur, addidit divina virtus ad gloriam Sancti sui sine mora miraculum et flagellum. Mox enim, ut furcam una manu iam tenens, alteram cum ferreo instrumento levavit ad opus; sic divina virtute utraque manus utrique instrumento cohaesit, ut ad neutrius dimissionem digitos aliquatenus relaxare valeret. Ex quo stupefactus nimis, et quid ageret, nesciens, ad ecclesiam, multis undique ad videndum prodigium concurrentibus¹, properavit. Ubi mente compunctus ante altare, quodam ex assistentibus sacerdote monente — plures quippe ad festum vocati convenerant sacerdotes — beato Francisco humiliter se devovit, tria, sicut ter vocem audierat, vota vovens, quod scilicet festum ipsius coleret, quod ad illam in qua tunc erat ecclesiam in festo veniret et quod Sancti corpus personaliter visitaret. Mirum certe relatu! Uno emisso voto, unus de digitis² factus est liber, ad secundi emissionem solutus est alius, sed tertio facto voto, laxatus est tertius et postmodum tota manus nec non et altera subsequenter, populo, qui iam multus advenerat, Sancti clementiam devotissime implorante. Sic homo pristinae redditus libertati³, per se ipsum instrumenta deposuit, cunctis laudantibus Deum virtutemque Sancti mirificam, qui tam mirabiliter percutere poterat et sanare. Ipsa vero instrumenta usque hodie coram altari ad honorem beati Francisci fabricato ibidem in memoriam facti⁴ dependent. — Plura quoque illic et in locis vicinis patrata miracula et Sanctum in caelis ostendunt eximium et festum ipsius in terris venerabiliter excolendum.

Alia miracula.

Secundum.

2. In civitate quoque Cenomanensi, dum in sollemnitate sancti Francisci mulier quaedam manus ad colum extenderet et digitis apprehenderet fnum, obrigescentibus manibus, coeperunt digiti magnis ardoribus cruciari. Igitur poena docente, Sancti recognoscens virtutem, corde compuncta incurrit ad Fratres. Cumque pro salute ipsius devoti filii sancti Patris clementiam precarentur, incolumis effecta est statim, nec aliquid laesionis remansit in manibus, nisi ad facti memoriam solum vestigium combusturae. — Simili etiam modo in Campania maiori mulier quaedam, et in villa Oletti⁵ mulier altera, et in castro Pilei tertia, dum beati Patris festum celebrare contemnerent, praevaricantes primum mirabiliter sunt punitae, sed postmodum poenitentes per sancti Francisci merita sunt mirabiliter liberatae.

Alia tria.

3. Miles quidam de Burgo⁶, in provincia Mas- Sextor
sae, beati Francisci operibus et miraculorum signis impudentissime detrahebat. Inferebat multa opprobria peregrinis ad ipsius memoriam venientibus et contra Fratres publica garriebat insania. Cum autem semel Sancti Dei gloriam impugnaret, addidit super peccata sua blasphemiam detestandam: « Si verum est, inquit, quod Franciscus iste sit sanctus, gladio cadat hodie corpus meum; si vero sanctus non est, evadam incolumis ». Non distulit ira Dei condignum inferre supplicium, cum iam facta fuisset *eius oratio in peccatum*⁷. Mora enim modica interiecta, dum blasphemus nepoti suo inferret iniuriam, accepit ille gladium et patrum visceribus cruentavit. Eodem die mortuus est sceleratus, inferni mancipium et filius tenebrarum, ut ceteri discerent miranda Francisci opera non blasphematoris verbis impetere, sed devotis laudibus honorare.

4. Iudex quidam, nomine Alexander, dum a Septi
beati Francisci devotione, quos poterat, venenata lingua retraheret, divino iudicio lingua privatus, per sex annos obmutuit. Qui cum in eo quo peccaverat, torqueretur⁸, alta poenitudine revocatus, dolebat, se contra Sancti miracula oblatrasse. Itaque non perstitit misericordis indignatio Sancti, sed poenitentem ac se humiliter invocantem, restituta loquela, recepit ad gratiam. Ex tunc linguam blasphemam consecravit laudibus Sancti, devotionem simul et disciplinam recipiens per flagellum.

§ X. De quibusdam aliis miraculis diversimodi generis⁹.

1. In castro Galiani Valvensis dioecesis¹⁰ mulier quaedam erat, Maria nomine, quae Christo Iesu et beato Francisco famulatu devoto subiecta, una dierum aestivo tempore exiit, ut manibus conquereret propriis necessarium victum. Cum igitur, fervente nimium aestu, sitis deficere coepisset ardoribus, omni privata beneficio poculi, pro eo quod in monte arido sola esset, quasi exanimis humi prostrata, patronum suum sanctum Franciscum invocabat pio mentis affectu. Dum autem perseveraret mulier in affectuosa et humili prece, labore, siti et aestu fatigata quam plurimum, paululum obdormivit. Et ecce, sanctus Franciscus adveniens et eam vocans ex nomine: « Surge, inquit, et bibe aquam, quae divino munere tibi ac pluribus exhibetur ». Ad huius vocis auditum surrexit mulier a somno, non modicum

Alia tria.

¹ Vat. cum ed. † *occurrentibus*. Inferius vocibus *ante altare* I L M interserunt *sacrum*.

² Edd. cum uno alteroque cod. *unus digitus*. Inferius pro *laxatus* L *relaxatus*. ³ Cod. I *sanitati*.

⁴ Vat. cum ed. † *in memoriam Sancti*.

⁵ In codd. invenimus *Oleti*, sicut etiam subiinde pro *Pilei* nonnulli codd. substituunt vel *Pillei* vel *Pyllei*. Cod. E ea quae in n. 2. narrantur, omittit.

⁶ Codd. G H I M omittunt *de Burgo*.

⁷ Psalm. 108, 7: Et oratio eius fiat in peccatum. Edd. omittunt *eius*.

⁸ Sap. 11, 17: Quia per quae peccat quis, per haec et torquetur. Pro *in eo quo* Vat. cum ed. I *in eo, quod*.

⁹ Edd. *dicersorum generum*. Codd. EFL hanc rubricam omittunt.

¹⁰ In Aprutio Citeriori regni Neapolitani.

confortata, et accipiens filicem¹, quae iuxta se erat, radicitus evulsit a terra, effodiensque ligno parvulo circumquaque, viventem reperit aquam, quae cum primo videretur parvula stilla, subito divina virtute crevit in fontem. Bibit itaque mulier et satiata oculos lavit, quos cum longa prius haberet aegritudine obumbratos, nova ex tunc sensit luce perfusus. Festinavit ad domum mulier, tam stupendum miraculum ad gloriam sancti Francisci denuntians universis. Concurrerunt undique multi ad miraculi famam, experientia magistra discentes mirabilem illius aquae virtutem, dum ad ipsius contactum, confessione praemissa, a variis morborum cladibus plurimi liberabantur. Perseverat usque hodie fons ibi perspicuus², et in honorem beati Francisci ibidem oratorium est constructum.

2. In Hispania apud sanctum Facundum³ viri cuiusdam cerasum arefactam ad virorem frondium, florum et fructuum contra spem mirabiliter revocavit. — Incolas quoque terrae apud Vilesios⁴ a vermium peste corrodentium vineas circumquaque miraculoso suffragio liberavit. — Sacerdotis cuiusdam iuxta Palentiam⁵ horreum quoddam, quod vermibus frumentariis repleti quolibet anno solitum fuerat, sibi fideliter commendatum penitus expurgavit. — Terram quoque domini cuiusdam de Petramala in regno Apuliae sibi suppliciter commendatam ab odiosa peste bruchorum⁶ penitus servavit indemnem, cum tamen in circuitu omnia essent praedicta pestilentia devorata.

3. Vir quidam, Martinus nomine, cum longe a castro suo boves minasset ad pascua, crus unius bovis casu quodam sic fuit desperate contractum, ut nihil esset sibi de remedio aliquo cogitandum. Dum autem pro decoratione foret sollicitus et instrumentum, cum quo id faceret, non haberet, domum reversus, beato Francisco bovis curam reliquit ipsumque fidei Sancti custodiae fiducialiter commendavit, ne ante suum reditum devoraretur a lupis. Summo itaque mane ad bovem in silva relictum cum excoiutore⁷ reversus, pascentem ipsum ita reinvenit incolumem, quod nequaquam crus fractum ab altero discernebat. Gratias egit bono pastori, qui diligentem de bove suo curam habuit et medellam donavit. Succurrere novit humilis Sanctus omnibus invocantibus ipsum nec quantumcumque parvas necessitates hominum dedignatur. — Nam viro cuiusdam de Amiterno⁸ iumentum restituit furto sublatum. Mulieri cuiusdam de Interduco catinum novum in

multas partes casu divisum integre reparavit. Viro etiam cuiusdam de monte Ulmi in Marchia⁹ consolidavit vomerem in frusta contractum.

4. In Sabinensi dioecesi¹⁰ vetula quaedam octogenaria erat, cuius filia moriens lactentem infantulum dereliquit. Cum igitur anus paupercula plena esset inopia et vacua lacte, nullaque esset mulier, quae sitienti parvulo lactis stillicidium, iuxta quod exigebat necessitas, erogaret, quo se verteret, vetula penitus ignorabat. Debilitato vero infantulo, nocte quadam omni humano destituta subsidio, ad beati Patris Francisci auxilium implorandum, lacrymarum imbre perfusa, tota se mente convertit. Affuit statim innocentis amator aetatis: «Ego, inquit, sum Franciscus, o mulier, quem cum tantis lacrymis invocasti. Pone, ait, mammas tuas in ore pueruli¹¹, quoniam abundanter tibi lac Dominus dabit». Implevit anus Sancti mandatum, et statim octogenariae mammae lactis copiam effuderunt. Innotuit omnibus mirabile Sancti donum, multis tam viris quam mulieribus accelerantibus ad videndum. Et quia quod testabantur oculi lingua impugnare non poterat, excitabantur omnes ad laudandum Deum in Sancti sui virtute mirabili et amabili pietate.

5. Apud Spoletum vir et uxor, unicum habentes filium, quotidie illum velut hereditarium opprobrium deplorabant. Brachiis siquidem collo connexis, iunctisque genibus pectori, et pedibus alligatis natus¹², non hominis proles, sed monstrum quoddam potius videbatur. Vehementiori mulier ex hoc afflicta dolore, crebris gemitibus clamabat ad Christum sancti Francisci auxilium invocando, ut infelici sibi et in tali opprobrio constitutae succurrere dignaretur. Nocte igitur quadam, cum propter huiusmodi tristitiam tristes eam somnus arriperet, apparuit ei sanctus Franciscus, piis eam affatibus mulcens insuper et suadens, quod ad locum propinquum suo nomini dedicatum deferret puerum, ut ex aqua putei loci illius in nomine Domini superfluous, plenam reciperet sospitatem. Negligente autem illa Sancti adimplere mandatum, secundo replicavit id ipsum. Tercio quoque apparens, mulierem cum puero usque ad iannam dicti loci praeambulo ducatu perduxit. Supervenientes autem nobiles quaedam matronae devotionis causa ad locum praedictum, eis a muliere praefata diligenter exposita visione, una cum ipsa puerum Fratribus praesentarunt, et haurientes aquam de puteo, earum nobilior propriis manibus lavit infantem. Statim puer, omnibus membris ad sua loca

Decimum.

Undecimum.

¹ Ita Acta SS., *I felicem*; alii codd. et edd. *silicem*. Filix est herba quaedam.

² Cod. B *conspicuous*.

³ Alias *Sahaguno*, in regno Legionensi.

⁴ Codd. *Villesios*.

⁵ In regno Legionensi in Hispania.

⁶ Cod. L et Acta SS. *brutorum*, in aliis codd. legitur *bruchorum*; cfr. du Cange, Glossarium etc.: *Brucus* pro bru-

chus, Gr. *βροῦχος*, Italice *Bruco*, vermis seu locustae species.

⁷ Du Cange, Glossarium etc.: *Excoiutor*, Ianus.

⁸ Erat urbs regni Neapolitani in Aprutino Ulteriori, in quo etiam habetur *Interducus* (Interdicus).

⁹ Scilicet Anconitana ad fluvium Ufentem (Chienti).

¹⁰ Sabina est antiqua provincia ditionis Pontificiae.

¹¹ Cod. M et Acta SS. *puerili*.

¹² Val. *perperam naribus*.

perductis, sanus apparuit, et magnitudo miraculi omnibus admirationem induxit¹.

Duodeci-
mum.

6. In castro Chore Ostiensis dioecesis vir quidam sic crus ex toto perdiderat, ut nullo modo progredi vel movere se posset. Positus itaque in angustia vehementi et auxilio desperatus humano, coepit nocte quadam, ac si praesentem cerneret beatum Franciscum, talem coram eo assumere materiam querelandi²: « Adiuva me, sancte Francisce, recolens meum servitium et devotionem tibi impensam. Nam in asino meo te portavi, sanctos pedes tuos et sanctas manus tuas osculatus fui, semper tibi devotus, semper benevolus exstiti, et ecce, morior doloris huius durissimo cruciatu ». His pulsatus querelis, statim affuit beneficiorum memor, devotioni³ gratus et vigilantī viro cum uno Fratre apparuit. Ad vocationem eius se venisse dixit et tulisse remedia sanitatis. Tetigit locum doloris cum baculo parvulo, qui figuram *thau*⁴ in se habebat, et fracto mox apostemate, perfectam tribuit sanitatem. Et, quod mirabilis est, sacrum signum *thau* impressum super locum sanati ulceris ad miraculi memoriam dereliquit.

De virtute
Crucis in
Sancto ma-
nifestata.

7. Hoc signo sanctus Franciscus suas consignabat litteras, quoties caritatis causa scriptum aliquod dirigebat⁵. Sed ecce, dum per diversa miracula gloriosi Patris Francisci mens narrationis varietate distracta decurrit, promerente ipso crucis glorioso signifero, in signum salutis *thau* non sine divina directione pervenit, ut ex hoc possimus advertere, quod sicut crux militanti post Christum fuit sublimitas meriti ad salutem, sic et triumphanti cum Christo facta est firmitas testimonii ad honorem.

A conversio-
ne per totam
vitam.

8. Hoc quippe crucis mysterium magnum et mirum, in quo charismata gratiarum et merita virtu-

tum et thesauri sapientiae et scientiae tam alta profunditate velantur, ut a *mundi sapientibus et prudentibus* sit occultum, tam plene fuit huic Christi parvulo revelatum⁶, ut omnis vita ipsius non nisi crucis vestigia sequeretur, non nisi crucis dulcedinem saperet, non nisi crucis gloriam praedicaret. Vere namque in suae *conversionis principio* dicere cum Apostolo⁷ potuit: *Mihi autem absit gloriari nisi in cruce Domini nostri Iesu Christi*. Non minus etiam vere in *conversationis progressu* addere valuit: *Quicumque hanc regulam secuti fuerint, pax super illos et misericordia*. Verissime autem in *consummatione* potuit subinferre: *Stigmata Domini Iesu in corpore meo porto*. Sed et illud nos quotidie desideramus ab ipso audire: *Gratia Domini nostri Iesu Christi cum spiritu vestro, Fratres. Amen*.

Alloco
Sanc.

9. Gloriare igitur iam secure in crucis gloria, Christi signifer gloriose, quoniam a cruce incipiens, secundum crucis regulam processisti et tandem in cruce perficiens, per crucis testimonium, quantae gloriae sis in caelo, cunctis fidelibus innotescis. Secure iam te sequantur qui *exeunt ex Aegypto*, quia, per baculum crucis Christi *mari diviso, deserta transibunt, in repromissam viventium terram*⁸, Iordane mortalitatis transmissio, per ipsius crucis mirandam potentiam ingressuri; quo nos introducat verus populi ductor et Salvator, Christus Iesus crucifixus, per merita servi sui Francisci, ad laudem et gloriam unius Dei et trini, qui vivit et regnat in saecula saeculorum. Amen.

EXPLICIUNT MIRACULA POST TRANSITUM BEATI FRANCISCI OSTENSA⁹.

¹ Cod. 1, Wadding., loc. cit., ad an. 1228, n. 73. et Acta SS. hic addunt aliud miraculum: Apud Segusiam [Segusium sive Susa in Pedemontio] iuvenis quidam de Riparolio, Ubertius nomine, Ordinem Fratrum Minorum ingressus, novitiatus sui tempore horridi cuiusdam perturbatione pavoris incurrit amentiam totiusque dextrae partis paralysis morbo gravissimo auditum et linguam cum motu amisit et sensu. Cum autem sic miserabilis non sine Fratrum multa moestitia per plures dies in lectulo decubasset, beati Francisci solemnitas supervenit, in cuius vigilia, concesso sibi aliquo lucido intervallo, pium Patrem, licet voce infirmum, corde tamen fideli, prout poterat, invocabat. Hora vero matutinali Fratribus omnibus in ecclesia laudibus divinis intentis, ecce beatus Pater, habitu Fratrum indutus, infirmariae loco praefato novitio astitit, lumenque non modicum in habitaculo illo refulsit. Et extensam manum super dextrum illius latus a capite usque pedes suaviter contingendo deducens, digitos in aurículas misit, quodamque in dextro humero impresso caractere: « Hoc tibi, ait, signum erit, quod Deus per me, cuius exemplo ductus Religionem intrasti, plene te restituit sanitati ». Chordaque illum succingens, quia sine chorda iacebat, dixit ad eum: « Surgens ecclesiam intra, ut laudes Deo debitas cum Fratribus devotus exsolvas ». Quibus dictis, cum puer ipsum manibus vellet contingere et pedum eius osculari vestigia, ut gratias ageret, ab eius aspectu beatus Pater abscessit. Et iuvenis, recuperata sanitate corporis cum rationis industria, vivacitate sensuum et loquela, ecclesiam ingressus cum multa Fratrum et saecularium admira-

tionem, qui tunc aderant et iuvenem paralyticum viderant et amentem, laudibus divinis interfuit, et per ordinem narrato miraculo, multos ad Christi et beati Francisci devotionem accendit. — Allegavimus in praecedentibus Waddingum ad insinuandos locos, ubi ipse *verba Bonaventurae* inseruit Annualibus (in quibus magis convenit cum codd. quam in ed. Waddingiana, qua usi sunt Acta SS.); de ordine autem chronologico et quibusdam circumstantiis additis, in quibus errasse dicitur, non est hic disceptandi locus.

² Du Cange, Glossarium etc.: *Querelare*, queri. Eadem notione adhibetur *Querulare*, querelas effundere. Acta SS. *querulandi*. ³ Vat. cum ed. 1 et *devotionis*.

⁴ Cfr. supra pag. 515, nota 5.

⁵ Vide supra c. 4. n. 9. in fine et pag. 537, notam 12.

⁶ Matth. 11, 25: Confiteor tibi, Pater, Domine caeli et terrae, quia abscondisti haec a sapientibus et prudentibus et revelasti ea parvulis. — Pro *occultum* Vat. cum ed. 1 *occulta*, quae etiam subinde cum ed. 1 omittit *huic*.

⁷ Gal. 6, 14; et deinde v. 16. 17. et 48. Cfr. supra c. 43. n. 10.

⁸ Cfr. Exod. 14, 22. seq.; Iosue 1, 2. et Ps. 141, 6: Portio mea in terra viventium. — Superius pro *innotescis* B et Acta SS. *innotescit*.

⁹ Ita codd., licet unus alterque hinc vel inde aliquam vocem adiciat, sic 1 voci *miracula* praefigit *quaedam*, M legit *quaedam de miraculis... ostensis*, F *Expliciunt miracula sancti Francisci*. Edd. hanc rubricam omittunt.